

聖教史記

之卷
二一

ORIENTAL LIBRARY
UNIVERSITY OF CALIFORNIA
LOS ANGELES

East
Asian
Library

BR
121
55412
1903
v. 1

6 1953

Univ. of
CALIFORNIA

11
12
13
14
15
16
17
18
19
20
21
22
23
24
25
26
27
28
29
30
31
32
33
34
35
36
37
38
39
40
41
42
43
44
45
46
47
48
49
50
51
52
53
54
55
56
57
58
59
60
61
62
63
64
65
66
67
68
69
70
71
72
73
74
75
76
77
78
79
80
81
82
83
84
85
86
87
88
89
90
91
92
93
94
95
96
97
98
99
100

THE
LIBRARY OF
THE
MUSEUM OF
ART AND HISTORY
OF THE
CITY OF BOSTON

耶穌降世一千九百零三年

聖教史記

光緒二十九年歲次癸卯

上海美華書館鉛板

序

嘗思兩約聖經爲救世聖道之本源而此道廣傳於諸國且世代相繼必有史冊以錄其功效令後世之人能知聖道於先世如何啓發人心如何變更人志如何克勝人私如何勉勵人德如何成人企望也夫耶穌降臨特欲創立天國於暗昧之世此國之大權悉操在上主掌握中也凡誠心歸主者爲天國之民愛憐衆生者爲天國之政此國分布於四極永固常存蓋耶穌遣其門人如同兵勇爲天國戰爭攻克諸敵終令天國勝於世界夫上主乃眞理之原凡屬乎眞理者天國中必珍重而寶愛之聖經明指世人溺於罪中之苦況復指上主所施之恩所用之法以救贖人罪若聖教史紀乃錄傳道之次第與變化人心更正國俗善美之功效歷歷可觀也耶穌言天國如芥種一粒此種雖小至長成則形如大樹此乃聖教外觀之喻而基立之初雖細小不倫至後日愈傳愈廣其善果卽充乎宇宙之中耶穌亦言天國如麩酵置於麩中而麩遂全然發越此乃聖教內感之喻蓋麩酵必置於麩中方能將麩發越聖徒必與未信者相交以心方能感發其心而令其懊悔罪愆誠心歸主耶穌復

言天國如網布於海面，聚集各種水族，將美者納於器，不美者棄之。此知聖道雖全備無缺，然歸教者尚有美陋瑕瑜之分。史冊詳載其事蹟，未可特隱其陋而獨揚其美。有因其美者自生仰企之心，因其陋者自嚴警戒之意。蓋前車之覆，爲後車之鑒。而先世之教會，若有漸失眞道，漸染惡風，漸入邪僻之誤，後世之教會，當將其眞僞分明。若與聖經之訓相合，當持守莫失；若與聖經之訓相悖，當棄置如遺。夫紀錄者必著明聖教與他教論理辯道之事，而先世教會之辯論，與後世之教會大有裨益，卽能知先世之信徒向人之愚頑罪愆，大有寬忍之心。然向邪道者或自教內而起，或自教外遞傳，乃盡力阻止，因確知僞必亂眞，而僞道之結果，乃背理之言行也。夫聖教初傳，在羅馬盛興之際，希利尼之文學廣傳，然諸聖賢所傳之道，或講解人倫，或索求萬物之因緣，或考究萬物之依歸，或推論人與神相關之事，所講之道，未能遏頹風惡習，未能挽人心偏邪，未能擴充人所暗動棄惡向善之良，並人所隱生與神契合之望。聖教之道，乃新射之天光於暗昧之世，令人知上主之性如何聖，其愛如何廣，其爲人所豫備之福如何常存。夫聖教史紀可分三大時際，其一大時際，乃

錄聖教自耶穌降生以後五百年之事。此時聖道廣傳，而漸勝於敬邪神之諸教。其外勢則大興盛矣。其一大時際，乃錄聖教自耶穌後六百年至千六百年之事。此時羅馬教父之權勢愈隆，北方諸狄族新興之國，漸受聖道之陶鎔，然僞道邪風亦傳染於教會矣。其三大時際，乃錄聖教自耶穌後千六百年至今之事。此時之初，卽有忠誠之信徒，深斥教會染邪教流風之弊，而大爲駁正教會之道範，遂興起數大國。其中之教會，不尊羅馬教父爲首者，而其道範必以聖經之訓爲宗焉。此聖教史紀，獨錄古時際教會之事，望於後日，亦能將中時際、近時際、聖教之事續錄於書，以助中華之信徒，多知聖道傳於諸國之功效。在成此書之原意，乃欲擴幼年道學弟子之心，令其多知上主於古時如何護衛，如何導引，如何啟迪，其所羨慕之教會，則能確知上主亦必如是護衛，如是導引，如是啟迪，中華之教會，令其通行於遐邇，而衆人能集其益也。此書非自西國文字譯成中華文字，乃將數有名之史紀，互相校對，取其要者而著成之，其多所倚賴者，乃美國有名聞之師長沙夫、伊著聖教史紀一書，其書也不只證其文學淵博，亦證其或言教會旁起之邪道謬規，或言他教所傳

之邪道、所行之謬規、無不秉公斷定、何者爲是、何者爲非、予不自揣謏陋、妄秉筆創成此編、尤賴西席巨川諸葛公、輯五丁公、錫九龐公、互助以討論修飾潤色之功、始成全豹、而行間字裏、專用淺文、俾初學者易明其意、而學詣精粹者閱之、當曲爲鑒諒、幸勿鄙爲俚句俗言也、在中華之信徒、因讀此書、若能多知聖教事蹟、能多動愛慕聖道之心、能多增守道之力、能多加行道之工、能多立宣道之志、能多存天國速顯於中華之望、則著者之願乃償、而厚望之心愈切矣、

中華光緒十六年正月申浣 刊印

西歷一千八百九十年二月上浣美國教士子榮謝衛樓自序於通州公理教會館
寓

聖教史紀卷之壹

目錄

第一世代教會爲使徒所立

自耶穌降生至耶穌後一百年

第一章論耶穌降世時諸國之景況

第二章論當年時勢可爲聖教之助

第三章論聖教所遇之阻隔

第四章論耶穌後百年中聖教廣傳之事

第五章論聖教受羅馬人之逼迫

第六章論耶穌後百年內教會中之職任

聖教史紀卷之貳

目錄

第二世代教會屢遭迫害

自耶穌後一百年至三百十一年

第一章論耶穌後一百年至三百年聖教廣傳之事

第二章論自耶穌後百年至三百年聖教受迫之事

第三章論此三百年中外教人以文字攔阻之事

第四章論教中所著之文字以證真道

第五章論耶穌後三百年內教會中之職任

第六章論耶穌後三百年內懲治背道者之規

第七章論耶穌後三百年內教會所守之規條

第八章論耶穌後三百年內自聖教所啟之旁門

第九章論耶穌後三百年內教會所傳之道

第十章論羅馬國德教衰微之況

第十一章論聖教傳於羅馬遏其陋俗正其偏心

第十二章論耶穌後二三百年內教中名士事略

聖教史紀卷一

第一世代教會爲使徒所立

自耶穌降生至耶穌後一百年

第一章論耶穌降世時諸國之景況

屆時降生

按聖經所言時屆滿足天主遣其子降生

加拉太四章四節

夫上主之遣耶穌立天國也不早

不遲此中有深意焉吾人亦可知其大略設使耶穌降生於亞伯拉罕之時無諸先知導其前路卽無一國之人奉眞主爲受教之地況當時之諸國教化鄙陋少有往來互相吞噬於此而欲眞道之廣行也不亦難乎若降生於數百年之後適羅馬爲北狄所敗亂事迭興教會始開基於此何能得國家之庇護哉○在耶穌降生之先若波斯馬玳巴比倫伊及希利尼諸國皆掌大權數百年時極隆盛禮儀可觀士農工商通功易事以及木石之修飾雕繪織染並諸般靈巧有用之物非無心裁以益人明智也迨考其載籍終不能增人之善行無怪其後國勢衰微漸次消滅且世風愈趨愈下有財者驕人有權者凌弱惟終身貧苦者困阨難言作祭司者託神道以訓人自爲宣傳其奧秘蓋因久失眞道遂造種種邪說俾人心入於迷途無底止矣

諸國迭興

世風趨下

雖各國之懷才抱德者，欲闡發天人之道，力挽頽風，柰歷代之人，徒誦其嘉言，究不能變其惡行也。抑思夫婦爲人倫之首，人苟不能安居室之正，必致男女無別，遂多苟合之事，其國卽不足以爲國，卽成國亦必不能久存其國。查古世代各國事蹟，可知其淫蕩之心，污辱之事，有難形諸筆墨者。保羅於羅馬書第一章，略言異邦人之淫行，其語雖重，實不爲過也。按羅馬開國之初，其人大抵純樸貞正，及其國勢愈盛，而人心愈漓，並染鄰邦奢靡之陋習，其在愚民，則皆質魯家貧，終身勞苦，惟信各等虛誕之事，其生前死後，均無所望也，悲夫。

第二章論當年時勢可爲聖教之助

保羅第二次傳教遠方，於特羅亞城夜得異象，見有馬其頓人祈之曰：「請至馬其頓助我。」不料甫至腓立比城，宣傳聖教，卽羣相聳動攻擊，官府復下之於獄。由是思之，非馬其頓人甘心求教也，乃其沈溺已深，恍若發此求救之聲耳。其後聖教傳於四方，大都如此。蓋人所奉之邪教，所存之惡心，莫不阻撓正道，而其罪深惡極，不啻人染患沈疴，自於默默中求天上良醫也。當耶穌降世之時，諸國之有位有識者，知先

主之恩愛
最足感人

希利尼之
語言通行
羅馬

年祭神之道爲虛妄，特恐遽然禁絕，無以攝服愚民之心，故隨當時之習俗，而有同流合污之弊焉。在深心人尋求至理，知天壤間必有眞道可循，見耶穌之徒，廉潔持身，彼此相愛，與貪鄙之惡習懸殊，於是多有出彼入此之念，其最足感人者，乃在所講上主有無窮之恩愛，因耶穌以拯救悔罪之人，而賜以永生也。由是以觀，其蒙昧窘迫之況，非皆宣教之機哉？在耶穌先數百年，羅馬人乃一小族耳，地勢彈丸，居義大利之太比耳河畔，至耶穌之世，附近地中海三洲之地，皆撫而有之，雖各國之禮俗不同，統歸一王之制矣，所以四通八達，商務繁興，亦有文學富足之人，或欲暢其心意，或欲廣其見聞，多往遠方遊歷，亦有諸國之人，前往羅馬，由是人心不囿於一偏，梯山航海，漸習爲常，正聖教廣傳之先幾也。約三百年之先，亞力山大吞併多國，希利尼之語言文字，以及風俗技藝，漸傳至西亞西亞，與北亞非利加之大地，按羅馬肇興，不以文學爲重，及克希利尼以後，知其教化駕乎己國，故多有習其學術者，漸染薰陶，通國爲之不變，於是希利尼之言語文學，通行於羅馬之東屬，其西屬之人，亦多有明通者，且其語言清越完全，足發聖道之蘊，因而耶穌之徒，不必習他

國律平允

石路通行

猶太人望
所許之王
速臨

國方言，即可宣聖道於多國矣。按羅馬國律較他國尚爲平允，倘未得人犯罪之據，卽不妄加以刑。雖官吏多殘忍受賄，暴斂橫征，然其持法森嚴，於兇殺強盜等事，毫無寬宥。耶穌之徒，雖屢次爲道遭患，因其國政公嚴，終得安然宣教。又按羅馬攻克多國，均以重兵屯守，乃自京都修寬平之石路，通於四面屬國，以便行軍，嗣後爲商旅之通衢。而耶穌之徒，亦藉此路得以宣教於通國也。○猶太人爲聖教傳於異邦之先導，按猶太人皆自居爲上主之選民，其先雖屢背主命，而奉邪神，自七十年羈於巴比倫之後，卻能謹守教規，不染異邦之陋俗。國中歷代先知，皆預言將來有一王振興，爲大衛之裔，繼大衛之位，極有權榮，戰勝仇敵，以充足國中之安樂。猶太人因受鄰邦之虐，遂誤會其言，甚望所許之王速臨於世，克敵復仇，權榮一如大衛。然而耶穌生於寒賤，無人君之度，其所論之國，又與猶太之尊長夙昔所望者懸殊，且聞正言責過，深斥其驕侈貪誣，言如利刃，是以觸其怒而遭其害，不知伊等之惡，適以成上主之善也。未幾聖徒忻然宣其復活之道，多有聽其教，並受聖靈之感者。始恍然耶穌所立之國爲何如國，乃悔罪而奉其名，羣焉爲天國子民矣。雖然，上主之

猶太人分居諸國

繙譯舊約

在猶太會堂講道

遣耶穌豈只救一國之民實欲救萬國之民也進溯其先上主使猶太人分居諸國正以開傳聖教之路耳自猶太人羈縻巴比倫之後波斯王古立攻克巴比倫始許猶太人復國葺補城垣建修聖殿然其去國日久多有在巴比倫成立家業者回國之人故甚寥寥迨亞力山大攻克波斯並其屬國遂於伊及建築新城名曰亞力山大多移猶太人以實之及亞力山大卒其管理伊及之大臣他勒米踐伊及王位有時攻伐敘利亞國攻陷耶路撒冷擄去猶太人十萬或置亞力山大城或置古利奈城其後亞力山大城興盛遂爲猶太希利尼文學之藪矣耶穌先二百八十年有猶太文學之人以希利尼文字譯舊約聖經至耶穌之時猶太之學士多誦讀此經也當耶穌降世之時羅馬已併多國通都大邑之中多有猶太人寄籍者雖身居異國仍守舊規建造會堂不但爲伊等拜主之所且以訓異邦人棄邪神而奉眞主也耶穌之徒初宣聖教之時每至一城必尋猶太會堂入而講道時異邦聽道之人已識聖教之大端故聞聖徒之訓多有樂於聽受而就眞光者迨聖教傳於羅馬羅馬之尊長誤爲猶太教之旁枝別脈遂與猶太教同其護庇由是觀之主使猶太人散居

四國者，非欲其爲聖教之先導乎？

第三章論聖教所遇之阻隔

猶太人謹
守教規

猶太尊長
陷害耶穌

推恨惡之
心於聖徒

耶穌先數百年，猶太人歷受巴比倫、波斯、敘利亞、伊及、羅馬之壓制，然其歷患難愈深，其奉本教愈重，而其遵守教規之心亦愈堅，且因以誤解諸先知所指耶穌之預言，夫諸先知所言之國，乃非常之國也，而猶太人卻望彌賽亞立國於世，大展權榮，拯民於水火之中，復仇雪恥，及耶穌降生，不肯從猶太人作王之請，並言己所立之國，非世間之國，於是猶太之尊長，因其不符所望，漸生離棄之心，又聞耶穌以直言責其驕貪欺詐，以及泥於虛文等事，且耶穌所行多不合其舊規，所以恨毒日甚，終迫羅馬方伯彼拉多定其死罪，卽以兇惡之手，釘耶穌於十架，迨三日復活，聖徒放膽以宣其道，猶太尊長聞之，遂毀謗其名，又妄論其有僭亂之罪，蓋以恨惡耶穌之心，而恨惡聖徒耳，厥後聖徒收異邦人歸教，不使之必受割禮，與猶太各等舊規，而尊長恨惡之心因之愈甚，且聖徒所講人之得救，須信靠耶穌，乃顯駁法利賽人靠律之非也，撒都該人不信復活之理，所以惡聖徒宣講耶穌之復活也，按猶太人逼

羅馬敬神之禮

奉皇帝爲神

迫聖教起於耶路撒冷。嗣聖徒傳教於他方，多得猶太人之善待，容在會堂宣講，信從者亦復不少。然亦有久聞聖道，始知與伊教大相謬刺者，遂生怨恨，絕其往來，迭起逼迫陷害之事矣。聖徒又不肯與伊等結黨，違逆羅馬之權，故猶太人不但惡其背道，且恨其向敵也。耶穌後一百三十年，羅馬平滅猶太，猶太人散往四方。耶穌之徒始得脫其毒害，然有時猶煽惑異邦人，以相逼迫也。○按羅馬人所敬之神甚多，每年陳設盛筵，以行諸般祭神之禮，亦如希利尼人奉猶皮特神爲諸神之冠，其助人戰陣之神曰瑪爾斯。因羅馬人性好戰爭，尤爲熱心崇奉。於正月內有數日獻祭設筵饗會，備極豐盛。至於春耕秋收等事，各有所司之神，且家各有壇以奉其先祖。國中有巫祝之官，職司占驗，其預卜吉凶之法，或以電影雷聲，或以鳥飛獸走，或因神雞之飲食，或因人身之舉動，無論軍國大事，以及建築出行等細故，必問巫祝而後行。因愚民信其妄誕，任斯職者，遂大有權榮也。迨羅馬易民主爲君主之時，乃更興謬道，而以皇帝爲神，於各省建造華美生祠，內立皇帝之像，派祭司以豐盛禮儀敬拜之。論羅馬諸屬，各有所敬之神，至以皇帝爲神，則通行於諸屬，倘有不忠信敬

以聖教爲
國家之敵

天國終必
盛興

拜者、便指爲違逆之民也。初羅馬攻克各屬、視其祭神之禮、與本國之祭神無所妨害、故聽其各從舊俗、惟聖教所講專敬獨一眞神、眞神之外概斥爲非、所以羅馬尊長視聖教之人爲國家之敵、且聖教之拜主、無壇廟犧牲、又無祭司、羅馬人乃鄙之爲無神之人、耶穌之徒、又不願爲官從軍、干預國政、更不與外教人飲食宴樂、恐沾其習染、而外教人乃斥爲驕妄不近人情、又因直指異邦各教之謬、所以各教之人、羣爲聖教之敵也。更有祭司術士樂工、以及塑像造龕之人、特恐聖教盛興、伊等失業、故皆併力苦相阻撓、門徒當受迫之時、不肯略其拜主之禮、或在靜室、或於深夜、仍然聚會、其仇敵乃誣爲宴飲淫樂、並以諸多不法之事、肆行污涅、嗚呼、以聖教之清潔、有益於人、因外教人誤認爲非、而有此多般之阻隔也。

第四章論耶穌後百年中聖教廣傳之事

耶穌降臨、蓋欲立天國於世、且明言此國終必盛興、充乎四極、如一種可成大樹、微醕而發全團也。然而猶太人以僞基督目之、以爲耶穌死、其教必隨之冥沒矣。不料三日後聖徒宣傳其復活、至五旬節聚集之時、聖靈降於其間、聖徒大受感動、卽說

猶太人攔阻聖教

聖教廣傳

各國方言彼得與諸聖徒起言於衆曰耶穌被害今已復活爾曹宜悔改以信其名必能得救於是同日受洗者三千人自此歸教者日衆聖徒又奉耶穌之名作種種奇事以證此道爲眞猶太人見之遂設法攔阻或召彼得約翰於公會以威脅之下諸使徒於獄然主啓獄門而放之出仍復宣講不輟其後興起極重之逼迫司提反首先爲道捐軀有少年人掃羅尤竭力逼迫甚至入門徒之家驅其男婦於獄然聖徒因此逼迫散往四方仍熱心傳教引掖多人蓋聖道若火之始然風愈吹而火愈熾也腓力宣教於撒馬利亞男婦歸教者甚衆後有挨提阿伯之太監自聖城拜主而回腓力默受聖靈過之於路遂與之講道施洗腓力又宣教於各城直至該撒利亞更有諸聖徒分傳於腓尼基居比路安提阿等處彼得則遊歷各城有羅馬千夫長哥尼流欲聞眞道遣人邀彼得至該撒利亞宣講彼得受主默示不使輕視異邦之人卽隨使者至哥尼流之家對其妻孥親友講永生之道爾時聖靈大降感動聽道諸人彼得仰體主意不令其必受割禮卽與施洗此聖教發軔於異邦之初也耶路撒冷教會中多有聞此事而不悅者及彼得旋歸對衆述其異象並言宣講之

保羅歸心
聖教

保羅宣道

初次宣道
於遠方

時異邦人所受聖靈與猶太人無異教中人聞之乃不加指摘羣欣然頌主引異邦人與猶太人同得救也○夫傳教於異邦固彼得啟其端然於異邦建教會之基者其功乃在於保羅按保羅材志學術超凡幼時習法利賽人之道成人時盡力逼迫聖教迨耶穌自天顯現乃變易厥志竭其才力以建立耶穌教會蓋保羅確見猶太教乃聖教之先導若徒靠其虛文必不能引異邦人歸主也又實知各國之人遠離眞主如人之病入膏肓並無良醫可以療治也稽其先時保羅亦惟恃善行遵主律以望得救耳今始悟前非知人在主前絕無行善之功所以勸勉世人棄其恃功之心專賴耶穌贖罪之功按保羅旣信耶穌隱居於亞拉伯者三年乃回大馬色宣道因猶太人欲戕其命遂乘夜縋城而出往耶路撒冷仍放膽宣講而在此之猶太人亦欲戕害保羅乃潛回故里大數城後因巴拿巴尋求卽偕往安提阿時此城已有異邦人歸教二人乃於此宣講一年之中而歸教者益衆矣○其後二人被聖靈所感同往遠方先泛海至居比路保羅斥責行邪術阻聖道之巴耶穌使之暫爲瞽目羅馬方伯士求保羅因聽所講之眞道又見所行之奇事遂信而歸教焉二人渡海

傳教於小亞西亞之數處大城。在彼西底之安提阿。入猶太會堂。保羅講耶穌如何受死。如何復活。人當如何奉其名。以望得救。猶太人與異邦人聽而信從者甚衆。然有不信之猶太人。激動百姓。以阻撓之。遂逐二人於城外。於是往以哥念。仍宣聖道。又有不信之猶太人。聳動。欲以石擊之。乃逃往路士得。保羅奉耶穌之名。使跛者能行。衆人大相傳頌。欲以敬神之禮敬拜之。二人極力勸阻。乃止。其後有怙惡之猶太人。來自安提阿。以哥念。慫恿此城百姓。以石擊保羅。幾死。自此二人傳教於特比。信從者亦衆。其後同歸安提阿。凡先時立教會之各城。徧道蒞臨。以固門徒之心。又立長老。以司教事。此保羅初次傳教異邦。在耶穌後四十六年。二人回安提阿以後。有教中之猶太人。來自耶路撒冷者。起浮言。以惑衆云。異邦人入教。若不受摩西所傳之割禮。必不能得救。二人極力辯駁。且多方開諭之。教會令二人往耶路撒冷。與彼處之使徒長老會議此事。乃議定。異邦入教者。不令受割禮。遂派猶大西拉。隨二人至安提阿。並寄函諸教友。勸其勉爲清潔。但當於猶太人所厭惡者防之而已。○踰二年。保羅復同西拉出外宣教。先至敘利亞。基利家之諸城。堅固門徒之心。復往弗呂家。加拉太二處。游歷衆城。

於腓立比
驅除邪鬼

宣講於雅
典

宣講於歌
林多

引多人歸教。保羅於路士得擇少年門徒提摩太爲同伴。其後深得其襄助。遂爲腹心之侶也。行至特羅亞時。保羅得主默示。命其渡海至馬其頓之地。於是偕同行之人。先至腓立比。因城內無猶太會堂。乃宣講於城外祈禱之處。歸教者數人。城內有婢女爲邪鬼所附。妄談未來。其主人等因而獲利。及保羅諸人入城。此女隨而大呼曰。此上主之僕。宣救世之道者也。至保羅奉耶穌之名驅除此鬼。其主人等見絕其獲利之望。卽捉保羅西拉於官。官長鞭之。復下於獄。至夜半二人歌詩祈禱。地忽震動。獄門盡開。禁卒大驚。然囚犯無一逃脫者。遂信道而全家受洗焉。官長因保羅自言爲羅馬人。乃恐懼而親往釋之。於是二人往帖撒羅尼迦入猶太會堂宣講。信從者頗衆。因有不信之猶太人聳動。遂逃於比哩亞。伊處之猶太人頗悅納之。奈有帖撒羅尼迦之猶太人前往比哩亞聳動。保羅又逃於雅典。或於會堂。或於街市。仍然宣講。有希利尼之士人携保羅至亞略巴古之地。保羅乃明講眞主救主。與死人復活之道。雖有數人信從。而譏誚者甚衆。緣此城士人多存自智自善之心。是以聖教未得興盛也。保羅自雅典往歌林多。此城之猶太希利尼諸人信道者甚衆。然有不

三次宣教
於遠方

於以弗所
歸教者甚衆

前往耶路
撒冷

信之猶太人執保羅於羅馬方伯之前方伯識其情由逐猶太人於署外於是希利
尼人捉管會堂之猶太人毆之方伯亦不理問此後保羅至以弗所宣講又至耶路
撒冷問教會之安卽仍復安提阿矣此保羅二次出外傳教自耶穌後四十九年至五十三年○未幾保羅復傳教於外
周歷加拉太弗呂家之教會以固門徒之心後至以弗所城遇門徒數人曾受約翰
洗禮者保羅與之細論耶穌之道乃奉耶穌之名受洗焉於是聖靈大降皆能說各
國方言保羅居以弗所二年宣揚聖道又作種種奇蹟以證之近悅遠來歸教者甚
衆並有素行邪術之人因受感化將邪書對衆焚燒有底米丟者製造亞底米銀龕
之匠也恐聖教振興已失其業乃集其同事聳動愚民齊擁至戲園大相擾亂有文
職前往彈壓以婉言勸慰之乃散保羅遂往馬其頓歷諸教會以訓門徒後至希利
尼宣教復自希利尼回亞西亞遂沿海往耶路撒冷行至米利都囑以弗所之長老
勸其殷勤事主牧養教會及至該撒利亞有先知亞佳布欲阻其行言若至耶路撒
冷必被猶太人捉獲付與異邦人之手保羅以此行合主意旨不肯惜身而易志遂
不從其勸及至耶路撒冷對教中人述其傳教之事主如何假其手開導異邦人之

入聖殿遇
變

解送該
擲

心歸入聖教諸門徒聞之遂歡欣頌讚歸榮於上主也

此保羅三次出外傳教自耶
穌後五十四年至五十八年

○保羅

入聖殿行潔淨之禮猶太人聳動百姓誣其携希利尼人同入污穢聖所遂捉保羅而擁於殿外將殺之有羅馬之千夫長率兵往救保羅以手示意使衆鎮靜乃歷述先曾迫害聖教以至信耶穌傳道之事言未及終百姓愈加忿怒勢必翦滅而後已賴軍士護救帶於營內次日千夫長召集猶太尊長查訊保羅見會中諸人半爲法利賽人半爲撒都該人遂大聲言曰吾今日之受審判乃因望死人復活也兩教人聞之即大起爭論千夫長派軍士救護保羅仍羈於營其後有四十猶太人暗謀誓必殺害因所謀敗露千夫長即派隊伍送保羅於該撒利亞數日後猶太尊長踵至仍控於方伯非力斯台前誣其擾亂天下污穢聖殿保羅一一分訴非力斯識破情由故意耽延不加斷定踰數日非力斯與妻同坐於堂召保羅至使講耶穌之道保羅即放膽宣講公義節制與死後審判非力斯聞之遂激發天良不覺惶恐奈仍存私念曰汝姑退容日再議也保羅在獄二年非斯都接非力斯之任猶太人又於非斯都台前誣告並求非斯都解保羅於耶路撒冷審判焉保羅識其惡意言但當立

於亞基帕
前陳訴

解至羅馬

於羅馬遇
害

多結聖道
之果

於該撒公堂聽其判斷。一日亞基帕王偕其妹望候非斯都非斯都因未得保羅實據，卽召至衆前，使之自爲陳訴。保羅遂自述其信奉耶穌，諸處宣道，以及被誣等情，並勸諸人信靠耶穌，以望得救。亞基帕曰：汝以此相勸，幾使我作基督門徒矣。其後非斯都派百夫長解囚犯於羅馬，保羅與焉。至每拉海口，更換往義大利之亞力山大船，因誤泛海之期，遂遭連日大風，將船損壞，飄至米利大島。衆人棄船登岸，踰三月始至羅馬。羅馬官吏相待甚善，聽其賃屋而居。凡來聽道者，保羅卽殷勤宣講，如是二年，以致多人信從焉。自耶穌後五十八年至六十二年 ○使徒行傳載保羅之事止此，其後數年之事，吾儕但憑其晚年書信與教會傳言，參互考證，可略知大概焉。按教會傳言，保羅於被釋後，卽往西班牙宣教，酬夙志也。又周歷羅馬東方教會，當尼柔帝逼迫聖教之時，於小亞西亞被獲，解至羅馬遇害。約在耶穌後六十八年 ○論保羅志念肫誠，將己之大德全才委致於主，以聽其意旨，且殷勤以盡己分，雖遇危險，仍勇往直前，毫無畏避，其所立教會，自小亞西亞馬其頓希利尼以至羅馬京都，蓋因主重其委任，使結聖道之果，較他使徒爲尤多也。然保羅不但建教會之基，其所寫之書，皆足闡發聖道之

蘊以示人當守之禮當盡之分堪使當年教中人增其智而堅其德卽百代下之讀其書者何啻親見其人躬聆其訓哉按其二次出外傳教在歌林多寫出帖撒羅尼迦前後二書其前書勸勉教中人殷勤事主堅忍外教之逼迫其後書多警戒教中人莫染盼基督速降之謬以悞己分其三次出外傳教在以弗所聞有擾亂加拉太教會者逼令入教之異邦人守猶太舊規卽寫書辯駁使異邦歸教者脫離猶太教之虛文但誠心事主而已又聞歌林多教會有分門結黨之事遂寫歌林多前書勸其一志同心作爲清潔以歸救主其後在馬其頓寫歌林多後書大概勸勵其行堅固其心未幾親往歌林多寫羅馬書發明因信稱義之奧旨於羅馬城初次被囚寫以弗所書講明猶太人與異邦人因信靠耶穌便能合一並勸其於事主待人之分毋稍怠緩又寫哥羅西書勉其堅守聖道以防異端又寫腓立比書勸勉教中人同心事主以作謙卑熱心之門徒又寫書與腓力門勸其收回舊僕視若同胞自羅馬被釋後乃往馬其頓時提摩太宣教以弗所提多宣教革哩底卽寫提摩太前書與提多書勉其牧養教會以盡厥職第二次在羅馬被囚於臨終時寫出提摩太後書

彼得宣教

約翰傳教

勸其防備異端、忠心事主。○按彼得宣教之事、自中年以後、聖經不載、吾儕但憑教會傳言、稍知其大略。大概以巴比倫爲中衡之區、傳教與散住波斯之猶太人、約耶穌後六十年、寫書寄小亞西亞之教會、勸其黜異端而守眞道、又寫書達諸處教會、勸其緊防邪教、勉爲清潔、並指明審判之事、以相警戒。後往羅馬、宣教亦爲尼柔所害。約在耶穌後六十八年論彼得性情剛果、因而遇事急切、當耶穌在世之時、每蹈愆尤、然自中

年以後、屢經磨礪、並受聖靈、遂爲智勇忠義之聖徒、堪稱教會棟樑矣。○約翰乃耶穌最愛之門徒也、始宣教於耶路撒冷、繼偕彼得宣教於撒馬利亞、及中年以後、宣教於小亞西亞諸處、以以弗所爲中衡之區、當尼柔逼迫教會之時、被放於伊真海之拔摩島、於時得主默示、悉教會未來之兆、遂錄之於書、被釋之後、爲教中人寫約翰福音、載耶穌所行之事、所傳之道、多有他福音所未有者、蓋見之深、斯言之詳也。又寫書三緘、以事主愛人之道、勉勵教中諸人、論約翰清廉聖善、愛主愛人、尤能以耶穌之心爲心、且其言行相稱、足使代代教中人大有裨益也。按教會傳言、約翰年將期頤、艱於步履、常使人負至教會、謂之曰、諸小子當彼此相愛、或問公之教人何

只此一言、約翰曰、是已足矣、何多言乎、按當年教會之書、使徒雅各久居耶路撒冷、爲教會之首、因其謹守猶太教規、故猶太人雖疑忌聖教、卻重看雅各、然其明講人之得救、不在外儀、乃在信賴耶穌之內心、且言異邦入教者、不令守猶太儀文、曾寫書寄教中之猶太人、勉其爲忠信之徒、按保羅之書、多講人之得救、不在行而在心、雅各所講、人無善行、徒有信心、終屬無益、蓋善行乃信心之顯著也、迨猶太人恨惡聖教日甚、終勒令雅各使明言非耶穌之徒、而雅各反於衆中承認其名、猶太人大怒、遂擁至聖殿、自殿頂推墜、復以石擊之而死、

第五章論聖教受羅馬人之逼迫

聖教傳至羅馬、各省首先信從者、大概皆卑賤無學之人也、其尊長文學諸人、率視爲邪教、然不加逼迫者、以爲不久必然消滅耳、至耶穌後五十四年、尼柔繼羅馬帝位、初有良臣贊襄、少有虐政、及自掌國權、漸形殘忍、凡所疑忌恨惡者、皆斬之、國中無辜被害者、不可勝述、甚至其母、其妻、其弟、皆爲所害、其傳二人亦爲所害、故通國之人、莫不怨讟也、耶穌後六十四年、羅馬城中大火、延燒六晝夜、焚燬公所、民房無

上主護庇
教會

德行可法
者有四

數民間遂謠傳此火乃尼柔所舉欲觀火光悅目尼柔欲解百姓之惑乃誣此火爲聖教人所致卽用種種酷刑肆行殘害有釘於十字架者有擲餵野獸者有投入油鍋者有裹以油布或插木刺燃作夜燈者於是行知各省凡耶穌之徒多遭逼迫直至尼柔身亡乃止此後數十年少有迫害之事教會稍安矣按傳言羅馬皇帝豆米西安性多猜忌曾聞有大衛後裔將得國位而掌大權卽遣使至猶太捉耶穌之遠族年少者二人及訊問時見爲貧苦工作之人並聞其所立之國乃在於人心遂解其疑而釋之聖教因之得保無虞矣閱此百年中可知主於新立之教會暗加護庇雖遇迫害爲時不久門徒可隨意事主聚集禮拜其逼迫阻隔之事亦不過試鍊其心以別真僞耳當時門徒之德行昭著可爲後世法則者有四焉一則信心之固蓋深信上主之護庇引導耶穌實居教會之中聖靈感動人心以增其德者也二則期望之切諸聖徒常講耶穌復活卽吾人永生之據故於死後甚盼得永生之樂也三則愛心之大諸聖徒互相殷勤欸待毫無畛域之分以致外教人觀感而化歸入聖教也四則用財之公諸聖徒不惜資財供用教會周濟貧寒蓋以己產皆上主所賜固

當爲主用之也。

第六章論耶穌後百年教會中之職任

選立長老
執事

耶穌欲立教會於世，先擇門徒十二人立爲使徒，令其常侍左右，精聞真道，切觀奇事，爲將來宣傳聖道，得以親見親聞者爲主作證，而爲教會之基矣。按諸聖徒宣教於各處，數年後教中人數愈增，遂定教會之制，使徒乃選各會中之明智忠誠者立爲長老，亦名主教，其牧養教會領首聖餐，調停教事，此長老之職任也。又選立會吏，若周濟貧寒，看顧病苦，皆會吏之職任也。其中才辯忠誠者，亦能宣傳聖道，如士提反與腓力然。又有女會吏專以周濟看顧教中婦女爲事。看羅馬十章一節蓋聖教初傳於羅馬各會中，亦只自司其事，其所以聯合者，但信賴救主之心而已。迨後仿羅馬國政以定教制，漸立主教教相教皇等，始得合爲一統矣。

聖教史紀卷之二

第二世代教會屢遭迫害

自耶穌後一百年至三百十一年

第一章論耶穌後一百年至三百年聖教廣傳之事

嘗稽此二百年中，聖教雖廣傳於羅馬各省，以及他國，卻如醇在麪中，暗發全團，故其事蹟，少有書紀可考。前文已載耶穌後百年之內，教會立於猶太、小亞西亞、波斯、馬其頓、希利尼、義大利、西班牙諸處。迨耶穌後二百年內，又傳至馬玳、巴克提阿、帕提亞、亞拉伯諸處，又以伊及之亞力山大城爲中衡，傳至古利奈、並伊及原族之喀皮特人。至耶穌後三百年之間，聖教已興盛於喀頹基、茂利他尼亞、奴米地亞之地。亦有耶穌之徒，自小亞西亞，前往嚶辣，創立教會，再後又有自義大利往嚶辣傳教者。有聖徒代歐尼西烏者，建教會於巴利城。又有人漸傳於北，立教會於來印、多惱、二河之濱。此耶穌後二三百年之中，聖教廣傳之大略也。

第二章論自耶穌後一百年至三百年聖教受迫之事

羅馬皇帝他乍奴

自耶穌後九十八年至一百十七年在位

爲人公義，常以安靖國家爲事，曾降旨嚴禁各等

他乍奴之逼迫

聖教廣傳四方



私會其意蓋防患於未萌非爲逼迫聖教也然有恨惡教會者謂耶穌之徒皆非忠
心爲國之人遂視與私會一律羅馬大臣皮尼管理彼推尼潘土二省有投匿名呈
狀控告教會多人皮尼專摺具奏請旨辦理其摺內有云臣以嚴刑鞫問終未得其
顯明之罪但知伊等有定期聚會侵晨則歌詩頌讚奉耶穌爲神且立誓不爲惡事
至晚則集衆少有飲食而已然不肯獻祭於國神焚香於皇帝終屬違逆之民敗常
亂俗似宜定以死罪他乍奴覽奏稱其善而依其議並降旨曉諭國人云嗣後有得
此教實據者卽至官署呈告無須匿名必然按律擬罪按此旨雖阻挾私妄控之弊
而教中多人因之被告定罪在敘利亞猶太爲尤多耶路撒冷之教會主教西面乃
繼雅各之位者年百二十歲矣被人控告釘於十架臨刑時仍奉耶穌之名欣然就
死時在耶穌後
一百十年安提阿老主教伊那西烏被控於帝前帝親加訊問定以死罪擲與猛
獅吞食時在耶穌後
一百十六年赫地安皇帝繼位之初自耶穌後一百十七
年至一百三十八年諸處之邪神祭司每聳衆
迫令官長殺害聖教之人所以耶穌之徒不待定罪而被殺者不勝其數後有小亞
西亞之大臣嘎尼阿奴具奏云未定罪名肆行殺戮以逞愚民之心似非善政赫地

黑地安禁
阻誣告

猶太違叛
羅馬

安透尼奴
禁阻迫害

奧利利烏
之逼迫

安降旨云、人不可無故擾亂、若耶穌教人果有應得之罪、須按例呈告、亦準耶穌教人分訴、誣告者反坐之、此旨一出、教會於以稍安焉、當此帝在位時、有猶太人巴喀西巴者、假冒諸先知所預言之彌賽亞、自立爲王、率猶太人違叛羅馬、因耶穌之徒不肯附從、凡教會在猶太境內者、大加迫害、赫地安派大軍往討、惡戰數年、猶太人死者數十萬、至終巴喀西巴敗死、耶路撒冷城平毀、羅馬人乃於舊址建築新城、名之曰伊利亞、不許猶太人進入、從此猶太人散居四方、不復成國矣、然猶怨恨聖教、往往慫恿異邦人逼迫之、派烏安透尼奴皇帝在位、自耶穌後一百二十八年至一百六十一年小亞西亞迭次地震、邪神祭司云、此因人多離棄祭壇、干神之怒也、遂聳動百姓、欲殺害耶穌之徒、安透尼奴聞之、卽降旨曰、爾等何可將未經定罪之人、擅行殺害、倘有誘人離棄神壇者、諸神自有能力刑罰、何待爾等、豈諸神之自護其壇、反不如爾等熱心乎、自此終此帝之世、少有迫害之事也、奧利利烏馬可在位、自耶穌後一百六十年至一百八十年大有才能、多行善政、乃羅馬賢君也、惜其崇奉司多亞教、按此教多講人道、恃己才智、以修善德、奧利利烏重視羅馬希利尼先代聖賢、鄙耶穌之徒爲愚妄、乃下詔阻止、而極重之迫

害
怕利喀受

利安教會
所受之逼
迫

害遂由此起矣。按古書所載士每拿教會受迫之事，有小亞西亞之大臣派人搜索教會之人，或以鞭箠撻其背，或以鐵刺刺其身，迨自供離棄聖教，非耶穌之徒而後止。倘有至終不易其志者，卽擲與野獸吞噬。士每拿之老主教怕利喀使徒約翰之門人也，亦被捉至大臣之前，而大臣以婉言勸慰，令其離棄耶穌而咒詛之。怕利喀曰：予事耶穌八十有六年矣，彼未嘗以不善相待，予何能咒詛我王我救主乎？大臣曰：吾已備猛獸，汝不悔改，卽擲與食之。怕利喀曰：驅之來。吾耶穌之徒，早定志不改其善道也。大臣曰：汝輕視猛獸，吾將以火焚汝。怕利喀曰：爾以須臾將燼之火嚇我，殊不知地獄中已儲之永火，以待叛主之人也。大臣見怕利喀決不變易厥志，乃命縛於木椿，聚柴焚死。時南嚶辣利安城之教會甚爲興盛，此會乃主教哀替奴所創立也。按哀替奴生於士每拿城，爲怕利喀之門人。帝遣使至利安城，欲搜查教會而剿滅之，遂將教中諸人，或斬首，或擲餒猛獸，或囚禁獄中。哀替奴年九十餘矣，亦被捉獲，鞭之幾死，復囚禁之，竟斃於獄。有幼年女僕便地那被獲，始炙銅器烙其身，繼炙鐵椅使之坐，終則擲與野牛抵觸而死。便地那至死猶曰：吾乃耶穌之徒，吾教中

羅馬軍脫離重圍

色危入之逼迫

伊拉嘎巴路欲合諸教

未有不義者也。奧利利烏嘗親征北狄，全軍被困於山路，且乏水，正危急間，忽濃雲密布，大雨傾盆，並有電火焚燬敵營。羅馬兵乘機衝突，始得脫離重圍。按教會書所載，當時軍士中有數千奉教之人祈禱上主，蒙其救援也。奧利利烏遂號奉耶穌之軍曰雷軍，而逼迫之事亦暫息矣。奧利利烏卒，其子堪莫督繼位。自耶穌後一百八十一年至一百九十二年荒淫無道，雖以聖教為邪，尚不加以逼迫，教會得少安焉。色替米烏色危入繼位。自耶穌後一百九十二年其初有善醫之僕，耶穌之徒也，故其善待聖教之人，後則漸生疑忌，降旨禁人入耶穌猶太二教，於是諸處教會之仇乘機迫害，而伊及與附近地中海之亞非利加為尤甚。喀頹基教會之被害者，有女徒培皮徒阿，世家女也，被告繫獄，並奪其乳抱之嬰，使不得撫育。其父乃外教人，入獄泣謂之曰：汝何不念爾之父母嬰兒，以離棄耶穌之道乎？女曰：吾固欲從父命得其歡心，尤欲從天父之命得其歡心也。後與女徒非利西他同解市曹，二人猶歌詩頌主，毫無恐懼。初則擲與野牛抵觸，幾死，後仍殺之。至喀利古拉為帝時，自耶穌後二百一十七年至二百一十八年猶有逼迫之事。嗣伊拉嘎巴路接位，自耶穌後二百一十八年至二百二十二年其初曾為太陽之祭司，故欲合諸教為一，自為教首，共祀太陽之

神、逼迫之事因而止矣。亞力山大色危入登位。自耶穌後二百二十一年至二百三十五年重視聖教、祀耶穌

與亞伯拉罕之像、列於羅馬明君聖賢之間。又勒金銘於石。即耶穌所言汝欲人如何待汝亦當如何待人之語也與

殿壁、及瑪西賣奴、弑色危入而奪其位。在位三年並殺教中主教與色危入為友者數人、

聖教又遭迫害矣。勾地阿奴。在位六年腓力。在位五年相繼接位。於時教會平安、迨地西烏弑

腓力而自立。在位二年果敢勤政、欲復先代之祀典、遂頒旨諸省、命各大臣迫令耶穌之

徒、棄其教而歸國教、自此教中人、或被鞭筆、或置死地、或逐國外、而籍其財產、其被

難諸人、多有教中首領、即羅馬主教法必烏亦遭其害焉。其逃往他處者、有喀頹基

主教西皮安、或責其背道。西皮安曰、耶穌曾言、人於此城迫汝、汝即逃往彼城、吾儕

逃避兇惡、非背耶穌之訓也。見馬太十章二十二節當受迫之時、耶穌之徒、固多有至死不渝者、

亦有畏懼刑罰、或焚香於國神、或賂官與以祀神之據、嗣後教會逐此輩於教外、以

其惜身畔道、不稱為耶穌之徒也。噶魯登位。在位二年國內屢有瘟疫饑荒、教會之仇、遂

謂此災、皆耶穌教人干神之怒所致也。故仍有逼迫、在喀頹基城瘟疫流行、死者相

繼、外教人兇懼、多將死者委於街市、因而傳染愈甚。耶穌之徒冒死收葬棄尸、瘟疫

地西烏之逼迫

懲治惜身畔道之人

非利來阿
奴之逼迫

代歐盛西
安分羅馬

遂止而外教恨惡之心亦因之稍息矣非利來阿奴繼位

在位五年

降旨逐教會之首領

於國外並禁教中之聚會拜主後又頒旨各省命官吏搜拿教中首領定以死罪國中祿位之人若信奉耶穌卽撤其任亦有因而受害者當時遭難之人有羅馬主教西克徒喀頹基主教西皮安並多有教中之男婦老幼被官長罰入官礦作工蓋欲苦其身心使之離棄聖教耳後非利來阿奴與波斯皇帝撒哀耳交戰敗績被擒逼迫之事乃止其子嘎利伊奴嗣位

自耶穌後二百五十九年至二百六十八年

下詔許教中人隨意拜主此後

四十年教會平安諸處大爲興盛也至代歐盛西安登位

自耶穌後二百八十四年至三百五年

才智兼優

欲整頓國事以復先代之權榮逾八年因國大政繁舉其友瑪西米安治理西方以堪司炭替烏爲副已則治理東方以嘎利利烏爲副雖分地而治卻以代歐盛西安爲首按代歐盛西安本非愛慕聖教因見先年逼迫之時多顯教中人勇於赴義使教會愈隆故不欲加以迫害奈嘎利利烏深惡聖教屢懇代歐盛西安降旨命奉聖教之軍士與外教軍士同獻祭於國神於是軍中之奉聖教者多離棄其伍焉未幾尼叩米地亞都城有祀國神之大筵百姓乘機聳動將城中之閭美會堂平毀有抄

教會大遭
逼迫

錄聖經存於堂內者，亦被焚燬。其後頒旨諸省，命官吏平堂焚書，嚴禁聚會。凡教中
之人，爲官者撤其職任，爲奴者不準收贖。從此則逼迫之事較先年爲更甚矣。於是
耶穌之徒，有擲與野獸者，有以火焚燒者，有縛石投海者，有釘於十字架者，有斷其手
足，或剋其二目者，種種殘酷之刑，實傷心而慘目。惟堪司炭替烏不肯行此殘暴，其
所屬之嘎辣西班牙，比探三省，教會尙爲平靜。至終嘎利利烏，身患異症，覺爲上主
之罰，乃降旨，任教中人隨意拜主，並求教中人以護國庇身者，轉祈上主焉。觀此三
百年間，教會雖遭重迫，終蒙上主垂佑，使耶穌之徒堅心忍受，熱心宣傳，所以聖教
大爲興盛也。

第三章論此三百年中外教人以文字攔阻之事

自耶穌後百餘年來，聖教雖傳遍羅馬諸省，而文學之士，或鄙之不屑置論，或忽之
未察其詳，故未有著書辯駁者。至他乍奴在位時，有他西圖與皮尼所著之文字，內
言聖教之道，妄誕惑民，按其所言，可知伊等並未考查眞理，亦未悉教中之行，但
以毀謗教會之言，盡錄於書耳。約在耶穌後一百五十年，有色勒俗者，著書辯論，按

其書始則託爲猶太人之言，誣聖母馬利亞有淫行，論奉耶穌爲神者爲乖謬，並斥耶穌復活升天爲僭妄，其後則自立臆論云：耶穌教與猶太教同一謬誤也。然猶互相爭論，試按其所爭之由，不過爲一驢頭之影耳。又云：上主旣先知世事，又何待降生，且舍尊榮而爲卑賤，神必不出此也。又云：主之視人，亦如猿猴蠅蚋之類耳。又何暇勞其心力，特加顧恤哉？又以聖教傳於愚賤，則鄙之爲勞而無功，吾人有復生之望，則譏之爲蠢蟲之癡想。又嗤耶穌之徒爲愚魯頑梗之輩，以其多爲奴作苦之人，並諸婦女也。又謂耶穌幼在伊及曾習幻術，及長遂以此惑人，觀色勒俗所論可知。於聖教真理毫無體察，徒於筆墨之間，以洩其恨惡之心耳。其後有路西安者，才辯士也，素不信神，曾著書歷論國家祀神之非，以及各等頽風，並論耶穌之道與祀國神同其謬妄，以惑愚民。以耶穌與聖徒所行奇事爲幻術，以復生之望爲夢想，以爲道捐軀與彼此相愛爲愚誠。又託言有培利圭奴哀替武者，十惡五逆之人也，後至猶太，僞入耶穌教會，因其靈巧，教中人奉若神明，受迫時與教會多人同禁於獄，教中人因重其人，並憐其苦，大有饋贈，被釋後，因食邪神祭物，逐於教外，伊遂飄流諸

怕非利之
辯駁

處自苦身心，後遇焚葬者，投於火中而死，蓋捨身求名也。按留西安之意，欲形容耶穌之徒皆愚魯之輩，倘遇巧詐者，卽受其誑惑，不能分別真僞也。約耶穌後三百年，有著名道學之士怕非利，博聞強識，且深悉兩約聖經，著書數卷，辯駁聖道，以新舊兩約細爲核對，故尋其隙，以爲不相符合，又以但以理書預言耶穌之事，尤爲真切，遂謂此書乃耶穌後所作。又指保羅在安提阿規正彼得爲爭論，以顯保羅好啟紛爭，彼得有此過失，遂謂其道皆出於人心，非上主默感也。又指耶穌令其昆仲守節於聖城，已言不往，後暗往焉，遂謂其心無定見，不足爲門徒所奉之神也。見約翰七章八節十四節

代歐盛西安在位時，有大臣赫厄婁盛，先治理比推尼，後治理亞力山大，不但以刀劍迫害教會，並強逼教中處女，使人污辱之。又著爲文字，以耶穌與行邪術之替阿那人阿裏羅尼烏比較，云耶穌行些小奇事，門徒卽妄奉以爲神，阿裏羅尼烏行若大奇事，乃足稱爲諸神之友也。

第四章論耶穌後二三百年間教中人所著之文字以證真道

在耶穌後百年內，教中人從無著書證道者，但堅心持守，熱心宣傳而已。約耶穌後

誇德拉徒
寫書證道

遮司聽寫
書證道

一百三十年有誇德拉徒者或曰雅典主教也。曾寫書呈羅馬皇帝黑地安。惜此書淹沒至今無傳。吾人稍知其書中之意耳。有云昔耶穌所醫愈者與從死中救活者。予猶及親見數人焉。又有阿利司太氏。乃雅典道學士。歸入聖教者。亦曾寫書呈赫地安。其他猶有數人。著書證道。但其文字皆淹沒無存。良可惜也。其後有學士遮司聽瑪特耳者。寫書呈皇帝安透奈奴派烏司。此書尚流傳至今焉。按其書乃設為與猶太人辯論之辭。猶太人曰。汝耶穌教本自吾教畔正道而入歧途者也。答曰。上主定猶太教之禮儀。非欲永存不朽也。乃為聖教之先導。以耶穌降臨為止耳。猶太人曰。汝耶穌出身微賤。無殊僕隸之流。後被釘於十架。不與諸先知預言彌賽亞之尊榮大不相侔乎。答曰。諸先知之預言。固有指其尊榮者。亦有指其謙卑苦難者。看詩篇五十三章且因其謙卑苦難。以立天國之基。正以顯其尊榮也。猶太人曰。按聖經。上主惟一。汝曹以耶穌為主。不與聖經大相謬刺乎。答曰。吾人亦謂上主惟一。若以上主之性論之。則有三位一體者焉。其理已隱見於舊約文字間矣。見創世記一章廿六節又二章廿二節又十八章一節又廿一

章十
二節

遮司聽又指諸先知預言之彌賽亞皆應於耶穌。以見誠為猶太人所望之救

阿替那勾
拉寫書辯
道

益門特著
書論道

主以賽亞預言彌賽亞生於童貞女

見七章十四節

米加預言彌賽亞降生於伯利恒

見五章一節

何

西亞預言逃避於伊及

十一節

以賽亞預言約翰爲耶穌之前導

十一至十七節

又預言所行

之奇事

三十五章五節

以賽亞與詩篇預言被釘於十架

以賽亞五十三章詩篇廿二篇

有阿替那勾拉者雅典道

學士也先曾辯駁聖道厥後查核聖經欲摘疵瑕排擊之却得其真詮遂信道而歸

教焉乃寫書呈皇帝奧利利烏馬可書內有辯論外教人以聖教爲無神之人云吾

儕不敬拜人手所造之神耳其所敬拜者乃造天地萬物活潑之神也其辯論外教

人妄造聖教種種惡跡云此皆教會之仇肆其忌恨之心以污吾清潔之教也又辯

論外教人以聖教身魂復生爲謬云此道雖覺奧祕吾人斷不可棄置若以上主之

恩慈智能思之可信必有其事矣有亞力山大盛門特者

約生於耶穌後一百六十年

道學文藝卓越

一時又周歷諸國多得良師指教誠當代俊傑也在亞力山大城聞道歸教其後多

著書籍以發明眞理按其書以聖教與諸外教比較以見外教祀神之理率虛浮妄

誕誘惑愚民惟聖教拜主乃誠樸而引人於正也又論聖教如何以眞道教養人心

以耶穌爲萬世之師能引人入於善道以至得救也又深責當時驕奢淫佚之事勸

特利安
著書論道

賣努西烏
著書論道

教中人勉於節儉清貞也。有喀頹基人特利安者，約生於耶穌後一百六十年淹博士也。少年時同流合污，放縱情慾，厥後歸入聖教，熱心宣講，大顯辯才。歷指當時之弊，欲以挽回人心。又著書證道，有勸外教人辯駁聖道者曰：汝須細核吾道，得其情實，辯論尙未遲也。倘於吾道漠不加察，而妄肆譏評，不顯出於怨恨之心乎？又曰：人生於世，須本良心拜神，尙在上位者，以人所不願尊奉之神，強使敬拜，豈非逆天理而害彝德乎？按特利安不但講明外教之弊，並指教中人背聖經而附流俗之弊，其意固欲竭力以正人心也。奈持論太嚴，遂入瞞他奴之別脈。看第七段伊言吾人當受迫時，但宜以身殉道，或有逃避，卽爲背主。又言人若因罪出教，不可再加收錄，按其文字，本出火熱之心，大能感動世人，然其間損益參半，不可不細爲別擇也。賣努西烏非力斯亞非利加人也，約於耶穌後二百二十年歸教，大有辯才，以問答體著書，託爲門徒阿他危烏與外教人西利烏辯論聖教與外教之是非，按此書多以外教淫蕩之行，與教中廉潔之行，參觀互證，以顯聖道有管束人心之權。有云：汝等有科姦之律，暗中仍犯邪淫，汝等刑罪於彰著，吾儕防罪於隱微，汝等畏罪惡之顯明，吾儕恐良心之

阿利金才
優學博

聲名昭著

責備汝之牢獄充滿，卻無吾教之人。吾儕爲道甘受拷掠死亡，倘無上主扶持，何能若是之勇於赴義？伊時教會常遇迫害，教中讀是書者，甚得其安慰堅固也。亞力山

大人阿利金

生于耶穌後一百八十五年

其父利安伊大乃教中文學忠信之徒也，曾盡心訓子，欲其

通曉聖經，以及各種學術。阿利金於年幼時，才智已遠邁同儕，不但才優學博，更欲尋求聖道，身體力行也。當色危入逼迫教會之時，其父與教中人羈押滿獄，阿利金挺身赴難，誓欲相從，其母力阻乃止，因寄書於其父曰：父不可以吾母與諸子女之故，不終認耶穌也。其後利安伊大被斬於市，財產籍沒，阿利金與其母並其弟五人窮無所歸，但以教讀餬口，乘暇讀書，是以文學辯才與嗜道之心日進，而聲名大爲昭著矣。惜誤會耶穌之言自行閹割，看馬太十章十二蓋欲潔己行而防人口，後雖悔悟，已無及矣。論其素行不受饋贈，不重衣，赤足，戒酒，節食，寢於地，夜眠時少，多半讀書，或祈禱，因其名重一時，遠近就而聽道者相踵接，外教諸人聆其講論感動，歸教者不可勝數。亞力山大主教德米替烏妬嫉之，招集議會察勘阿利金之弊，遂指其自閹之過，與所講有不合聖經者數條，卽出其教，不許其宣講。阿利金乃退居該撒利亞，創

著書甚多

諸書之效

立書院、講論聖道、與理學之要、遐邇之人聞風趨就、不數年聲名遠越乎亞力山大矣、在地西烏逼迫教會之時、被囚於獄、備極拷掠、不但不改其素志、且以語言文字堅固門徒之心、及被釋、因積苦成疾、不久而卒、按阿利金著書甚多、或註釋聖經、或訓勉門徒、或闡發真道、或辯駁外教、內有答色勒俗之書、以顯其指斥聖教者、皆爲虛妄、又多引實據以證聖道、並教會實爲上主所立、書內又云、吾教日見振興、非恃人之權力也、乃以真道感化人心耳、且自皇帝以至大臣祭司士庶迫害吾教者多矣、而教會依然無恙、非上主之庇護何能若是哉、代歐盛西安在位時、有亞非利加人阿耨比烏者、因外教訕謗聖教、著書以辯其妄、又引據證聖道爲真、耶穌爲神、論此二百年間、教中人著書證道、足有可徵之效焉、一其文字傳揚四方、聖教亦因之遠播、一外教之讀其書者、大半解疑釋憾、引多人歸教、若教中之人、則多能通曉道中微妙、堅固其信心、增益其善德、其效爲尤大也、然著書諸人、雖皆文學忠信之徒、有醞不能無疵、由此漸啟旁門、引多人離正道而入歧途矣、

第五章論耶穌後二三百年內教會中之職任

教制相時
制宜

長老之職
漸分

主教之稱
漸尊

創論主教
承繼使徒

前於第二章已載教會有專責者，但有二等，一曰長老，亦稱主教，一曰會吏。蓋耶穌立教會於世，其於教中職任，拜主儀文，非欲膠執無所變通也。特欲後世門徒，因世代之變遷，各國之禮俗，相時制宜耳。在耶穌後百年內，諸教會雖各司其事，因信道之心互相聯絡，遂合爲一致矣。且教會於羅馬振興，因仿羅馬國制，所以教中有職任者，其位漸尊，而其權亦漸大。若長老亦稱主教者，本以治理教會，宣傳聖道爲專責。厥後二事漸分，因宣傳聖道者多有才辯文學，爲教中人所推重，其榮權遂駕乎治理教會者之上。於是離棄俗務，專以宣傳牧養爲事，特制服飾以表異之。食教中之餼，多有不娶，幾與先年猶太教之祭司無所區別矣。復思聖教振興於羅馬，先萌蘖於通都大邑，若安提阿、以弗所、歌林多、羅馬、京都、亞力山大、喀賴基者，久之漸傳於四處，各立教會。然新立之教會，皆推本教會爲首，新教會之首領，亦以本教會之首領爲尊。凡有聚會議會，必以上位讓之，多從其意旨。於是其權榮漸增，而主教之稱遂專歸於本教會首領矣。在耶穌後一二百年內，教中舉用人員，大概各教會自爲遴選，厥後此權亦漸歸於主教。按主教之權既如此增重，而教會中更創臆論，謂

主教有上下之分

三主教互爭權位

創論羅馬主教承襲彼得

主教之位，乃承繼使徒。當日耶穌賜聖靈於使徒，使徒傳於主教，蓋欲代代相承，藉主教常留聖靈於教會中也。所以教中人奉主教爲教會之基，其言爲律，其身爲聖，而其日用飲食，多紛華靡麗，無異鼎食之家矣。○其後聖教之傳愈廣，而主教之職愈多，遂有上下之分焉。以大邑之主教爲上，小邑之主教爲下，每有聚會議會，必推大主教爲首，尊爲教長，於是通省之權漸歸其手。伊時羅馬主教治理中下義大利之教會，安提阿主教治理敘利亞教會，亞力山大主教治理伊及教會，故此三處之主教，其勢尤大，而互爭權位者，百有餘年。其後羅馬之勢漸強，一因羅馬爲通國京都，一因羅馬教會，自使徒時已爲興盛，一因保羅彼得皆於此遇害，一因受迫時，羅馬教中人大顯忠心，且羅馬教會中更創臆論，謂耶穌立彼得爲教會之基。見馬太十章十八九節彼得乃羅馬主教之首，於是代代相傳，凡在羅馬爲主教者，皆承襲彼得之正統也。因之羅馬主教，羣尊爲耶穌之相，其權榮遂莫之與京矣。

第六章論耶穌後二三百年內懲治背道者之規

嘗思耶穌降生，固欲立清潔之教會於世也。其後使徒與歷代宣教之人，莫不竭盡

使徒立懲
治背道者
之法

收錄之例
寬嚴無定

再求歸教
者須歷四
階

心力勸人悔改必深悉其堅心慕道滌舊染而作新人始行收入聖教考使徒行傳有亞拏尼亞者與其妻撒非喇鬻其田產按當年教規捐入教會奈其隱匿數分彼得以正言責之夫妻皆扑地而死此蓋上主顯其權能以懲其背道恐日後欺詐者混入教會也保羅命歌林多教會逐教中有淫行者於教外見歌林多前書五章一至八節其寄提摩太書云子曾將許米乃亞力山大交於撒但蓋言出其教也見提摩太前書一章二十節耶穌後二三百年間各教會首領皆以使徒爲則於教中背道之人莫不盡心辦理若姦盜兇殺邪說以及受迫之時不認耶穌必逐於教外設有日後悔改仍求收錄者當時原無定例或寬或嚴惟各教會所自定厥後歸教者愈衆背道者愈多遂嚴定收錄之律以示懲按此定例此等人須甘澹泊苦身心數年之久多認罪禁食祈禱周濟與行諸多善事當時教中人或以爲此等善功可於主前掩蓋其惡不知正使人忘記贖罪完全之功且以開異日羅馬教自恃善功之弊也按當年負罪悔改再求歸教之人須歷四階始獲赦免初曰哭者服喪服哀哭匍匐於會堂之前求教中人再加收錄也次曰聽者蓋許其於會堂中聽所讀之經所講之道也又次曰跪者蓋許其於祈

太嚴太
各有所失

禱會中跪聽他人祈禱也。又次曰立者，蓋許其於公同禮拜之時，立於會中隨大眾禮拜也。既歷此四階，復對衆認罪，首領按手其頭，奉主名赦宥之。諸教友皆與接吻，爲昆仲如初，始得領受聖餐，仍爲教中人矣。按此事當時所論不同，在亞非利加西班牙教會，謂此等人不可再加收錄，倘容納焉，非正其罪，乃助其罪。又恐其惡名玷辱清潔教會也。在羅馬伊及與東方教會，謂人之犯罪，無論輕重，倘有悔改確據，即可收錄。不然，豈非靳主之恩，驅斯人於絕地乎？細核二論，皆有所失。一則失之太嚴，萬人得救之門，耶穌啟之，若人閉之矣。一則失之太寬，以干禮犯義之事輕忽視之，遂使教會中人漸入流俗習染矣。

第七章論耶穌後二三百年內教會所守之規條

猶太人以七日爲期，奉爲聖日，是日歇業禮拜，蓋記念上主造萬物已畢，七日安息也。然耶穌復生於拜一日，諸聖徒故奉此日爲歡欣冀望之日，踰七禮拜值五旬節，又於拜一日，聖靈大降，啟迪多人，使教會興盛，故教中人皆奉拜一日爲聖。然猶太入教者，兼守七日舊例，厥後異邦之教中人，漸棄此例，專奉拜一日爲聖矣。教中人

遵守逾越節

遵守五旬節

保存殉道者之骸骨

禮拜於門徒之家

又遵守逾越節，蓋記念耶穌復活也。按入教之猶太人，與小亞西亞入教之異邦人，皆循猶太舊規，遵守逾越節。自耶穌遇害之日，禁食祈禱，越三日，至耶穌復生之日，設筵歡樂。他處入教者，不守逾越之筵，但於耶穌復生之日，先領聖餐，然後大眾宴樂耳。教中人又遵守五旬節，蓋記念聖靈普降也。其後漸起新規，自逾越至五旬，於此七禮拜中，常設筵宴樂，亦記念耶穌復生之事也。厥後各教會多有爲道捐軀之人，於是又起新規，教中人於本教會有遇害者，每年於其遇害之日，偕往其墓，首領備述其爲主所遭之患難，又祈主勉人，蓋欲教中人以斯人爲法，忠心事主也。其意固未爲不善，奈行久弊生，使人將專於事主之心，漸分於已死之人矣。按阿利金所講聖徒殉道之功，類於耶穌贖罪之功，特特利安所講，凡教中人死後，須經歷陰曹，方得上升，惟爲道捐軀者，能直入天堂也。士每拿教會保存怕利喀之骸骨，珍重甚於金珠。安提阿教會之於伊那西烏，喀賴基教會之於西皮安，並有多處教會，其保存殉道者之骸骨，大都如此。○耶穌後一二百年間，教中人聚會禮拜，大概於門徒之家，不建造會堂，恐遭外教人怨惡迫害也。羅馬城外多有人於地中磐石間鑿爲

當年禮拜
之規

隧道又於隧道左右鑿洞如列屋以葬死者教會當受迫之時耶穌之徒每聚會禮拜於此至耶穌後三百年間教中人數增多乃乘逼迫止息之時建築會堂凡堂中之陳列禁止各類人物之像以防漸染教外之弊不使教中心入於邪也論當年禮拜之規先有人讀聖經一段次則首領率衆祈禱又次則大衆立而默禱又次則彼此接吻以表親愛之心其間則間或歌詩頌讚終則首領復率衆祈禱同領聖餐也
有望教者先錄名於冊須受教二三年見其明曉聖經有事主之誠心首領乃與之施洗始爲教中人矣論與嬰孩施洗因聖經無此明文故諸教會之規不同或思聖教廢割禮而易洗禮洗禮正所以代割禮也當使徒時亦必與嬰孩施洗此禮乃漸行於通教會矣

第八章論耶穌後二三百年內自聖教所啟之旁門

自耶路撒冷平滅後有歸教之猶太人仍守猶太舊規稱爲拿撒勒門在敘利亞相延二三百
年因其泥於虛文與異邦入教者日見乖離漸卽滅沒矣○約耶穌後一
百年有伊必安乃窮苦之意門興起於猶太小亞西亞居比路等處相傳約三百年之久按

伊必安門

其所講謂耶穌乃約瑟之血脉有人性而無神性爲主之大先知如摩西大衛者也。又謂人當遵守割禮與摩西之律方能得救又指保羅爲背道之人凡其所講之道所寫之書概斥爲邪說又謂耶穌不久必再降生立權榮之國於耶路撒冷約耶穌後二百五十年有此門之無名氏著書數卷托羅馬主教盛門特之名按此書言盛門特乃羅馬皇帝親族因其惡國俗而求真理乃往猶太聽彼得宣講信而受洗焉厥後從彼得宣教於外曾於該撒利亞聞彼得與術士西面辯論之辭錄之於書又云亞當以諾挪亞亞伯拉罕以撒雅各摩西耶穌皆爲世界之柱石自以諾而下皆亞當後身亞當乃主之眞先知也若聖經所載亞當方命挪亞醉酒摩西殺人亞伯拉罕娶妾皆撒但捏造之辭混入聖經耳又云上主將萬物區分兩途有光必有暗有天必有地有生必有死有亞當爲眞先知有夏娃爲假先知有亞伯爲善人有該隱爲惡人至終善者升天惡者滅沒莫不有對待之勢也按此書多訓人禁食齋戒苦身修德又論耶穌之弟雅各乃教會之首彼得次之盛門特乃承接彼得之位者也○耶穌後百年內興起一門名曰耨司乃智慧之意在二百年內振興於羅馬通國三百

釋司門之由

志廣心高
窮微索隱

論上主

論造世界

年內漸卽衰微四百年內遂盡滅沒矣。溯釋司門之由，自羅馬併諸國而後，四通八達，彼此往來，故文學之人多知各國之道。聖教亦乘勢振興，宣講上主惟一，世人負罪，耶穌救人，死後之報諸大端，因此人心更加變動，固有棄舊教歸入聖教者，又有人視聖教未爲全美，遂定集腋成裘之謀，乃於普拉透搜羅亞司特釋迦耶穌諸教，擇其愜乎己意者，合爲一教，卽釋司門也。按此門之人，志廣心高，窮微索隱，欲將萬物之盈虛消長，洞悉無遺，其所論之理，雖皆出於臆斷，尙自謂受於歷代聖賢之傳，明哲者盡悉其微，愚魯者不能曉其秘也。其讀聖經之法，合其意者取之，不合者棄之，且不以文辭爲重，謂此中自有奧秘，吾人但當去膚存液而已。因而妄用心思，反生荒誕，失去眞道矣。其論上主也，謂尊榮之體，深居冥冥之中，有時眞精遠射，如日之發光，如火之散星，而廣生尊德，其德皆活潑之靈，愈近於主者愈尊，遞遠者亦遞卑，後有極卑之靈，墮於混沌之中，遂孕而生靈物，其質則半明半暗，是爲大匠，乃以混沌之氣造成世界，伊竟忘上主，自居爲至高至大之神，卽猶太人所敬之耶和華也。伊又於世界造人，區別三等，上爲靈明之人，其心之光勝於暗，次則光暗參半，下

論耶穌

論罪惡之
由

西面所立
之門

西仁徒所
立之門

則暗勝於光。若吾耨司者，特具靈明，有充實之智。若耶穌教者，徒有信心，並無充實之智。但爲次等。其他信邪神之人，爲昏暗所囿，實下愚之輩也。其論耶穌也，乃極尊之德。屈已降生，欲拯靈明之人，脫離昏氣之轄制。然光明之德，必不與濁暗之氣相聯。其受死受難，並非血肉之軀，實所幻之影像也。且其光明之道，昭著兩間，惟智者得之，乃能出迷途而入正路矣。按此門之人，以人之罪惡不由於心，皆由於身，故不操持其心，但煅鍊其身，其意蓋欲克盡肉體之慾，卽爲清潔之人，所以不恨罪由心致，惟恨上主所賜之頑軀，與世間美好之物，爲心靈之敵耳。○耨司之道，本造自人心，故其門中之人多炫異矜奇，獨出己見，於以分析多門，茲擇其門之大者畧言之。有撒馬利亞西面者，曾受洗於腓力，卽聖經所載，欲以銀賂彼得，買聖靈之權者也。看使徒行傳八章十八九節後於耨司教中，獨闢一門，相傳二百年之久。按西面之言曰：吾乃生發世界之陽靈也，稱其所私之妓赫利那曰：伊乃承受陽靈之陰靈也。因救昏暗之人，特降生於世耳。故其門下諸人，奉西面爲救世之大主。○有西仁徒者，於小亞西亞宣講耨司之道，謂創造世界者，非尊榮之神，乃卑微之神也。其論耶穌也，亦不過一血

肉之軀當受洗於約翰之時、有盛德下降、附於其身、使有極大智慧、並施行奇事之權、及被釘十架、盛德已離其體而上升矣、將來仍必降生、與復生之耶穌相合、立天國於世也、○有耨司教人傳道於伊及、稱爲敬蛇之門、按其所講、亞當原爲造世界之神耶和華所制、蛇乃顯現使脫其手、棄昏暗而入光明、故此門之人尊蛇爲救主、每當領受聖餐之日、將所篆之蛇、置於餅盤、使舐餅殆徧、然後教衆分食、食畢又接吻於蛇、以親愛之、按此門所講之道、大抵與聖經相反、顛倒是非、實屬刺謬之甚也、○約自耶穌後一百二十五年、至一百四十年、有亞力山大城之巴西利地者、耨司教著名人也、於耨司教中獨闢一門、約傳二三百之久、按其所講、其初尊榮之主、發生七德、咸爲活潑之靈、七靈又發生衆靈、衆靈乃創造諸天世界、並世間萬物、於是衆靈分權而治、其權之最大者、乃治理猶太之耶和華也、因伊有吞噬之心、欲將世界之權統歸於己、故尊榮之主、遣七德中最尊者降臨、附於拿撒勒人耶穌之體、欲拯救世人以遏耶和華之勢、其受難受死乃耶穌之身、非所附之德也、且耶穌受死、乃顯其忠心、原非爲人贖罪、蓋犯罪受刑、本上主之公義、豈他人所能代替哉、

法連廳所
立之門

瑪西安所
立之門

瑪尼教

按此門之人，多有縱欲妄爲，拘鬼神行邪術等事。○有著名之耨司教人，法連廳者，其門徒甚衆，約在耶穌後一百四十年，傳其教於羅馬京都。按其所講，其初尊榮之大主，發生陰陽之德十五偶，其最卑之陰德曰搜非亞，因懷邪念於大主，乃被謫而墮諸混沌之中，遂生靈物甚衆，內一靈物，創造世界，並其中萬物，厥後一尊德降臨，幻爲人形，蓋欲拯漂泊之搜非亞，使復其位，並救靈明之人，脫昏暗束縛，上升而近於大主也。此尊德非他，卽耶穌也。○瑪西安者，聖教主教之子也，因其不守教規，其父逐之於教外，遂入耨司教，按其所講，有至善之大神，居冥默之中，無聲無臭，又有極惡之神，治理異邦諸國，又有公義嚴威之神，治理猶太。耶穌降生，蓋顯現大神之盛德尊榮，救世人入光明而離昏暗，其存亡生死，原非血肉之軀，不過幻形泡影耳。按此門之人，百計以苦其身，意謂克勝昏暗之氣，庶可免罪戾而就光明矣。○當時有瑪尼教者，乃波斯人瑪尼所創立也。按傳言云，瑪尼初爲天文生，善繪畫習幻術，約在耶穌後二百餘年，歸入聖教，因其欲將異邦之道混入聖教，遂被逐教外，伊乃獨行己志，將聖經之道與搜羅阿司特之道混爲一教，並自詡曰：予卽耶穌所許之

瑪尼教之道

人當持守聖經

聖靈也。當其宣講之初，波斯王聞而悅之，嗣爲國中術士所迫，逃往印度，後歸波斯，仍傳其教。信者益衆，國中博士妬其興盛，控以邪說亂真之罪。波斯王命剝其皮，實草於中，懸諸國門，以示衆。瑪尼雖死，其道却傳於亞非利加、西利、義大利諸處。至耶穌後六百年間，漸爲消滅矣。按其所講，太初之時，有善神治理光明之境，惡神治理幽暗之境，惡神慕善神之境，欲恃其權力而奪之。於是二神交鬪，乃生世界。故世界之體，明暗相參，卽一人之身，亦有善惡二靈。善者屬乎光明，惡者屬乎幽暗。所以人之內心，常有善惡相爭之勢。耶穌降生，正以救光明脫離幽暗也。日月者乃天上之慈航，日載得救之光，復其故境也。其門下諸人，多不茹葷酒，不娶不耕，不蓄產，蓋欲自苦其身，克勝肉體之慾耳。伊等於聖教遵守之節，概置不論，但於瑪尼畢命之日，盛設華筵，以表景仰尊崇之意。○統觀諸旁門，可知信主之人，惟宜持守聖經，遵循眞道，以防心思妄用，漸入歧途。試思伊古以來，孰能自恃聰明，得悉上主奧秘乎？若諸旁門者，惟憑冥想，遂至失正而趨邪。吾人但謙誠自矢，涵泳聖經，可知罪由於心，不由於身，並深知犯罪之原，非肉體之徇私，乃甘心以叛律，且知耶穌確爲神子。

其降生也、原非幻影、實具人身、其受難受死復生、特爲萬人開永生之門也。

第九章論耶穌後二三百 years 內教會所傳之道

哀利尼烏
著書

以聖經爲
標準

使徒信經

前所論諸旁門、不但與聖教同時而傳、且教中諸人亦有受其搖惑者、故教會之首領教士多著書論道、一以辯駁其僞、一本聖經以勘何者爲眞、利安主教哀利尼烏著書有云、聖教傳於四極、教中人殷勤持守者、自使徒所傳之道耳、所信者上主惟一、卽全能之父、創造天地海、並其中萬物、信耶穌爲上主之子、特爲拯世而降生、信當年諸先知受聖靈默感、預言耶穌生於童女、受難受死復生、肉體升天、將來仍必降臨、承父尊榮、使萬人復生受判、凡在天上者地上者、將必萬膝屈其前、萬口奉其名、萬權歸其手、○按諸旁門所講、率皆憑空想像、荒渺無稽、故教會之首領教士、勸勉教中當以聖經爲標準、以合乎聖經者爲眞、背乎聖經者爲僞、又論著聖經之先知使徒、非敢自抒己見、乃受聖靈之默感、而書中要道、皆上主顯示世人也、又論當年諸使徒宣教於耶路撒冷安提阿以弗所歌林多羅馬等處、所講者莫不與古聖經相合、嗣後皆教中誠實門徒、本使徒所傳者以相傳、不敢稍參己意、時有教中人

論上主

論罪惡之
由

論耶穌

書寫信經。咸稱爲使徒信經。其實非使徒所作。因經中之意合乎使徒之道。故曰使徒信經也。凡入教者。須於教會中自陳其誠服此經之意。首領乃與施洗。蓋此經一以爲入教之初階。一以防外教之流弊也。按信經云。我信創造天地全能之主。卽父。我信上主之獨生子。我主耶穌基督。我信耶穌爲童貞女馬利亞蒙聖靈感動而生。我信耶穌受難於本丟彼拉多案下。被釘十架而死。葬後三日復活升天。坐於全能上主之右。將來仍必降臨。審判生死之人。我信教會乃主所立。聖徒相交以心。罪得赦免。肉體復生。永久生命。阿們。○釋司教論上主深居冥默。萬物非所親造。創造者乃卑下之神也。故教中之首領教士。本聖經以辯其非。言上主以智慧能力創造萬物。自無而有。雖超萬有之上。實貫萬有之中。以管理扶持之。論上主之性。乃公義良善。仁慈賞善罰惡。且欲萬人奉其名尊其旨也。又言人之罪惡。非暗昧之氣所生。亦非身靈相感而致。乃一己之甘心也。或隱違內心之律。或顯背聖經之條。非由於身。實本乎心。其受刑也。不亦宜乎。由是觀之。去惡之法。不在鍛鍊其身。乃在潔淨其心也。在伊比安門屈耶穌於諸先知之列。釋司門稱耶穌爲盛德之降臨。教中之首領

教士欲矯其謬，乃論定耶穌原爲尊榮之神，與主同體，然三位一體之奧秘，實非吾人所能懸揣而知。當時諸徒多有恃其心思，欲發明其理，亦間有失之穿鑿者。遮司廳瑪特耳謂耶穌乃上主之智，惟有此智，所以上主能知覺，耶穌爲上主之言，惟有此言，所以上主能顯揚，上主發其智與言，使爲己子，與主性同而位次，子乃創造萬物，屢顯現於歷代，後又降臨以拯世人。按遮司廳所論，雖未失上主惟一之道，然就其所論者細核之，一似有兩位上主矣。阿利金謂聖子生於聖父，非於一時，乃無始無終，如日常射其光也。又謂子與父位分上下，性相若而不相同。哀利尼烏謂父子乃一，同性同體，雖聖經有父子之稱，然此奧秘之道，非吾人所能測度，但以隱微者爲父，顯現者爲子而已。特特利安謂父子之位有上下之分，父如源而子如流，父如日而子如光，若以體而論，二位終爲一主也。因釋司教論耶穌之受難受死復生，皆爲影像，故教中首領教士辯駁其非，以證耶穌之受難受死復生，實爲血肉之軀也。哀利尼烏謂世界之罪始於亞當，始祖於無罪之時爲罪所勝，故其後裔無一人能勝罪者。耶穌降世，亦有此身體，靈魂特爲捨命以救世人也。耶穌經歷諸難，正以能

體恤世人苦難也。耶穌亦歷此孩提少壯之光陰。正使人於歷此光陰者不敢輕忽也。耶穌具此人性。正使人奉其名。法其德。乃能得上主悅納也。阿利金首稱耶穌爲神人。言其神性融貫於人性。如鐵之入火。火能融貫乎鐵也。○五旬節而後。聖靈之權能足顯現於歷代教會之中。於人之內心。或重生之。潔淨之。堅固之。安慰之。然當時教中人多論耶穌性體。少論聖靈性體者。就所傳之文字考之。知其論聖靈之於父子。體同而位卑。奉父子之命。顯其權能感化人心也。要之。當年教會。先於舊約聖經得上主惟一之道。持守弗失。遂斥異邦所敬之諸神爲邪。又於耶穌與使徒所講得聖子聖靈與父同體之道。羅馬主教代歐盛西安曾曰。吾人不可將惟一之道。剖而爲三。仍信上主卽全能之父。又信道與主合而無分。因耶穌嘗云。我與主乃一體。又云。我在父中。父在我中。○論此三位一體之道。雖教中首領教士盡力講解。終覺奧秘難明。所以此二三百年內。教中人有以耶穌爲主之先知。如摩西以利亞者。安提阿主教保羅約在耶穌後二百六十年謂聖經之道。與聖靈之感。皆上主之能力。歷代先知與耶穌使徒。咸能得其精微。蒙其起發。然耶穌所得者。較他人尤爲充足也。似此不尊耶

誤論耶穌
爲主之顯
現

論捨命贖
罪每入於
偏

國勢興盛

耶穌爲主，教中人皆指爲邪。凡有如此講解者，必逐於教外。更有不悅服三位一體之道者，謂耶穌之於上主同體同性同位，其降臨於世，卽上主之顯現，以拯世人。及人撒貝利烏謂上主惟一，不更變，不分位，其顯現之法有三，當上古之時，顯現於歷代先知，定律定禮，謂之父，降世救人，謂之子，變化人心，謂之靈，譬如日然。上主乃日之體質，耶穌乃日之榮光，聖靈乃日之煦嫗萬物也。教會中皆斥其所講爲邪。然已傳諸多方，信者甚衆，居然獨闢一門矣。○按當年教會，皆以耶穌捨命贖罪爲要，而執守之。然教中之首領教士，欲發明其奧祕，每致入於一偏。因聖經常言撒但掌權於世，故教中人多謂耶穌捨命，乃歸重價於撒但，以贖萬民脫離其手也。哀利尼烏謂耶穌一身行盡律法之義，受盡律法之刑，故能克勝撒但，滅却死亡之權，賜人永生之望也。

第十章論羅馬國德教衰微之况

聖教爲上主所立，人欲識其由來，不但於純全之道見之，更可於道之化民易俗者見之也。夫欲知聖道之權能，須先知羅馬凌夷之景象。當耶穌降臨之時，羅馬權榮

舊教衰微

上行下效

已臻其極、遐邇之國爲所吞噬者、不勝其數、農工商賈之業、莫不振興、凡通都大邑、中、廟宇、戲園、石渠、浴池、以及官私公所、率皆靡麗繁華、極一時之美盛、且國內書院甚多、幼年子弟肄業其中、以習羅馬希利尼各種學術、自外視之、固爲隆盛、然人之內心、則罪惡充盈、憂危潛伏、幾等莫挽之狂瀾矣、或問其華麗之工、何若是之既巨且多、蓋皆所擄之異邦人、使之辛苦作工而致、若太徒以一萬二千猶太之俘、修築喀利西恩、羅馬都城內大戲園名皆其類也、因國中、日增其富厚、在上者益肆豪夸、一筵之費、動

逾數萬、甚有果腹之餘、服藥哇出之、仍復宴樂、又重其稅歛、剝民膏以供浪費、而小民日形彫敝、羅馬皇帝又於各省屯守重兵、發巨帑以養育之、蓋欲扶已權禦外侮、防變亂也、按羅馬開國之初、軍士率皆良民、嗣後營伍增多、充兵者非無賴之徒、卽克勝之戎狄、志氣驕而心德離、已基滅亡之禍矣、考羅馬諸帝、固間有賢德之君、盡心於國計民生者、亦多強暴之君、恣其殘虐者、竭府庫之財、填無厭之壑、居高位以播其惡、遂致上行下效、因而人心愈漓、國風愈壞、有良史森伊喀者、曾修羅馬史書、內云、通國充乎殘慝、居然賽惡之場、日熾悖逆之性、漸喪羞惡之良、竟敢顯然作慝、

人知亦覺無妨。邪淫汙辱之行。填胸臆而塞康莊。嗚呼。清潔之德。不止罕覯。直底淪亡。按國中德化。既如是凌夷。而各教之道。不但不能挽回阻遏之。因其謬說邪規。反以導人於不義。值此下流難返之時。聖教於以振興。大顯變化人心之權。引人歸主。作爲聖潔也。

第十一章論聖教傳於羅馬。遏其陋俗。正其偏心。

按聖教之於羅馬。如活泉湧於平沙。日光臨於幽谷也。凡耶穌之徒。先以敬愛上主爲本。推之彼此相愛。又推之汎愛衆人。且勉爲忠信誠實公義廉潔謙和之人也。遮斯廳瑪特耳曾云。吾人先則放縱情欲。今則愛慕清廉。先則行種種邪術。今則獻身於永生之善主。先則殉於貨利。今則公其財產以分贍貧寒。先則彼此仇害。與異邦人因臭味差池。毫無交際。今則耶穌降臨。皆爲同氣。仇我者爲之祈求。無端怨我者感格之。使就耶穌之光。與吾儕同得上主所賜之福也。羅馬人好觀舞刀奴。互相鬪殺。或人獸相鬪。或獸與獸鬪。自皇帝而下。凡富貴之家。皆設鬪場。邀人縱觀。以爲娛樂。每年人獸因鬪而死者。不下數萬。雖國中賢德之人。亦忝不爲非。且有謂能壯人

遮司聽見
證聖道

鬪殺之惡
風

圖殺局戲
教中人不
可往觀

入教後宜
各循其分

不欲教中
人出仕

之膽鼓人之勇，作人死而無悔之心者。然自耶穌之徒視之，則指爲殘忍之心，罪惡之事。故首領教士嚴誡教中人，不準目視，倘有背訓往觀者，必逐於教外。羅馬人又好觀劇，以及跳舞賽跑鬪拳等事，其中多有淫聲邪行。耶穌之徒亦禁教中人觀此等局戲。特特利安云：聖教之感化，乃使人成爲謙卑廉潔安分者耳。若各類局戲，乃動人縱情放慾，並種種淫邪也。又訓誡教中婦女云：凡局戲之場，不可往觀，倘無要事，亦不可閒行於街市，卽以外行而論，主之僕女，自與撒但之僕女有別，當立樸素端莊貞潔之型也。當時教中首領皆本保羅歌林多前書所言，勸人於入教後，仍宜各循其分。或曰：聖經之道，非使人棄絕人世之所爲，正欲普傳於四民，使各等職業咸入薰陶也。耶穌之徒非欲棄絕人生之福，但有所節制，不似外教人貪欲無厭也。按教會之制，不許教中人爲優伶，作偶像，以及卜相巫祝，並諸多失體統罪惡之事。至於充兵，教中所論不同。或曰：耶穌之道，乃和睦之道，使人相愛，甚至愛仇，信主者不宜充兵以爭殺爲事也。或曰：軍士信主入教後，仍守舊業，不爲背主也。教中首領不欲教中人出仕，因羅馬國律爲官者多有祀國神之謬規也。羅馬皇帝多有命

先代使奴
之惡風

聖教漸更
其俗

拉炭替烏
之論

各省建其生祠者、使百姓跪拜之、以昭忠敬、教中之首領教士、斥爲背主、禁教中隨衆跪拜、特特利安云、吾人只有一主、卽全能永生之父、是亦皇帝之主也、何復尊皇帝爲神乎、此等諂媚之事、不惟可恥、且亦害德也、耶穌之徒、不欲干預國政、非置身局外、理亂不聞也、仍爲君國臣民、並仇我者祈禱、國中雖屢有變亂、而教會之人、終無黨惡者、可知忠心於主、亦必忠心於國、作爲良民也、○按古世代之各國、皆有使奴之惡習、緣諸國情同冰炭、日事干戈、力強勢大者、恣其擄掠、卽以所擄之人爲奴、迨羅馬振興、數百年戰勝攻取、以致國內之人、半爲奴僕、且互相售賣、而興販圖利之徒、居然大賈、俗習相沿、已成積重難返之勢矣、及聖教廣傳、未能遽然禁止、只得

以道淪浹人心、以冀漸爲更正、按聖經所講、天下之人、皆一本所生、皆具寶貴之靈、皆蒙耶穌之救、在天國中、皆爲昆仲、至末日、皆立耶穌之前、聽其審判也、伊時作奴之人、信主歸教者甚衆、在受迫之時、多有爲道捐軀者、亦多有引其主歸教者、以人事論之、奴宜循分以事主、以天國論之、則無上下之分焉、教中之首領教士、每勸勉爲家主者曰、汝等宜溫柔慈愛、以御下、當思萬有之上、尙有汝主在也、拉炭替烏者、

多有自釋
其奴

教中以祈
禱爲重

教中著名之文學士也。曾云、或問汝教中豈無貧富之分、主奴之別、尊卑之等乎、必應曰無、吾人但彼此視爲昆仲、其故非他、因皆心許其爲同儕也、吾人度量天下之事、不論外貌、但論實情、自外視之、雖有等次之分、仍許作奴者爲吾人之昆仲、與之公同事主而爲其僕也、又云、萬人皆爲同儕、乃上主之心也、自主視之、固無主奴之別耳、上主旣爲萬人之父、人於主前皆自由者也、且主前無貧乏者、惟不善之人、主乃視爲貧乏矣、亦無富足者、惟有德之人、主乃視爲富足矣、按人生於世、各有自具之權利、教中人愈明其理、愈以用奴之俗爲非、故多有自釋其奴使之爲良者矣、羅馬郡守黑耳瑪篤信聖教、偕其妻子、並其奴一千二百、同時領洗入教、後卽將其奴盡釋之、又有郡守叩瑪替烏者、亦如黑耳瑪所爲、釋其奴一千四百、曰、伊等旣爲主之子、不可仍爲人之奴也、此後教中漸成條例、倘家主欲釋其奴、必偕至會堂、有人將所與爲良之據對衆朗誦、首領爲之祝福、教中皆許其爲自主之昆弟矣、○當年教中人法耶穌之行、遵耶穌之訓、以祈禱爲不可稍疏之禮、一以預防罪惡、一以增益德行也、特特利安以祈禱之禮、爲門徒日獻之心祭、信德之保障、克敵之利劍、於

沐浴飲食之時、須先祈禱、蓋潔養其心、更甚於潔養其身也、又云、祈禱者能塗抹罪愆、抵禦試探、消滅迫害之火燄、安慰抑鬱之愁懷、敝示迷途、平靜波浪、貧乏者得其養育、素封者得其指引、危者得其持、顛者得其扶、立者得以穩固、亞力山大之盛門特曰、耶穌忠心之徒、於祈禱之禮必無間斷、或行路、或讀書、或作工、或交際世人、或獨居靜室、隨時隨地、莫不祈禱也、雖懇求者、只此宥密之地、或一歎息之聲、亦必蒙上主悅納矣、當年門徒大概循猶太舊規、以巳初、午正、申初、爲祈禱之時、每於聖日公同禮拜、首領率諸人立禱、因耶穌復生以顯其歡欣也、若偕眷屬禱於家、或自禱於室、大抵屈膝於地、以昭誠敬也、又循猶太禁食之規、蓋欲潔淨其心、以思維聖道、祈求上主也、諸處教會多有以拜五日爲齋戒之期者、蓋記念耶穌於是日受難受死也、或有教中主教於本會中約一禁食之日、計此日所省之貲、共捐入會、以作周濟之用也、○按希羅二國之俗、爲婦者無殊僕婢、其夫不以伉儷相待、但以爲育子女、主中饋、司針黹而已、搜革地曾謂其子曰、吾人擇配、所望者能育美秀子女也、可不慎爲遴選哉、普拉透曰、爲軍士者、當通室易內、方能生魁梧之子、來庫古定司怕

他之律有云、倘夫老妻少、須使私於健壯之人、以冀生子亦能健壯也、按希利尼淫風甚熾、羅馬人於開國之初、大半清廉貞潔、迨富強已極、而希利尼之淫風已薰染通國矣、據羅馬國律、夫之於妻、操其生死之權、雖己之肆性妄爲、其妻倘有過愆、即可任意懲治、亦可出之另娶、其被出之妻、多有迫於飢寒、陷身青樓者、父母之於子女也、亦可任意相待、無法律拘束之、或有鬻爲奴者、或苦待如奴者、更有惡風竟與希羅二國相終始、將懦弱之嬰兒、或有痼疾殘廢者、棄諸山谷曠野之間、任其飢餓而死、或爲禽獸所噬、卽二國道學之人、亦不斥其非、反稱爲善、耶穌之道、以夫婦居室爲人生之大倫、因上主造人區別男女、非欲其放縱情私也、蓋欲其成立室家、生育子女、於主前教養也、故男女定盟、非淫亂重愆、無相背棄、固宜伉儷終身、百年如一日也、特特利安論夫婦之倫曰、二人乃同志同體、同心祈禱、同相勸勉扶持、同至會堂、同領聖餐、同甘同苦、同看顧病痛、同周濟貧寒、同歌詩頌讚、耶穌固喜見斯人、而賜以平康之福也、教中婚嫁之禮、不隨外教奢靡之習、亦不與外教締姻、恐受其誘惑、陷於罪惡也、耶穌之道、以孩提之生命爲重、故禁阻棄兒之惡習、謂其背天理

古世人情
之徇私

耶穌之徒
以愛爲本

而逆人情、與殺人者無異。至耶穌後四五百年內、因聖教所感、其風漸息矣。○考古
世代各國人情、其動作云爲、無非徇乎一己之私、或爲身家、或謀財利、或圖逸樂、卽
超凡邁衆之儔、其中懷籌策者、亦祇榮名權利耳。上自君王將帥、著立戰功、以至善
辯能詩、鐫石繪畫、何在非要譽一時哉。若謙卑愛人之德、則輕忽之、不以爲重。至朋
友之交、必力敵勢均、始相結納。其於異邦之人、他鄉之客、多藐視恨惡之、以復仇報
怨之事、視爲常道之當循。倘有負屈未伸、不圖報復者、羣必嗤爲怯懦之人也。耶穌
降臨於情私之世、以人之行爲、須以愛爲本、自愛主以推及天下萬人也。故耶穌之
徒於教中之昆弟、無論尊卑貧富、自主爲奴、皆以愛心爲至貴、皆尊一全能之父、皆
依救主以贖其罪、皆賴聖靈以潔其心、且皆存一永生之望。倘教中人來自遠方、攜
有主教薦書、諸教會必殷勤相待、無異素交焉。且門徒愛人之心、常見之於貧苦孤
寡羈旅囚犯者、並捐貲於公會、以備周濟之用。路西安雖藐視聖教、然所著之書、亦
可證門徒之愛。有云、最足異者、伊等竟若是之互相扶持、毫無吝惜也。一似創教之
人將親若同胞之意、置諸伊等胸膈者。喀頹基主教西皮安盡鬻其產、以濟貧寒、曾

當年門徒
喪葬之禮

興起克身
之弊

使教會中捐銀數千、以贖奴、別教友被苗族所擄者、教中有爲後嗣計、不樂捐貲者、西皮安責之曰、汝以世間財產、束縛子女之心、不勉其尋求天上財產也、倘遇國內饑荒、耶穌之徒必捐貲賑濟之、瘟疫之時、必殷勤看養之、以爲如此待人、正所以事主、必得耶穌喜悅也、○當年門徒逝世、教中人以爲入平安償願之鄉、且謂人世死日、正天堂生日也、多有製作或錨或琴或冠冕之式、並折松枝置諸新墓之上、以表冀望永生之意、又因信肉體復生、仍與靈魂相合、故不隨外教人火葬之俗、先沐浴其尸、或薰沐、殮以麻衣、教中人聚會其家、或會堂、首領讀聖書數節、率衆祈禱、更以言慰勉之、然後同送於墓、卻無外教人呼搶之狀也、維時漸起新規、念死者生前所受主恩、教中人代其感謝、按此規亦似無過、不知漸入於邪、已開敬拜已死之人、求其轉祈上主之弊竇矣、○因當時諸國習尚淫靡、教中人欲自勵清潔、以防惡俗之沾染、遂創臆論云、人若屏世俗之快樂、不茹葷酒、不娶妻、不蓄產、常禁食祈禱、乃能增長己德、厚蒙主恩、於是男女多有防物欲、克身心、祛情私、自矢獻身於主者、教會中皆重視其人、每於聚會時、特設專座以崇異之、當受迫之際、伊等首先爲道捐軀、

門徒多甘
爲貧乏

各等首領
不准婚娶

按其所爲固知身靈皆上主所賜與。釋司教謂身屬幽暗者迥異。但以犯罪之由均係一身之情欲。特欲潔淨其身。以爲上主聖殿耳。無如非耶穌使徒之訓。故於教中人無所益。而反有所損焉。一緣教中人謂伊等道隆德重。視爲高遠難幾。易阻進修之志。一緣伊等旣以克身爲要。遂漸忽耶穌贖罪之全功。而入法利賽人自善之弊。至後世教會。將因信稱義之道。幾至淪亡。豈非伊等貽之咎哉。○且天下足以誘人之志。奪其事主之心者。莫甚於財利也。故當時門徒多重視貧乏。以爲可以防蠱惑。而增善德。並證耶穌本貧乏之人。藉門徒之奉養。曾謂少年富人曰。爾鬻產濟貧。以從我。乃能得財於天也。又證使徒亦貧乏之人。耶路撒冷之門徒皆鬻其田產。捐入公會。而通其有無也。當年之首領教士。多有深體耶穌使徒之意。以爲財利乃上主所賜。人若矢志爲上主之僕。卽以之濟貧寒。助教會。乃合上主之旨。所用自得其當矣。若肥己而充囊橐。乃背上主之旨。終必有所妨害也。然教中諸人因財利足以惑人。又欲杜外教貪婪之隙。仍多有捐其田產。甘爲貧乏者。以爲能增長己德。厚蒙主恩也。○前載羅馬國淫風流行。耶穌立教會於世。蓋欲門徒之內心外行。共勵爲清

曼他奴之
旁枝

潔也。約在耶穌後一百五十年，因教中人欲避惡習，遂創臆論云：人若不娶不嫁，必多荷主恩也。於是男女門徒，多以不婚嫁爲則，獻身於主，而無室家之擾矣。更有少年人，冀爲教中職事，矢志不娶者，人皆稱美之。於是愈傳愈廣，諸教會終定成規，凡教會之各等首領，不准婚娶。按此規，乃出於人意，非本乎聖經。故於教會中，大有所損。一，使諸首領輕視夫婦之倫；一，重視己德，而生自善之心，更有不能自守其身，外貌雖似清潔，內行卻多污濁也。○約耶穌後一百五十年，有小亞西亞曼他奴者，於教會中特出旁枝，按其爲人，稍通文學，心熱志狂，自謂大得聖靈，能預言未來之事。更有女教士二人，亦自負爲先知，助其宣講。當奧利利烏逼迫教會之時，此三人遊行諸處，欲更正教會，並宣言曰：耶穌不久降臨，立天國於弗呂家之皮普撒城，爲新耶路撒冷也。教中多附從其言。然小亞西亞之諸主教，皆斥其妄，謂非感動於聖靈，實邪魔之蠱惑。乃將此三人並附從者，皆逐於教外。羅馬主教亦斥爲非，嚴禁教中人附從其論。然究有許其所講爲眞者，嚶辣主教哀利尼烏，諒其熱心，不加阻止，與之同存耶穌速降之望。及傳至亞非利加，聞風而附者甚衆，其間大有聲聞者，卽特

特利安也。論其所講之道。與使徒相傳之道。大概相同。特利安曰。吾人所講上主救主。以及洗禮聖餐。與伊等所講者毫無差謬。但欲更正教規。使人通曉聖經。勉爲完人也。此旁枝之人。又謂先代之使徒先知。說預言行奇事之權。仍留於現今教會。又因有耶穌速降之望。故常齋戒禁食。鍛鍊其身。以備天國之至也。又謂各等首領。不可由人選立。自有主所選立者。足受聖靈之感也。故此旁枝中多有女教士牧養宣講者。因念耶穌速降。萬象更新。凡一切世故概輕視之。婦女皆淡妝。年少者必蒙帕於面。當受迫之時。率爭先徇道。逃避者必逐於教外。斥爲不赦之罪。喪妻再娶者以犯姦論。因罪出教者終不收錄。特利安曰。人之重罪有七。入教後有犯者必不得赦也。如此講論。與耶穌使徒寬忍之道大相刺謬。故漸忘耶穌贖罪之功。因信成義之本。而流入自恃善功之弊矣。按此旁枝。約傳四五百年。始卽滅沒矣。

第十二章論耶穌後二三百年內教中名士事畧

新約告成而後。教中人於百年內鮮有著作文字者。耶穌之徒雖殷勤宣講。諸處振興。欲考當時事跡。載籍殊寥寥也。其間著名者吾人但知其大畧焉。羅馬教士盛門

特曾親聆保羅彼得宣講。又十餘年爲羅馬教首。因歌林多教會中有紛爭之事。寄書勸勉之。此書尙傳至今。吾人雖未深悉其生平。讀其書不啻見其人焉。書中之意。勸勉歌林多門徒宜存和睦之心。作謙卑聖潔之人。以耶穌使徒爲法。其論成義也。不在行善之功。而在信主之心。有云。當年諸先知所以成爲至大至尊者。非憑乎己。非由乎功。非因乎義。乃在上主之旨也。吾人因耶穌基督承旨蒙召。其所以得稱爲義者。非本乎己。非本乎智與明。非本乎廉與正。亦非本乎清潔之心。所作之善功。實本乎信心耳。惟此信心。全能之主。自太初已定其稱義。吾人自當歸榮於主。以至永久也。由是觀之。親愛之諸昆弟。吾人所行者。可怠緩善功。自痼其愛心乎。斷不可也。尤當存熱心果志。竭力以成善功。緣造物之主。本自喜其功也。又勸其彼此相愛云。人能依耶穌而存愛心。卽順從耶穌之命也。孰能形容上主之愛。有何等權衡。何等榮美乎。蓋愛有莫名之躋高。可聯合於上主。能掩蔽諸愆。忍耐萬事。無鄙陋。無驕矜。無畛域。無乖僻。凡事融治。惟本乎愛。則主之選民。可爲完人矣。倘無愛。卽無主所喜悅者。惟愛乃能得其收納也。因上主向吾人所存之愛。耶穌基督流血以承其旨。以

身代吾人之身、以命代吾人之命、何以汝等有爭辯忿怒紛爭結黨鬪很等事哉、吾人豈非同此一主、同此基督、同此聖靈之灌溉、同此事主之責任、何竟將耶穌肢體、使之互相殘傷、以至全體攪動乎、甚乃蒙昧厥心、竟忘其同爲一體矣、○安提阿教會、異邦中首先創立也、保羅彼得巴拿巴皆曾宣講於此、及保羅傳教於外、以此爲中區、使徒沒、繼爲教首者、伊那西烏也、當豆米西安逼迫之時、竭盡心力、勸勉堅固、又多爲祈禱、蓋恐怯懦之門徒背道而拜國神也、迨他乍奴復興迫害、伊那西烏欲身作表率、明奉耶穌之名、適他乍奴東征、駐蹕此城、召之至、面諭之、使棄其道、以那西烏不稍屈、太乍努欲殺之以警衆、遂命解至羅馬、擲與野獸吞噬、於路多修信函達諸處教會、以發明其爲道捐軀、歡然就死、內有甘爲耶穌死、勝作萬國君之語、及至羅馬、竟被猛獅爭食、良可哀已、○怕利喀者、傳言爲使徒約翰之門人、年老時、爲士每拿主教、其生平行事、少有可考、吾人但知其殷勤傳教、善誘掖人、曾寄書於腓立比教會、勸其存愛心、並和睦安分、忍耐恒久之心、不但爲教中人祈禱、更當爲仇我害我者祈禱、書中多引證新約之言、在奧利利烏逼迫教會之時、爲道受害、

○遮司聽

後稱馬特耳乃為道受害之意

希利尼苗裔也。年幼時，即能黽勉讀書，迥超凡眾。及長，遊

歷諸邦，尋求各教。後入普拉透道學，安心悅服。數年之久，一日遊於海濱，遇一老人，乃耶穌之徒也。互相辯論。老人曰：爾所學者，不能引人造於其極，亦不能助人成爲聖潔。若當年先知使徒所講奧秘之道，咸被聖靈之感，非關人力也。爾宜祈求上主，牖爾聰明，得明至道。遮司聽之於聖教也，雖習聞外教人譏談，而心識教中人公義廉潔，故定意查考聖經，以核其真僞。未幾竟得道中確據，遂奉耶穌之名受洗入教焉。自此遊歷諸方，宣揚聖教，才辯之名大著。因其聲聞日隆，遐邇之人，就而聽道者接踵而至，不但宣之於口，亦且筆之於書，或發明眞理，或辯駁外教。其著作中最關緊要者，乃與猶太人太哀辯論之書也。

見第四章

論其生平，志果而心熱，當受迫之時，勸

勉教中人忠心事主。曾云：吾人既奉耶穌，固欲爲之受難，以冀判斷之時，欣然立於尊嚴之前，終必得救也。約在耶穌後一百六十六年，爲其仇所控，遮司聽毫無畏懼，

於官長前，仍奉耶穌之名，遂遇害。○哀利尼烏怕力喀之門人也，生於小亞西亞。

約耶

蘇後

二十餘年

曾云：子聞怕利喀講解，雖未記於簡編，卻能銘於心版。蒙主之恩，至今

思之猶恍在目前也。嘗傳教於嘎辣及主教哀替奴遇害。

見第二章

遂繼其位論其所學。

不但通曉聖經且精於希利尼學術其講道也辯論風生聲名遠播因諸教會意見不合屢起爭論乃勸其相忍相愛體耶穌之心以爲心所著證道之書甚多並著書

斥耨司教之謬按教會傳言在色危入逼迫之時爲道受害

約耶蘇後二百二年

○亞力山大

之蓋門特

見第四章

才高學博遊歷多方尋求至道終以聖教爲眞而歸之乃以學術辯

才闡發眞理爲亞力山大教會長老數年又十二年爲書院之長殷勤啓迪絕無倦怠之心並著書證道且闢外教當色危入時亞力山大受迫極重蓋門特逃匿他方遊行諸處其事跡少有可考按所著之書有指摘敬奉邪神之弊者言人之惡行國之頽風皆緣此以肇其端也有指證上主純全之德足爲吾人模範者蓋勉勵教中人以上主爲法作爲完人也○阿利金

見第四章

初從學於蓋門特學問淵深可爲當年諸聖徒之冠及蓋門特逃避於外阿利金繼爲院長未幾聲聞遠邁於其師論其

心固愛慕聖經所講之道亦大概與聖經相合因其才高意廣往往想入非非其著作廣傳未免玉砮同播遂起異日聚訟之端矣按其所講人未降生於世其靈魂早

受造於天，因被試逆主，謫下天堂，遂降生而爲世人也。又講耶穌贖罪之功，不但推

及大地之人，並推及諸天之人，其後萬靈諸魔，必將與主復合也。其註釋聖經，輕忽

字義，而索隱窮微，故多有謬解之處。吾人雖摘其疵瑕，仍取其文學，更重其謙卑廉

潔，恒心事主也。○特特利安

見第四章

才辯果敢，熱心宣傳，性剛容肅，少有和藹之風，不

以世俗之逸樂爲意，百計以克其身，蓋欲修慝崇德也。或斥外教之謬，或指教中之

非，必厲言以懲之，是以多招尤怨。及其年益進，而責過益嚴，遂致流入曼替奴之旁

枝，

見第十章

其著作甚多，勉勵教中人成爲聖潔，以防外教之弊。後其書廣傳，雖未盡

合聖經，究與教中人大有裨益也。○西皮安、喀頹基之世家子也。

約生於耶穌後二百年

才優

學博，曾爲才辯之師。初則自奉豪華，頗染世俗淫靡之習。比及中年，有教中長老西

西利烏者，勸其尋求聖道。其後竟得道中確據，乃受洗入教焉。按其所著之書，有云：

昔吾薈然於幽暗之鄉，奔走崎嶇之路，如舟之漂泊於海，無所依歸。嗣以重生之水，

滌盡胸中污穢，始覺清光下臨，充滿五內。自此心志堅定，而閉者開矣，暗者明矣。因

其才學出羣，聲名大著，未幾選爲喀頹基主教。其治理教會，大顯明決忠誠，且能謹



1179

East
Asian
Library

36

121

85412

1002

112

ORIENTAL LIBRARY
UNIVERSITY OF CALIFORNIA
LOS ANGELES

聖教史記

上卷
中三

6 1951

LIBR. OF
CALIFORNIA

聖教史紀卷叁上

目錄

第三世代教政與羅馬國政相融

自耶穌後三百十二年至六百年

第一章論聖教勝於羅馬

第二章論聖教於數狄族中勝於阿利烏旁門

第三章論教內教外所著辯道之書

第四章論聖教與國政相合有損無益

第五章論避世修道之風

聖教史記



聖教史紀卷叁中

目錄

第六章論教牧之權教會之政

第七章論懲治叛逆之人與教中分別門戶之非

第八章論教會之風禮拜之規

第九章論教會之聖禮

第十章論建造會堂

聖教史紀卷之三上

第三世代教政與羅馬國政相融

第一章論聖教勝於羅馬

聖教由微而強

第一段堪司炭聽事略

自耶穌後三百六十年至三百三十七年在位

○前載聖教屢遭迫害，自猶太人起，至羅

堪司炭聽幼年事蹟

克勝西方諸敵

馬皇帝代歐盛西安止，其末次迫害較前爲尤甚，而聖教仍復振興，可知上主所立之教會，非人力所能滅絕也。自末次迫害而後，聖教之景況大爲變更，離幽僻之鄉而躋高明之域，若溯其不變之由，雖非一端，然大有關係者，乃堪司炭聽之護庇扶持也。按堪司炭聽係該撒堪司炭替烏之長子，少壯時曾隨代歐盛西安攻伐伊及，後又隨嘎利利烏攻伐波斯，大著謀勇，嘎利利烏嫉妒之，屢使入於危險，蓋欲置之死地也。然堪司炭聽經此磨礪，愈能動心忍性，沉毅有謀，後設計逃歸其父，未幾其父卒，遺言命堪司炭聽繼其職任，嘎利利烏雖不樂從，因悉堪司炭聽謀勇，恐起兵戈，不得不聽其爲該撒也。有瑪森替烏者，退位之君瑪西米安之子也，在義大利招集軍旅，自稱皇帝，屢敗官軍，其父亦助之，後因父子紛爭，瑪西米安逃往嘎辣依堪

克勝來西
尼烏

輔助聖教

十字架顯
於空中

司炭聽無如心懷不義謀奪堪司炭聽之位因所謀敗露脫身而逃堪司炭聽追殺之瑪森替烏聲言欲爲父報仇往攻嘎辣堪司炭聽不待其先發迅速整兵直至義大利之地三戰皆捷瑪森替烏軍士潰散已則逃至太比耳河畔落水而死值此變亂之際嘎利利烏身得異症而卒自此堪司炭聽治理羅馬西方來西尼烏治理東方不久興起干戈堪司炭聽仍獲勝捷俘來西尼烏而殺之羅馬全地仍合一統矣按堪司炭聽於年少時曾親見代歐盛西安嘎利利烏逼迫聖教之事又見教中人所受之苦難與其恆心事主捐軀殉道遂大相感動覺國中所敬諸神皆無益於家邦惟耶穌教乃能輔世長民也曾云吾父敬耶穌教所敬之神故能無往不利其敬異邦諸神之皇帝皆不得安然壽終吾欲樂吾生命快我敷施當法吾父以耶穌教爲依歸他教自見衰微耶穌教自然興盛矣猶西比烏著教會史書內載堪司炭聽非常之事有云堪司炭聽於攻伐瑪森替烏之時曾祈上主引導扶持一日當夕陽在山忽有十字架顯現炳然於日光之上並有字蹟云賴此獲勝次晚堪司炭聽於夢寐中見耶穌謂之曰汝軍中大纛當作十字架之式賴此以克勝瑪森替烏並一切仇

舊染未除

殘酷不仁

新定有益
之律

敵也。堪司炭聽從其言，果獲勝捷。此後凡有軍旅之事，必用此蠹。一顯誠敬耶穌之心，一欲賴主獲勝也。論堪司炭聽雖崇奉聖教，然自少年所染異邦之習，有一生未盡除者，故所行多不合乎聖道。按羅馬祭神之禮，選立大祭司一人，總司通國祀典。堪司炭聽自卽位後，終身兼攝此職，又以豐盛之禮獻於太陽神阿裏羅之前。凡有措施，每問巫祝以決吉凶，又鑄錢，一面印耶穌之像，一面印阿裏羅之像，觀此數端，可知雖受聖教薰陶，終未能滌盡舊染也。論其體貌，頗長俊美，且喜衣冠禮儀，但性多猜疑，心存報復，與聖經仁恕之道大不相侔，故屢蹈於罪愆也。當克勝來西尼烏之時，曾許其降則不死，來西尼烏遂投戈而降，後仍殺之，並殺其十一歲之幼子，以絕後患。堪司炭聽之子，監司普文雅才智之公子也，其父因疑其有篡奪之心，竟定死罪。殘暴不仁，莫甚於此矣。然其所定之律，所行之政，足證得聖教引導焉。曾定律重科，姦淫出妻棄嬰雞姦等罪，並強姦誘姦等罪，雖容國人照舊祀神，倘聞某廟有淫亂不法等事，卽將其廟封閉。當代歐盛西安之逼迫，教中之會堂田產多籍沒入官，堪司炭聽降旨，仍令還其原主。凡教會中各等教牧，概免其征徭，勸諭國人釋奴。

遷移京都

臨終受洗

三子分國而治

從良令通國遵守聖日、捐國帑以建造會堂、供養教牧、又請教中教士以聖道訓誨其子、迨戰克來西尼烏獨掌國權、出示勸導百姓、使入耶穌聖教、因羅馬京都祀國神之風猶熾、乃遷都於拜散替恩城、更其名曰堪司炭、修其城垣、敵樓宮室公廨、又修造數處會堂、均極華美、未幾新都之光榮遠邁舊都矣、按堪司炭聽謹守聖日禮儀、有時自作教士、對羣臣講解聖經、以責其貪利忘義之弊、羣臣雖頌其嘉言、而終未改其素行也、論其心固崇信聖教、亦自認爲聖教之人、但於臨終時始領洗禮、蓋以洗禮能洗其已往之罪、是以故爲遲延、不欲早領受也、當領洗之時、脫錦袍而易白衣、至死仍服此衣、其意蓋離去世俗華美耳、按堪司炭卒於尼叩米地亞城、其諸臣軍民等殮以金棺、送至堪司炭葬、以耶穌教之禮、厥後東方教會奉之爲聖、尊與使徒同列、西方教會但稱之爲大者、重其保護教會之功而已、

第二段、堪司炭聽卒後其三子事略

自耶穌後三百二十七年至三百六十一年

○堪司炭聽於臨終時、命其

三子分國而治、長曰第二堪司炭聽、次曰堪司炭替烏、三曰堪司炭司、按此三子雖幼學耶穌之道、然但習其外儀、並未得其蘊蓄、以克其殘暴、堪司炭替烏率兵襲取

堪司炭替
烏獨攬國
權

禁祀國神

阿他那西
烏之言

黑拉利之
言

羅馬城凡宗室世家殺戮殆盡蓋以防後日篡奪之患也後又攻伐波斯屢爲所敗
安提阿城亦爲波斯所陷伊時二堪司炭聽與堪司炭司興起兵戈二堪司炭聽戰
死其地遂爲堪司炭司所并越十年堪司炭司爲其臣瑪恩西烏所弑堪司炭替烏
遽興問罪之師瑪恩西烏兵敗而死於是羅馬通國統歸堪司炭替烏矣論其爲人
志懦才疎胸無定見惟婦人閹宦與教會主教之言是從曾降旨禁止國人祀國神
之事又降旨云倘有在羅馬亞力山大雅典三城中敬拜偶像者殺無赦於時國人
歸入聖教者源源不絕自外體視之教會可云極盛然未免眞僞同收以致教中人
之內德頹敗也多有教中名徒因堪司炭替烏以國權壓制外教甚不悅其所爲以
爲非耶穌傳教之本心阿他那西烏曾云撒但因心中本無眞理故以利斧刀劍闖
入人心救主則性體溫和不加勉強叩心門而言曰請容吾入否則去蓋宣
揚眞理不藉刀劍牢獄兵權乃訓導勸勉以默化人心也人畏皇帝之權何得爲訓
導人懼違逆之刑何得爲勸勉黑拉利曾以直言責堪司炭替烏曰汝以府庫之金
累上主聖所緣汝之金或取於廟宇或得籍沒之資或以非法所剝之民膏而貢獻

於主也。前載耶穌之徒，屢遭逼迫，非能殄滅聖教也。正使教中人愈加持守耳。堪司炭替烏逼迫外教，亦未能遽然殄滅。正使之暗中持守，愈加珍重，且愈以恨惡聖教也。

注利安幼
年事蹟

第三段注利安

後稱道叛

事略

自耶穌後二百六十一年至二百六十二年

○注利安堪司炭聽之猶子也。堪司炭

聽逝世時，年甫六歲。及堪司炭替烏大殺宗室，因年幼獲免，然終疑忌之，常使人伺察其所爲，並派心腹主教猶西比烏與宦官數人，管理其讀書學道之事，實使繫絀之也。注利安固見聖教中人多徒守外儀，少忠心善行者，中懷殊深痛恨，然其操心危而慮患深，故不敢形諸辭色。其於讀聖經禁食祈禱，並教中一切禮儀，仍謹遵師訓，暗中卻讀后美耳普拉透等書。又暗交外教著名之人，其人見注利安歸心其道，隱冀國教賴以復興，遂將各等學術殷懃傳教。注利安自年少時，每好憑空結想，所以易受誘惑，或於夢寐，或於異象，或因巫祝之言，皆自謂得國神之顯應。又於深夜恍惚之間，以爲得見猶皮特民耳法阿哀羅赫庫利諸神，許輔助之。按其尤爲崇奉之神，乃太陽阿哀羅也。尊其號曰日君，以爲萬物之光華，生氣保養，皆本於此。當堪

敬奉邪神

受封爲該
撒

注利安爲
帝

興復祀國
神之規

司炭替烏在世時注利安匿怨用諛並隱其崇信國神之心僞爲耶穌之徒故堪司炭替烏封之爲該撒使掌理嘎辣之地注利安大顯謀勇戰克遠近苗族宣猷布政境內乂安五年之中聲名大著堪司炭替烏聞而嫉之徵其軍兵大半使赴東方蓋隱削其權也注利安本欲遵旨其部下之人羣相鼓譟迫立注利安爲帝於是注利安率兵而東欲與堪司炭替烏爭國堪司炭替烏正值備兵禦敵忽得暴疾而卒因而止息干戈共奉注利安爲帝矣論其卽位之初去夸靡崇節儉懲酷吏逐倖臣然招致巫祝術士邪術之人而信任之己則粗衣菲食寢於地首之髮指之甲任其增長儼若修隱之士焉因其全族爲堪司炭替烏夷滅又因年少時受教士壓制並見教中人徒守虛文鮮有忠信之徒故於聖教深惡痛絕之竭力興復祀國神之舊規先年祭司受堪司炭替烏之迫逃匿者仍復召回使任舊職並出示勸諭國人仍獻祭於壇廟凡十字架或關乎聖教之圖畫字樣印於錢文繪於旗幟者盡行裁撤以易祀國神之圖畫字樣每旦暮必獻祭於太陽神前黃昏時獻祭於月星至國內諸神則輪日獻祭因廟宇繁多無暇親歷乃命築壇於宮內有時自作祭司手殺犧牲

規條多仿
聖教

惡聖教而
不加逼迫

輕慢聖教
之徒

驗其臟腑以決吉凶。按注利安固欲興復祀國神之道。然其所定規條多有仿於聖教者。命祭司作清潔之人。周濟貧寒。善待客旅。服飾儉樸。惟獻祭之禮服務須華美。以稱厥職。又命祭司以所定時日宣講諸神顯應之事。以爲百姓之警戒勸勉。又捐國帑建造修道院。並女貞院。留養局。育嬰堂。以及客旅安寓之所。又勸捐於諸臣國人。使之共襄善舉。雖注利安竭盡心力以期興復舊規。然如投藥石於已死之人。接活枝於枯乾之樹。終徒勞無益耳。諸臣雖頌讚其熱心。已覺祭司所講爲虛誕。不與之同心合德也。注利安雖深惡聖教。然定意不加逼迫。因見先年教會屢受迫害。仍必興盛。又因國人歸教者甚衆。恐激生變亂。因見教中之旁枝別派。四處振興。特欲俟其彼此紛爭。互相殘滅。有時僞爲憐憫之辭曰。惜哉。此輩舍尊榮之國神。而拜逝世之人。並死者骸骨也。乃定教中人重稅。凡先帝籍沒之廟宇。賜與教會者。命教中人并其增修者。均退還原主。教中有爵祿者。撤其職任。若教中人與外教爭訟。難望官長公平判斷。有時官長驅逐之曰。汝師耶穌曾言。有人要汝內衣。並外衣。聽其取之。汝何爭訟爲哉。國學中不准耶穌教人爲師。又不准耶穌教人以希利尼書籍訓

陰助聖教
之敵

攻擊波斯
國

其子弟曾云此輩只宜讀馬太路加等書不可褻瀆希利尼著書諸賢也又僞爲重視猶太教而顧恤之蓋欲使之興復以作聖教之敵遂將先帝所定猶太教之重稅概行蠲免許其回耶路撒冷重修聖殿以復先代之榮華並捐國帑以資助之又派大臣阿利皮烏照顧其工作又許其克勝波斯凱旋之時必親至耶路撒冷以觀工竣獻祭之禮猶太人一聞此旨皆歡欣踴躍自四處奔集聖城以爲舊約先知之預言可於此應驗矣其婦女多有鬻其環佩購白金打造鍬鏟兜土之器亦以錦緞爲之不料於清鋤舊址之時忽有疾雷閃電旋風地大震動並有火團自地而起人皆驚惶卽行中止無論教中教外皆以爲上主之顯應以覆諸利安之謀可知其阻隔之策正以成上主庇佑之恩也論羅馬與波斯國積有夙怨注利安欲得亞力山大之威望統軍往征波斯王素聞其謀勇遣使議和注利安不許波斯帥知羅馬兵驍勇善戰乃定策不與對壘但左右旁擊以逗引之使入歧途而絕其糧道俟其饑乏而以大軍乘之注利安奮勇而前麾兵直進不覺已深入危險之地矣糧餉不繼且無汲水之處軍心惶惶人無固志乃命旋師波斯兵自後掩擊羅馬兵且戰且退一

受傷殞命

日偏師接戰，注利安身受重傷，至夜而卒。耶穌之徒聞注利安死，大爲慶幸，蓋恐凱旋而後，必大有迫害也。按注利安既死，其所欲興復之舊規，仍爲落寞，所重用之巫祝術士邪說之人，亦退位而歸閒散之地矣。

第四段，自周非安至第二非連替尼安事略

自耶穌後二百六十二年，至三百九十二年

○注利安既卒，諸軍

周非安爲帝

舉元帥周非安爲帝，與波斯議和，將先年所侵奪波斯之地，退還數處，立約息兵。仍命軍中設十字架大纛，凡苦待耶穌教之律，盡行刪去。及周非安卒，非連替尼安治理羅馬西方，其弟非連司治理東方。按此二帝，雖崇奉聖教，仍許國人循舊規以祀國神，但不許以犧牲爲祭，並禁止種種邪術。厥後羅馬城猶有行邪術者，遂定以焚死之罪。伊時羅馬四境，於祀國神之風，均漸衰敗。惟羅馬京都，多世家大族，仍循其道，然不似先年卑視聖教，存傲睨之心矣。但望皇帝容其遵守舊規，敬拜先人所敬拜者而已。非連替尼安之子革雷西安在位，因米蘭主教安玻婁司之勸，籍沒多處

祀國神之風漸衰

撒女神壇像

廟產，刪棄厚待祭司之律，裁撤佈施諸廟之款。議院公廨中，舊有神壇，上安女神非多利亞之像。羅馬人謂爲司捷之神也。凡議院官初到任者，必行香設祭，立誓於其

替歐豆西
烏勇略
教中逼迫
外教

前革雷西安命撤其壇像及革雷西安之弟第二非連替尼安在位議院老臣西瑪庫上書勸帝將女神之像復其壇位有云帝當崇奉祀國神之禮更當思念舊都此都得爲諸國之首者非皆諸神之庇護哉安玻婁司謂帝曰若許其所請是以拜邪神爲善於敬主之心有虧也又謂羅馬城先年榮耀非諸神之庇乃上主之恩又以聖教振興國教頹敗爲據曰此足證上主庇佑敬主之人諸神無權以庇其崇奉之人也

第五段自替歐豆西烏以下事略

自耶穌後二百九十二年
至五百五十年

○非連司卒後革雷西安舉統帥

替歐豆西烏爲副帝與之分國而治時國內之臣多有覬覦帝位而生禍患者且北狄屢次入寇替歐豆西烏內靖變亂外禦強敵大著才猷勇略定律禁止邪術占卜等事並禁百姓入廟祀神又籍沒多處廟產更有耶穌之徒受修道士聳動將神廟任意平毀亞力山大之主教替阿非路殘暴不仁聳愚教中人與外教人爭鬪將極古且麗之色拉皮廟平毀此後伊及諸廟多有被教中人平毀者在叙利亞國有主教瑪色路親率軍兵舞刀奴等往毀諸廟外教人集衆與戰將瑪色路擒獲以火焚

深議逼迫
之非

殺女教士

廢棄道學
院

死。噶辣省有附近徒耳城之修道院。院長瑪耳聽率教中人平毀多處廟壇神像。按教中人如此逼迫外教。甚不合聖教以德待仇以道感人之意。緣未滌盡舊染。仍存報復之心耳。忠信明智之徒。深以爲憂。力阻其事。盛撒司吞曰。吾人之於邪道。不當以權力強暴毀滅之。但宜以勸勉訓迪愛心拯救之也。奧革司聽曰。吾人之於外教。當剿滅其心中之偶像。俟其崇信眞主。或自毀其壇廟。或請吾人行此善功。此時但當爲伊等祈禱。不宜招其憎惡也。自替歐豆西烏而後。歷傳數代。皆禁阻祀國神之事。耶穌後四百五十年。亞力山大城之女教士黑怕替阿。賢德文學之人也。宣講普拉透之道。被教中人於街市中擒獲。解送會堂。殺而焚之。似此兇暴之事。實與教會大增惡名也。及第二替歐豆西烏治理東方。曾降旨。凡境內廟宇。或焚燬。或改會堂。時在耶穌後四百二十五年遮司替尼安爲東帝時。禁百姓入廟祀神。犯者定以死罪。並廢棄雅典城著名之道學院。按此院已相傳九百餘年。爲祀國神之砥柱。今一旦廢棄。幾如拔去根株。枝葉自不久彫落也。此二百年來。北方諸狄屢侵擾羅馬境土。終將西羅馬吞據。按諸狄所至之處。平毀廟宇。存留會堂。噶特族英勇之王阿拉利克攻克羅馬城。

邪道衰而
聖教興

阿利烏門
漸傳於日
耳曼諸族

聽軍士擄掠，却於彼得保羅二處會堂禁止擾害，統論羅馬祀神之道，相沿約千年之久，因內亂外敵，終歸滅沒，聖教仍然振興，雖兇猛之族，亦能浸潤其心，異日諸國興起，教化一新，此時正有以開其端也。論聖教初傳於羅馬，廟宇祭壇充牣通國，國人莫不崇奉國神，鄙聖教爲婦孺奴婢所信，不久必將消滅，不料五百年後，聖教大行，各城皆造巨麗會堂，而諸神壇廟反彫零冷落，無人崇奉矣。然後世之人，雖棄其邪道，而希羅二國騷人道學良史辯士所著之書，尙有流傳不息者，約千餘年，奉教諸國雖不甚崇尚，近五百年來，復能興起，諸國設立書院，不但使人習天文地理格物等學，仍讀二國之書，爲能達其文辭，益人明智也。蓋於二國之道，披沙揀金，亦足以輔翼聖教云爾。

第二章論聖教於數狄族中勝於阿利烏旁門

此門所講之道見本
卷第十一章二段

自耶穌後三百五十年以下，約一百五十年之間，阿利烏旁門漸傳於日耳曼多族之中，原其初肇於嘎特族，厥後傳於凡大勒遂非布根地安如基安赫如利安蘭革巴德諸族之中，視茲景况，似乎日耳曼之諸狄族，皆將歸斯旁門，而以其權勢，殆將

賴法蘭克
族正教復興

嘎特人阿
非拉司廣
傳阿利烏
門之道

正教滅盡於世，然斯事未成者，因法蘭克強盛之狄族，歸於正教，用其兵權以攻守旁門之他族，益正教之權勢，拓其境界，增其國勢也。

第一段論居於多瑙河兩岸之嘎特狄族

在耶穌後二百五十年，聖教已傳於嘎特狄族之中，其傳之者，乃由羅馬所擄之俘囚，間有教中人也。自耶穌後三百四十八年，有嘎特人厄非拉司，爲阿利烏門之主教，廣傳斯門之道於此族中，而入教者甚衆。至耶穌後三百五十五年，嘎特之君阿炭阿利克，恐歸斯門之人，心向羅馬，不欽崇本國，於是頓起阻迫，厄非拉司率其門人過半，越多瑙河，入羅馬境。羅馬皇帝堪司炭替烏，許其居近黑木山之地。耶穌後三百七十五年，有嘎特族中之一支，因受胡尼猛悍狄族迫脅，棄其故里，逃入羅馬。羅馬皇帝非連司，許其若歸阿利烏教，則居於國中。厄非拉司殷勤傳教，且創嘎特文字，又將聖經譯入嘎特之文，傳言云：其未敢譯者，列王記與撒母耳書也。因斯二卷多有戰爭之事，恐啓嘎特人好戰之心也。自嘎特族阿利烏門漸傳於阿司嘎特，危司嘎特凡大勒如基安蘭革巴德諸族中，惟相傳之次第，未能考其詳也。

第二段論危司噶特族在噶辣與西班牙之地

噶特族居於西方者名危司噶特
特居於東方者名阿司噶特

危司噶特
族歸入阿
利烏門

其門泯滅

考羅馬之皇帝替歐豆西烏崩於耶穌後三百九十五年臨終時將其國分於二子
危司噶特之君阿拉利克素裕才能乘機率大軍於希利尼又在義大利之地任意
搔擾且攻破羅馬城擄去貴器寶物後此又有噶特大軍入於南噶辣侵吞其地遂
立危司噶特國之基其都城名徒路司在猶利克爲君時自耶穌後四百六十六
年至四百八十三年國勢興
盛開拓邊境且侵西班牙之地過半危司噶特族人已入阿利烏旁門猶利克君欲
國中之羅馬人咸棄其舊教而歸阿利烏門然雖迫脅之伊等仍持守舊教也耶穌
後五百有七年法蘭克族之君克婁危司在浮革勒戰地大勝危司噶特兵奪取噶
辣之地然斯國據西班牙之地仍存二百年之久歷代國君多欲國中守舊教之人
歸入阿利烏門至耶穌後五百八十五年興起極重之迫脅而正教之門人多有爲
道殞命者耶穌後五百八十九年國君勒克勒德歸入正教由是正教振興而阿利
烏門泯矣此後百餘年斯國尙多外爭內亂至耶穌後七百十一年其末君勒德利
克在西利司戰地爲回教之兵所敗而國亡矣

第三段論凡大勒族立國於北亞非利加之地

凡大勒人之性情殘忍强悍較諸狄族爲尤甚在耶穌後三百餘年阿利烏旁門之道自嘎特族已傳於凡大勒族耶穌後四百有六年凡大勒阿蘭奈遂非三族人自北而南突入嘎辣四處騷擾越三年亦入西班牙侵吞其地至耶穌後四百二十九年羅馬之方伯班伊法司治理亞非利加之地有羅馬之統帥妒其權勢遂於皇帝之前以無作有捏造謠言誣其悖叛皇帝疑之召之入朝班伊法司聞其事不敢奉詔果生悖叛之心卽請凡大勒之君眞色利克自西班牙入亞非利加助其與羅馬對壘於是眞色利克率雄兵五萬入亞非利加肆行屠戮蹂躪田疇斯時皇帝深悉班伊法司之被誣與之復和班伊法司力請眞色利克退兵然眞色利克之來雖以助戰爲名實寓侵吞之意遂不從其請班伊法司計窮無策與之交戰大爲所敗此後百年凡大勒國在亞非利加興盛歷代之君極爲殘忍迫脅斯地正教之人棄其舊教而入阿利烏門而正教之人不肯聽從遂屢遭迫害多有教牧發於國外備受艱苦者有死於獄中者更有受諸殘酷之刑如截手割舌重傷其身者因此正教之

阿司嘎特
族歸入阿
利烏門
蘭革巴德
族入阿利
烏門
教父第一
貴勾利令
正教勝於
阿利烏門

衰微殆甚也。至耶穌後五百三十三年，羅馬皇帝遮司替尼安派其謀勇之帥貝利撒利烏入亞非利加大，大敗凡大勒之兵，而滅其國。然正教雖脫凡大勒人之殘酷，究不能若先年之興盛也。百年後，回兵侵吞其地，而正教更衰微矣。

第四段論阿司嘎特族與蘭革巴地族在義大利之地

自耶穌後四百八十九年，阿司嘎特之君替歐豆利克，侵吞義大利之地，立斯國之基。此族人已歸阿利烏之旁門，然替歐豆利克容正教之人依其舊規，敬拜上主，又尊崇羅馬國之教化，願其原族人受其感化，替歐豆利克殂。在耶穌後五百二十六年東羅馬之將帥那耳西，率大軍入義大利，戰滅阿司嘎特國。然歷二年，蘭革巴地人入義大利，蠶食其地，遞傳其國至二百年之久。此族已入阿利烏門，當初立國於義大利之時，多迫脅正教。然第一貴勾利為教父，極費心思，令正教勝於阿利烏門，而斯門之教牧多營心於權位，弗勤化導栽培，遂為正教所勝。至耶穌後七百七十四年，蘭革巴地國被法蘭克之君喀利美印戰勝，其國滅矣。

第三章論教內教外所著辯道之書

聖教勝夫
國教

指斥聖教
之非

注利安所
著之書

第一段、外教人以文字排擊聖道○在此世代內、聖教日盛、國教日衰、奉國教者已非似先年之驕慢、但得與聖教並駕齊驅、而願已足矣、雖迫害聖教之時、不許教中人敬拜眞主、而當此之時、卻望許其敬拜國神也、按先年教中首領、凡於望教者、細心體察、必實見其忠誠、乃與施洗、蓋恐欺詐之人濫入教會也、近因聖道昌明、望教者衆、而首領體察之心漸以懈弛、未免眞僞同收、致使流俗之弊端浸淫於清潔之教會、而外教文學之士、因以得譏談之柄、著作文字以指斥之、並證聖教感人之效、非駕國教而上也、雖教中不少廉潔之士、彼則毫無區別、概斥爲非、直欲溷冠冕於塗泥、混金珠於沙礫矣、遂指教中人私詐營求、剛愎逢迎諸弊、並指敬拜亡骸與所稱諸等聖物者、又謂國家權榮衰敗、變亂迭生、以及地震饑荒瘟疫等災、皆耶穌教之所致、其最爲巧辯者、乃皇帝注利安之書也、耶穌後三百六十三年、注利安駐驛於安提阿、會集軍旅將伐波斯、乘間著書、辯駁聖道、按其書中大旨、與色勒俗、帕腓力大概相同、謂耶穌之道非出於神、乃由乎人、不過擇猶太異邦諸教攢集而成者也、又謂耶穌之徒不啻水蛭、夫水蛭吸人之惡血滿腹、而耶穌教之人、吸取各教陋

其書無損
於聖教

替米司徒
曾之言

道充滿於中、以惑於世也。又謂耶穌所作奇事、不過醫治跛眇、遠遜異邦名人所作之奇事也。又謂耶穌欲萬國咸歸一教、實爲妄想、斷難成就也。又謂普雷透所講萬物之原、較摩西所講爲有據也。又謂蛇引元祖分別善惡、乃其善功、何以反受咒詛也。又謂來庫古搜倫所革地之智、遠勝於摩西所羅門、亞力山大該撒之勇、遠勝於參孫、大衛。又以保羅爲罪魁、隨時易言、毫無確論。又謂聖經束縛人心、使人拘拘然無異奴僕。若希利尼諸書、乃能開拓心胸、使人誠爲智勇也。又稱耶穌之徒爲無知強梗、又指敬拜亡骸、與木作十架之非。按注利安所論、於聖教毫無所損、而反有益。蓋吾人考核其書、亦可證教會之由、聖道之真焉。其言耶穌生於奧古士都之世、聖教初傳於革老丟之世。又言四福音與使徒行傳、爲使徒所作。又言耶穌所行之奇事、並言三百年來、教會彌滿通國、此足徵聖教非憑空而起、新約非無名氏所撰矣。注利安卒後、國教文學之士、乃絕剿滅聖教之望、但望聽其隨意拜神而已。或云至神將虔誠之心降衷於民、蓋聽其自盡儀文、隨意敬拜耳。替米司徒曾云、諸教之爭、強角勝、正所以勉人事主也。在上主之意、固欲萬國之人分門別戶、踴躍爭先、譬如

路然、或平坦、或崎嶇、雖各有遵循、而終歸一處、倘盡塞諸途、惟留一徑、不將阻斯人
勇往之心乎、在萬物之主、亦願天下萬國、各隨禮貌、以自盡其崇奉之心、又何必以
斷難成就者、徒勞想望耶、按其所論、正以顯國教之衰微、亦以顯當年迫害聖教之
非也、

第二段、教中人以文字捍衛聖道、○按聖教既勝越國教、故教中之文人學士、少辯
論外教之非、多闡發聖教之理、統論所著諸書、其要者乃阿他那西烏之書也、約在耶
穌後三

百一
十年

按其書中大旨、指明聖教原於上主、爲斯人必需之道、又本約翰福音稱耶穌

爲道、謂耶穌得上主之形狀、人當得耶穌之形狀、天堂安樂之福、皆緣與耶穌以心
相通而得也、夫人之陷溺罪惡者、乃由私意私愛、逆主背律、以致遠離眞主、跪拜邪
神、並種種不法之事、論其結局則爲死、幸耶穌於晦盲否塞之秋、賜以條律、並先知
之書、以備斯人得救之階、後又親身降臨、勝越罪惡死亡、使斯人得復上主之形狀、
以人心接於主心、而得永生之望也、至其所行奇事、足徵有掌理萬物之權能、引人
不敬受造之物、專拜造物之主、蓋耶穌之道、能變易人心、離棄邪神邪術、問鬼諸弊、

奧革司聽
之書

撒非阿奴
之書

能除滅情慾、能調馴兇悍苗人、能易人畏死之心、而爲樂於徇道之心、能捐人世俗之好、而爲企望永生之好、固遠勝諸外教之晦而不明、雜而不純、爲斯人所宜服從、遵守者也。又有奧革司聽所著之書、尤關緊要、其書自耶穌後四百十三年、至四百二十六年、始克著成、按其書中大意、以天國與世上諸國比較、論諸國如何建立、如何振興、終則如何衰滅、天國則上主所立、漸爲振興、而永不衰滅也、又論羅馬國權榮凌替、乃邪道充塞人心、頽壞之故、惟天國則有磐石之安、愈遭橫逆、愈爲堅固、能使人於罪惡之世、易爲新人、終引至永享安息之區、諸聖徒愛主頌主、永無窮盡也、耶穌後四百五十年、有嘎辣長老撒非阿奴者、著書責當時教會之非、明論耶穌之徒離棄聖經所立之標準、又指外教酗酒淫亂放蕩搶掠兇殺等罪、謂教中人亦有犯之者、其受刑較外教人當尤重也、夫撒克森人之兇狠、法蘭克人之狡猾、嘎辣人之殘忍、阿拉奈人之酗酒、胡尼人之淫蕩、其罪皆出於無知、耶穌之徒明知上主之條例、若故犯之、不宜受更重之刑乎、按其所論、似覺激烈、然考核當年書籍、教會頽敗之況確有可徵、而忠信廉潔之徒、亦多有深以爲憂者、欲極力以挽回阻隔也、

聖教由微而興

聖教外強內弱

第四章論聖教與國政相合有損有益

第一段、教會之景況大爲變更○在昔三百年內、聖教初傳、不但受迫於諸教、亦且有礙於國律、緣諸教彌滿通國、凡政治人情、無不被其流毒、耶穌之徒欲正人心而挽救俗、未免與時政相齟齬、故有權位者、咸以勢壓制之、然教會之人數愈衆、權榮愈增、而所講之善道、愈以見革敝律之功、易頹風之效、按先年耶穌之徒、但求不受迫害、拜主傳道得自便足矣、今權位之人不但庇護之、且願聖教與國政融和、如當年國教者、皇帝發巨帑建築會堂、供養教牧、並以國權壓制外教、聖道如是振興、固與國政大有裨益也、然於教中人心卻大有可慮矣、譬如滄浪之水、清潔可觀、雖旁流別派引入其中、久之自同其清、若以洪濁之波、突然湧入、不將同其濁乎、蓋當年之政事人心、仍多舊染、岌岌乎充牣於教會之中、自外視之、固爲振興、自內論之、殊覺凌替也、多有徒事儀文、未革積習、卽各等教牧亦多貪權固位之私、幾忘牧養栽培之責矣、粵自聖教成爲國教、則教會之權、遂與國權混而難分、數百年來互相爭論、故當年教牧、每盡心於權勢、而教養之事、未免多所貽誤也、

免教牧之
徭役

捐產入會
堂

教會豐厚

第二段、教會得國家厚待○昔國教祭司、國家概免其徭役、及聖教成爲國教、亦免教牧之徭役、按堪司炭聽所定之律、不以教牧充兵作工、不征會堂之稅、後因不忠之徒濫充教牧、以罔其利、堪司炭聽復定條例、不准增多教牧之數、亦不准富厚之人充其任、曰、富厚者擔當世務、貧寒者乃可受教會奉養也、第二非連替尼安第一替歐豆西烏、曾許富厚者爲教牧、須先將其財產贈於他人、在堪司炭聽之世、多有將已產捐入會堂、其後捐者愈衆、堪司炭聽將代歐盛西安逼迫時、所籍沒之會堂公產仍復退還、有人於臨終時、情願捐產入會者、亦許收納、按堪司炭聽並以下諸帝、常籍沒外教廟產歸入教會、當時之人多有聽從教牧之言、將所有財產於臨終時全行捐入、甚有不恤其妻子凍餒者、不久國中田產、約十分之一爲教會公產矣、如羅馬安提阿亞力山大諸教會、率皆豐厚異常、約計安提阿之進款足養窮嫠三千、童貞一千、病苦行旅諸人、按此公產皆歸主教管理、或爲己之薪俸、或爲長老會吏薪俸、或教會中各等公項、大抵皆爲宣教周濟之用也、奈諸主教每奢華糜費、自奉儼若公侯、以致懷私挾詐之流、覬覦其位、亦有公正主教務爲節儉、淡薄自安、蓋

欲挽其積弊也。

主教判斷之權

第三段諸教牧權勢增加○按聖教之禮

看歌林多前書六章一至六節

教中人若有爭訟宜在教會

中判斷在堪司炭聽之先凡主教判定之事若再控之於官官吏不以爲憑至堪司炭聽而後凡經主教判定者他人不可移易亦不可轉控於官其後教牧等雖犯重大案由亦歸主教治理矣夫主教之權既如此增重苟能忠信爲心清廉自勵何難阻遏教中人之邪慝使之親愛和睦乎無如多生驕慢且縈情世故而有負教養也按先年祭司於國家刑獄之事得參議於有位者之前求其寬恕今教牧亦然遮司替尼安在位時命諸教牧攝理牢獄每於拜二拜五日入獄察看又按此世代中羅馬國內叛外侵頻生禍患刑政未免嚴苛諸教牧勸免阻止良善多賴以保全也又按先年神廟例爲逋逃之藪今聖教之會堂亦循此例第二提漚兜夕悟定律倘人空身逃入敢有傷害者擬死於是爲奴者負債者婦女迫於強暴者得有逃避之所由是觀之耶穌之徒雖未能盡革斯人之惡行然能阻遏其強暴使懦弱苦難者得其庇佑也

會堂爲逋逃之藪

教牧攝理牢獄

聖日安息

第四段國律擬聖日爲安息之日。○按堪司炭聽於安息日禁止官吏辦公，並官私一切工作，惟農圃之事不禁，又命各營將士敬拜上主，祈謝其賞賜庇護之恩。厥後諸帝又有於安息日禁止取稅收債，論聖日大旨，乃使人於數日之內，守此安息，親近上主，思維聖道耳。奈通國之人，大半以此日爲閑暇之日，而般樂怠敖，逸豫是圖，烏可哉。

教中之忠
恕慈愛

堪司炭聽
所定善例

第五段聖道變革國律。○按先年羅馬人多存自尊之心，以羅馬原籍人爲貴，其於行旅奴僕，恆輕視而虐待之。耶穌之徒明講天下之人，無論尊卑貴賤，上主原一視同仁，蓋皆賴上主而生，信靠耶穌者同蒙拯救也。每勸臨民者，以忠恕慈愛爲心。昔耶穌在世，常扶持卑下者，使躋於高明，故耶穌之徒，於貧苦患難者多所顧恤，遂有以感動有位者之心，凡苛虐之律，漸爲改革矣。堪司炭聽受聖道之感，所定善律甚多，除釘十字架之刑，禁舞刀殘殺，並棄嬰等惡習，又告誡國人，釋奴從良，注利安雖怨惡聖教，然所定任恤之律，實得自聖教中也。第二替歐豆西烏命刑名家彙纂諸帝之律，按其律有合乎聖教者，亦有染乎外教者，可知此代之國政民風，乃革舊更新。

之關鍵也。此後百餘年，遮司替尼安在位，命刑名家退玻尼亞奴數人，選赫地安以下所定之律，輯爲成書，奉爲成律。按此律尊聖教爲上主所立，世上君王不得裁抑之，可徵國律默受聖道感化，厥後泰西諸國振興，雖間有損益，終奉爲模範也。

第六段，婦女景况異前。○按先年婦女幾等奴婢，自國政陶鎔於聖教，乃漸異於前，定律禁人無故出妻，又本舊約聖經，不許親族爲婚，禁人納妾，許婦女蓄產，禁爲父母者殘傷子女，並鬻爲奴婢，棄擲荒野，然此律雖定，而鬻女棄女二事，終未斷絕也。第七段，奴婢景况異前。○在奉聖教諸帝之世，猶有使奴惡習，遮司替尼安所定新律，亦存使奴之條，論奴婢生育子女，仍爲奴婢，更有俘於戰陣，擄於異邦者，亦迫令爲奴，故使奴之風相沿不絕。雖耶穌之徒亦間有染此惡習者，然教中才德之士，皆斥爲不合於道，多方裁抑之，盛撒司吞勸教中爲家主者，於足供使令之外，盡遣釋之，所留者，仍當教之以文字，又勸爲奴者，盡忠心事家主，輿革司聽謂使奴爲惡習，然出於罪惡之世，不能遽然禁止，但勸教中爲奴者，當以艱苦爲上主之懲，而忍受之，以冀得入天堂，則無主奴之別矣。按聖教所講，以人在主前，皆爲同儕，故勸爲

舞刀奴之風漸息

家主者善待其奴，當知至上猶有眞主，將必於吾人所行者查勘之也。於是朝漸夕摩，國人受其感動，多自釋其奴，所未釋者亦不似先年虐待矣。

第八段，舞刀奴之風漸息。○按羅馬人好觀舞刀奴相鬪，或人與獸鬪，多有設立鬪場，使之互相殘傷，以爲快心之事。雖奉聖教之諸帝，皆未能禁阻此風。耶穌之徒每斥其非，奈人偏於所好，幾等莫挽之狂瀾。在后耨利烏之世，有修道士特勒瑪庫者，前往羅馬，將說皇帝禁阻其事，適有開鬪場者，隨衆而入，見舞刀奴彼此酣鬪，卽跳入場中，極力分解，觀者以爲擾其樂事，羣相聳動，扯裂其身而死。后耨利烏聞之，卽降旨禁止，此風因之稍息，然亦未嘗斷絕也。

羅馬之淫風

第九段，國政教政相合之弊。○前卷略載羅馬國淫亂流行，此風代代相沿，遂爲滅亡之漸。當羅馬中葉，習尚浮夸，富貴者尤好表揚其豪侈，入則白玉爲堂，浴池亦砌以美石，出則僕從塞路，高軒必飾以精金，妻子皆衣服麗都，珠玉爲佩，至於宴飲觀劇，種種淫樂，則有不可勝數者焉。聖教初傳，凡教中首領，莫不深遏此風，不使流入教會，迨後聖道振興，其移風易俗者固多，而同流合污者亦復不少，蓋教會當卑微

之際、入教者大抵忠信之徒、少存私念、及成爲國教、人以入教爲隨時之事、故欺詐便辟之輩、濫入教會者、日見增多、而外教之敗俗頹風、遂滋長於教會中矣、按聖教眞光、於此漸爲晦暗、幸有忠信之徒、以善言相勸、善行作則、極力挽回補救之、更多有男女門徒、遁跡修道院、以爲絕人逃世之計、蓋欲離棄世俗浮華、自修善德也、論羅馬諸帝、自堪司炭聽之後、除注利安外、皆名爲耶穌之徒、然無一人實得聖道之感者、其奢華糜費、較先年諸帝爲尤甚、或謂堪司炭聽之時、爲之薙髮者千人、司庖者千人、至婦寺之流、則多於夏蟲、不可屈指計矣、論諸帝之遊幸、從官乘馬、飾金射目、羽林執金矛盾、上飾珠寶、所乘之輦、駕青騾、玉嵌金鑲、光華奪目、供奔走、聽使令者、衣美麗之衣、夾輦而馳、皇帝則身服紫袍、臂纏金釧、冠冕鑲寶石、五色燦爛、其養尊處優、大都如此、其意蓋欲自炫權榮、使人敬畏也、於是詔佞之流、承歡希旨、以遂其求榮固寵之私、誰肯進節用之言、上返樸之論哉、按此諸帝皆發國帑襄助教會、所以諸教牧明知其非、多不肯犯顏直諫、亦隨衆諛媚之、某主教進頌於堪司炭聽曰、上主遣君總理天下、將來天國之中、必與上主之子分位而治也、堪司炭聽曾設

國家與教會分權

諸帝欲獨攬教權

華筵招諸主教宴會、有某主教曰、此筵乃耶穌降臨、立尊榮天國之豫象也、

第十段、國家與教會分權○先數百年內、聖教與國政毫無連屬、故歷代皇帝有盡力迫害者、亦有不加置議者、近代諸帝咸崇奉庇養之、故教會增權、遂生爭論、皇帝曰、某權本在國家、教牧不可干預也、教牧曰、某權宜歸教會、皇帝不得承攬也、此後彼此辯爭、數百年不息焉、論先年國教、必尊皇帝爲教首、總理教政、迨聖教成爲國教、奉教諸帝欲循舊例、謂己之權位、乃上主所賜、無論國政教政、皆宜歸其統理也、堪司炭聽於宴集之時、謂諸主教曰、吾奉耶穌之名爲帝、乃上主所立之主教也、教中之外政自吾主之、至於內政則公等主之耳、蓋欲於主教之廢立、議會之聚散、皆由其操縱也、厥後諸帝把持尤甚、雖辯道之事、每任私意興廢之、教中首領固有逢迎意旨、以邀求恩澤者、亦多有心存於上主、不阿附取榮者、以爲教會乃上主所立、非皇帝所立、己之職任、得於上主、非得於皇帝、終則受上主之判、非受皇帝之判也、或謂主教受上主之委任治理天國、其位不更貴於皇帝乎、教中人尊從主教、不啻子之於父、所以主教之權勢日增、甚至有面刺皇帝者、自羅馬分爲東西、東方教政

漸歸皇帝。故詔佞之臣得廁教牧之位。以致頽風敗俗。充濫教會之中。至終則徒守虛文。眞道已消滅略盡矣。西方教政漸歸教牧。雖有皇帝把持。亦足阻遏之。迨北狄吞噬西羅馬之地。聖教遂傳於北狄。然教牧之權愈重。而其志愈驕。甚至忘其教養之責。但自恃威權。必強人以就我。所以弊竇叢生。漸入歧途矣。

第十一段。以國權逼迫旁門。○聖教既爲國教。凡不合乎聖道者。未免有以國權相迫之事。溯自教會微弱之時。教中有人有所講偏邪所行不善者。首領設法懲治之。至重則逐於教外而已。茲不但有所懲治。又以國權刑罰之。或沒其產。或囚於獄。或放之遠方。或定以死罪。堪司炭聽會降旨許國人隨意拜神。按此旨固合乎天理人情。然其心非以此爲長守之善道。乃以此爲一時之權變。蓋以聖教昌明。他教必將消敗。故不欲以力迫害之。但以理移易之耳。及阿利悟門興起。講耶穌乃上主之先知。非與上主同體。堪司炭聽招集大會於尼西亞城。阿他那西烏首論阿利悟之道爲邪。衆附和之。堪司炭聽遂降旨禁其宣講。焚其書籍。放阿利烏於國外。未幾堪司炭聽因勸諫遂易初衷。赦其回國。却放阿他那西烏於國外。及堪司炭替烏卽位。悅服

阿利烏所講因而逼迫正教甚有沒其財產放於國外者。見本卷第一章二段至替歐豆西烏爲帝始禁阿利烏之道並降旨命國人遵守尼西亞會所著之信經後又會同革雷西安非連替尼安二帝降旨曉諭國人使謹守聖徒彼得在羅馬所宣之道此道本歷代聖徒秉誠實以相傳所講上主維一主體中則有父子聖靈之別同其尊榮信此者爲眞門徒不信者則爲叛道必以嚴刑懲治之馬西木在位時有西班牙主教皮西利安者與同志六人所講與瑪尼教相類後爲人所控馬西木卽斬皮西利安等於市盛撒司吞勸勉教中人當矜憐旁門異教若阻其宣講沒其財產亦已足矣不宜恃國權殺害之也奧革司聽曰吾儕使人歸主與其以刑罰脅之不若以訓誨導之然亦不可因訓誨爲善遂廢刑罰蓋天下有如頑梗之奴者非笞撻之不可也按奧革司聽雖如此議論其生平爲人却以慈愛爲本曾云天下能服人心者眞理而已矣能使眞理服人者愛而已矣在後世代誤會其笞撻之言每於旁門異教迫害殘虐之凡教中首領莫不以此爲良法夫豈奧革司聽之本心哉試思人之行爲自有上主鑒察吾儕必欲強脅之豈非得罪上主所賜人之良心乎至路特更正之時

人始恍然此天然之理也。

第五章論避世修道之風

異教開修
隱之源

第一段、異教開修隱之源、○避世修道之事、非始於聖教也、異教已先有之、蓋欲遠離罪惡之世、預防誘惑之端、得以體道養心、成其善德也、按印度古傳、以清潔寂滅之道教人、故印度人多遁跡於深林古洞之中、寡言、不娶、寢於地、更有身卧釘牀、項對鐵鎖、或屹然而木立、或匍匐而蛇行、甚至自埋於土中、惟留呼吸之隙、掛身於鈎上、一任皮膚之傷、其他苦身之法、則有不可勝述者、卽佛教僧人、亦皆不茹葷、不娶妻、參禪入定、燃燈燃香等類、大抵欲自苦其身、以冀成爲善果也、在耨司瑪尼猶太諸教、亦多有此、本教之人、固皆仰望而稱譽之、嗚呼、逆天理、廢人倫、且啓自善之心、而入無用之地矣、

聖教中修
隱之由

第二段、聖教中修隱之由、○耶穌立天國於世、蓋欲其門徒輕視人世安樂、而以事主合主爲安樂也、自耶穌後二百年間、因外教人視教會如異邦、迫害而鄙棄之、以致彼此之情誼不通、且聖教灌於內、威權迫於外、竟與人世安樂之境、劃然兩途矣、

修隱之風
始於伊及

修道院之
風漸起

故當時門徒得保其清潔之心、殷勤以事主、厥後教中人數增衆、外多粉飾、內少誠實、自聖教成爲國教、入教者多存圖利之心、所以驕奢淫佚之風、流傳於教會、多有忠信之徒、見聖道之榮光漸晦、乃定絕人逃世之謀、遁跡於山林曠野之間、以冀潛心聖道、自修善德、以心契主也、復思教會受迫之時、凡以身殉道者、教中人咸企慕之、今則聖道昌隆、斷無爲主捐軀之事、所以好名之士、甘棄生人之樂、自苦身心、亦不啻爲主捐軀、因以顯愛主之心、以博教中人之譽、論聖教中之修隱、其風始於伊及、緣伊及天氣溫和、所產之食物甚夥、且多有山野石洞、正修隱士棲止之所也、阿利金爲伊及著名聖徒、其人雖未遜世、却惡衣疏食、不娶、多苦其身以養其心、亦修隱之先導也、按首先避世之人、大概以以利亞與施洗約翰爲法、然其所行則有甚焉者、衣皮衣、疏食、飲水、或有訪之者、講道祝福之外、無他言、此後更有數人、或數十人偕隱者、共推一人爲首、同心拜主、考核聖經、暇則耕田作苦、以爲養身之資、又有女門徒結伴偕隱者、而修道院之風於此漸啓矣、其後或數處偕隱之人、共推一人爲首、擬定規條、公同遵守、以貧乏不娶、敬長自誓、蓋以防貪慾與自用之心也、按修

修隱之弊
實

門徒區分
上下

修隱所結
之果

隱之流本欲遠離塵世自勵清廉其心固未爲不善然矯枉過中未免生弊竇焉夫財產者上主所賜也若恐其滋累宜正用之而有益於世不可棄擲之而防損於己也抑夫婦者人之大倫也必欲廢之則人之類滅矣宜以清潔遏情私不可以孤高棄倫理也且人欲防其自用之心但宜獻身於主而聽其命不可自黜靈明徒聽人之命也第恐失其所宗不將同入歧途乎當時教中人大概以修隱爲善道一若至高之德唯斯人得之其他碌碌之徒但守聖教大端仍不免於俗務得爲中人而已是聖教門徒區分上下矣豈非使人安於小就且於聖經令人同爲聖潔之道不大相謬刺乎試觀耶穌在世雖德行全備尙優游於罪人之中乘機拯救之亦未嘗命其門徒謝絕人世却使之傳道於萬方蓋欲以清潔之心勝越世間罪惡耳吾人於修隱之弊固不可不顯爲指摘若揆諸當年之時勢亦未嘗不曲諒其心且其人多有克己自卑愛主愛人者更不可因其所短盡沒其所長也

第三段修隱所結之果○按修隱之事非本乎耶穌之訓乃起於門徒之心固欲崇德修隱而誤用其術者也吾人觀其所結之果其善者知爲聖教之澆灌不善者知

遠行傳道

置身局外
之弊

其出於人意、非聖教之咎也。試卽他教之修隱者驗之、可知此風本不能益人之德、實有損於人之德也。若聖教中之修隱、蓋欲遠避塵寰、以免教內教外之誘惑、又欲警戒世人、痛改前非、獻身心於主而敬事之、以此爲當盡之分。天然之樂也。在世俗之恒情、富貴每輕貧賤、若修隱之流、自公侯以至僕隸、一體視之、無尊卑之別、正以證天下之人、皆爲同儕、蓋人之尊貴不在乎外觀、而在內德也。且使人知謙卑爲美德、不可高自位置、欲人羨慕、宜存愛人之心、多方安慰愁苦、拯濟困乏也。多有遠行宣道者、至西北二方傳教於諸狄、以化其强悍、並以羅馬文字訓其子弟、更教以墾田耕種之法、皆於後人大有裨益也。且多有閒暇、考核聖經、思維主道、並設立書院、培育人材、其後著名教牧、多有出乎其中者、更有所著之書、或發明聖道、或示人周行、其書多流傳於世、不無可採、然此皆可取之處、而猶有可摘之端、當聖教振興、外教之弊端、漸流傳於教會、使忠信廉潔之徒、同心協力、共挽頽風、未始不可補救也。乃竟高舉遠颺、一若置身於局外、以致善者無助、其勢遂孤、不善者得權、其事愈壞也。且使教中以修己爲善道、漸忽耶穌救贖之功矣。厥後凡著名隱士、教中人多有

修隱有害
人倫

修隱瑪喀
入

保羅首先
修隱

敬拜者、是拜聖徒之風愈熾也、隱士每談奇跡異能、教中人多有敬信者、是偽造之奇異愈盛也、在隱士之意、以爲必如此修隱、乃能臻於至善、而教中諸人、亦謂隱士之德、夔高莫及、若吾輩者、但冀天堂中得一末位足矣、豈非使人自阻功修、安於小就乎、且男女隱士、皆不娶不嫁、更有夫棄其妻、父母棄其子、兄弟姊妹自相離棄、視如陌路者、是於人倫之道大有妨害也、在修隱之人、出於誠意者固多、然亦有希圖安逸、躲避患難、純盜虛名者、雖遜世藏身、要皆出於私意矣、按隱士多設法以苦其身、以期崇德而修隱、有瑪喀入者、七日一餐、以杖拄立而眠、伊西豆耳每食不飽、嘗涕泣言曰、吾將食天使之食、今猶不免食禽獸之食也、瑪喀入之子第二瑪喀入、臥於溪草之間、虻嘬蜂螫、體無完膚、見者不識也、聞其聲而始知之、更有與野獸羣處共食者、久之其形狀亦如野獸、按隱士如此苦身、至終有成爲愚憨者、變爲瘋癲者、亦有自盡者、更有棄其信道之心、任意放縱者、亦足徵此風之不善矣、

第四段、著名隱士事略、○聖教中首先修隱者、曰保羅、上伊及之提比城人也、當地西烏逼迫之時、在耶穌後二
百五十年保羅年甫二十有二、逃往人跡罕到之處、匿身地穴之中、

按教會傳言。保羅隱於地穴者九十餘年。日有烏鴉銜食遺之。如主之養育以利亞者。又有隱士安透尼受主默引。往訪保羅於地穴。呼之良久。乃許其入。於是接吻行禮。坐而閑談。問世間尙有偶像乎。當代之皇帝何人乎。正談間。烏鴉銜餅而至。其大倍於平日。二人將分食之。互相推讓。莫肯先擘。乃各執一端而曳之。任其自斷。各食其手中者。食畢。飲水謝主。如是數日而別。後安透尼又訪保羅。見其合掌長跪。若仰天祈禱之狀。近視之則已死矣。適有二獅至於洞外。以爪掘地。有如壙然。安透尼卽在此地葬保羅而去。○安透尼亦上伊及人也。約生於耶穌後二百五十年。其父母皆信道之人。自安透尼爲孩提時。卽訓之以聖道。至十八歲。父母相繼而歿。惟餘一妹。一日在會堂。聞教牧講馬太十九章二十一節云。耶穌言。汝欲爲完人。須盡鬻其所有以濟貧。必有財寶在天。且來從我。於是安透尼將田產分給鄉鄰。以器用財物周濟貧苦。所餘者。僅足養育其妹而已。後又聞教牧講馬太六章三十四節云。毋爲明日慮。明日之事。明日慮之。一日受一日之勞足矣。於是安透尼盡散所餘財產。送其妹於女貞院。已則遯跡曠野。誠心祈禱。思維聖道。克己修身。遊行四方。訪修隱之

所遇之試
探

往亞力山
大宣言

士見有黽勉者、警醒者、謙卑者、慈憫者、無不擇善而從、後欲成其至高之德、乃遠避人寰、棲身古洞、又徙居紅海敗屋之下、編筐以養身、惟食餅棗、飲水、衣敝裘繫帶、如是者多年、自謂惡魔、或幻爲契友、美女、厲鬼、多方誘之、伊則心賴上主、終不受其蠱惑、魔鬼又遣獅熊豺狼蛇蠍等類、以驚恐之、伊則賴主與敵、或有光自天而下、卽將諸物驚退、曾云、魔鬼所畏者、謙卑禁食祈禱之人也、當瑪西麥奴逼迫之時、亞力山大之教會受禍尤重、在耶穌後二
百十一年安透尼特往此城、冀得爲道捐軀之榮、乃周歷牢獄、以固門徒之心、有出斬者、則送至市曹以安慰之、因其名望甚重、終無人捉獲之也、耶穌後三百五十一年、阿利烏門興起、教中人大相爭辯、安透尼欲衛眞道而阻異端、又往亞力山大城宣言曰、教中人有謂耶穌不與上主同體者、卽與外教人無異矣、若伊等講解、較蛇口之毒不更甚乎、教中人聞安透尼之論、得以反正者甚多、外教人因而歸教者亦不少也、其聲名播於四方、或欲聆其訓誨、或求醫其病症、訪之者踵相接也、堪司炭聽寄以信函、尊爲父師、求其祝福、安透尼初則辭却、或謂之曰、堪司炭聽、乃拜耶穌之君、不可却也、安透尼於是倩人代寫回音云、爾爲有福、因爾

黑拉利安
修隱者

柱上聖徒
西面

敬拜耶穌也。不可恃有國權。妄自尊大。宜思將來之審判。應知耶穌獨爲眞實永生之君。更宜行公義慈憐之事。並顧恤貧寒也。壽百五歲而卒。遺言不許薰沐其尸。葬於幽僻之處。蓋恐後人知而敬拜也。後百餘年。有人得骸骨一具。謂爲安透尼之骸骨。受主默示而得。載至亞力山大城。又移至堪司炭城。越數百年。又移至法蘭西。傳言病者捫之。無不立愈也。按安透尼在世之時。遐邇之人。莫不奉之爲聖。慕其風而修隱者。不可勝述。所以沙漠山洞古澗之中。皆有修隱之士。或獨居。或耦居。或羣居。無不自苦身心。以期天國中得至高之位也。○黑拉利安者。幼年時。肄業於亞力山大書院。曾與安透尼同居兩月。聆其訓誨。迨父母歿。卽分財產與諸昆弟。已則遁跡於猶太加撒曠野。編筐以養身。必待日沒而食。以致形容骨立。終日歌詩祈禱。誦讀聖經而已。所居石洞。其小如巢。不能起立。因其聲名洋溢。尋訪而來者。源源不絕。黑拉利安厭其煩擾。屢次遷移。終則卒於居比路海島。年八十矣。○西面者。叙利亞與基利家交鄙之人也。約生於耶穌後四百九十年。人稱爲柱上聖徒。十三歲時。在會堂聞人讀登山寶訓。遂受感動。定志修隱。初則隱居於山谷。以鐵鎖繫其脛。每禮拜

怕抽米烏
修隱者

諸處立修
道院

一餐。至教中人記念耶穌禁食之期，則四十日不食。後自造一柱，棲於其上。初高六尺，繼則增修至十二尺，又增修至二十二尺。至終，百姓代修三十六尺之柱，使居之。計西面棲於柱上者三十有六年。按柱頂方三尺，四面有欄，夜則伏欄而寢。每七日，門徒送食者，梯以進之。西面身服敝裘，項帶鐵鎖，以爲受此寒暑風雨之苦，始能減罪崇德也。聲名廣傳通國，求教求醫者，不遠千里而來。卽皇帝亦寄書求其祝福焉。至六十九歲，卒於柱上。門徒載其尸至安提阿教會厚葬之，以榮其名。厥後數百年內，往往有效其所爲，修隱柱上者。○怕抽米烏者，初爲軍士，年滿遣歸之後，入於聖孝。從學於隱士怕利曼數年。按傳言怕抽米烏於異象中，得見天使，命立修隱會於上伊及尼羅河之島嶼。怕抽米烏遂招集隱士數人，定立規條，誦經思道祈禱之外，則耕田造船織布以養生。所餘資財卽以周濟貧寒，留養病苦。凡在會者以修養之淺深，定品類之高下。每三人一室，食則同堂，彼此無言，以帕障面。未幾人數漸多，怕抽米烏在世時，衆已數千。卒後百餘年，衆至五萬矣。此修道院之濫觴也。後此風傳至多國。伊法蓮立院於米所波大米，猶司他替烏立院於阿米尼亞，巴色勒立院於

修隱之風
傳至羅馬

奧革司聽
之講論

潘士論巴色勒所立規條，不但使院中人盡事主之分，更使習各等學術，其後日新月盛，遂爲人文之藪矣。計其院中隱士，約有八萬。○按諸處隱士，各立門戶，其所講之道，大約與聖教相符，然亦有背乎聖經，逆乎天理者。猶司他替烏門所講，人若婚嫁，必不得救，在米所波大米與叙利亞境內，有行乞之修隱士，所講人之初生，卽有惡魔藏於心中，欲驅除之，無他術也，祈禱而已。惡魔去而聖靈入，無須受教讀書，自能明其所當爲之事。教會中指爲異端，以國刑迫逐之。此風乃漸息焉。○阿謀尼烏伊司豆耳皆著名之修隱士也。耶穌後三百四十年，阿他那西烏携往羅馬，羅馬教會中聆其言論，察其行爲，甚欣慕焉。阿他那西烏又將安透尼生平事跡，紀錄成書，羅馬人見之，愈爲感動，多有往於伊及或猶太定志修隱者，亦有遯跡於城中廢寺者，亦有立院於城外者，未幾此風傳遍於義大利全地，地中海諸島，更有教中童女立誓不嫁，歸入女貞院者。此風亦廣傳諸處焉。喀賴基主教奧革司聽，雖明講人之得救，在乎主之恩德，不在己之善功，却隨從當年之風，不娶妻，爲貧乏，其屬下諸教牧，皆奉爲表率而效法之，以爲免世俗之擾，庶專心敬主宣道也。然斥行乞之修隱

修隱者瑪耳聽

修隱者耶柔米

耶柔米夢中被責

士爲非、勸勉教中人殷勤工作、以養室家、故其教會中鮮有修隱之士、間或有之、大抵皆從良之奴耳、瑪耳聽者、慈憐謙讓之人也、從軍三年、傳言云、瑪耳聽曾遇赤身乞丐、卽分其衣以與之、隱居於義大利、後於法蘭西創立修道院、雖教會中立伊爲主教、終未變其修隱之風也、按瑪耳聽雖無文學、其傳道也、却有熱心辯才、故能引多人歸教、其聲名洋溢、教會中並傳其有奇事之能也、有時馬西木皇帝設筵相招、皇后親爲調羹、且於筵前奉事之、如馬太奉事耶穌者、及其死也、男女隱士教會諸人來會葬者、千里雲集、厥後教中人尊其墓爲聖、往而敬拜者、代不乏人也、○耶柔米者、當年著名之隱士、亦著名之學士也、約在耶穌後三百四十二年、生於大馬太之北鄙、其父富家翁也、彼從學於羅馬名師、學業日有增益、每於聖日入隧道中、見所葬爲道捐軀之聖徒、遂流連欣慕之、受洗後、卽定志備歷艱辛、專心事主、先至安提阿、聽聖徒阿裒利那耳司講解聖經、又遊歷四方、與著名隱士相交接、後隱居於敘利亞曠野、在伊固遠避塵緣、而淫邪之念、時猶萌動於心、伊則讀書禁食祈禱以遏之、曾患重病、魂夢中自謂已死、見耶穌謂之曰、汝爲吾之徒乎、對曰、然、耶穌曰、此

虛語也。汝非吾徒，乃西西柔。羅馬著名文學之人之徒耳。汝財之所在，卽汝心之所在也。言已。

以鞭責之。旣寤，鞭痕宛然，尙有微痛，乃立誓不讀外教之書，但專心於聖道。將著名隱士數人，按其生平行事，輯爲成書，亦招隱之意也。曾寄書友人，勸其歸隱。有云：雖父母禁阻勿聽也。此蓋誤會耶穌之言。人若不棄父母從我，不足爲吾徒也。又云：人愛主之心，與畏地獄之心，易以間其骨肉。聖經固教人以孝，然愛父母甚於愛耶穌者，必喪其靈也。卽其言以窺其意，一似非修隱之人，不足爲忠信之徒也。按耶柔米雖身居曠野，遠避人寰，却關心於辯道之事，故著作書籍，崇正道而黜異端焉。後安提阿主教哀利奴立之爲長老，却不經理教事，聞堪司炭主教貴勾利之名，往聽其宣講。耶穌後三百八十二年，回至羅馬，襄助主教大瑪俗，司其筆札，遂乘機勸人歸隱，更勸富貴人歸隱，並勸捐其居舍爲隱士之居，多有大家婦女深受感動，捐資修隱者。又以時聚集，聽其講論。因諸女徒與耶柔米時相往來，教會中遂起流言，以污蔑之。耶柔米厲言辯論，並責諸教牧無非愚魯情私驕侈之輩。因其言甚激切，致人人懷忿，事多掣肘。及大瑪俗卒，遂偕隱士數人，並女徒哀拉、哀拉之女猶司透其

耶柔米在
羅馬

隱身於伯
利恒

女修隱哀
拉

恩悻悻然而去。初至猶太，週歷聖地，繼往伊及，訪著名之隱士。又至亞力山大，聽地
地木講道。終則隱居於伯利恒。耶柔米獨處陋室之中，哀拉以疏食淡水粗衣供給
之。盡多年之心力，以原文聖經譯爲羅馬文字，旣成此書，足顯其殷勤，更著其學問。
於是流傳至今。天主教中猶重視斯書也。論其爲人，才高學博，其於宣傳聖道，擯斥
異端，大有熱心辯才。然性情乖張，剛愎自用，出言辯論，其利如刀。是以多招尤怨。後
代之人，慕其才德，若忘其僻戾者，錄其瑜，豈遂掩其瑕乎？壽約八十而卒。後人移骸
於羅馬教會中，皆奉以爲聖也。○耶柔米之著名女徒哀拉，大家婦女也。其夫卒，遺
子女五人，因受耶柔米之訓，棄家修隱，禁食祈禱，考核聖經，以聽耶柔米講解。又周
濟貧寒，顧恤病苦，每爲罪泣涕。及耶柔米離去羅馬，將往猶太，哀拉棄其少子幼女，
惟携長女猶司透其恩以從之。雖子女哭泣挽留，亦不顧也。及至聖城，見耶穌之十
架，卽跪拜之。又至聖墓，見天使所移之石，卽以吻接之。入墓捫壙中石壁，口親而舌
舐之。又至伯利恒，見耶穌降生之馬廐馬槽，乃悲喜交集，流連不忍去焉。計哀拉去
耶穌之世，約四百年，諸物未必果眞，而敬愛欽慕若是，其流弊尙有底止哉？哀拉以

修隱者貝
尼地替

所餘資財、設立修道院、請耶柔米治理之、立女貞院三、已治理之、與其女猶司透其恩、疏食粗衣、居於伯利恒二十餘載、因時常哭泣、幾喪其明、警醒少眠、禁食自苦、以致形容枯槁、曾云、先年違逆主命、豔妝濃裹、今當使吾面目黧黑也、先年跪拜假神、今當使吾身體勞瘁也、先年貪求逸樂、今當時時哀泣也、及其死也、資財已盡、教會殯葬之、有遠近主教男女修隱、並教中諸人、聚集七日、以治其喪、固亦大有光耀矣、

○貝尼地替者、恩比阿之世家子也、

約生於耶穌後
四百八十年

彼時諸國戰爭、世風頹敗、聖道之

真光似將熄矣、貝尼地替讀書於羅馬、年十四、棄其褻暱之友、棲身幽壑之中、有鄰近之隱士、以繩繫餅、縋而食之、如是三年、自謂常有惡魔誘其犯罪、已則誠心祈禱、自苦其身、乃不受其誘惑、有時慾念倏生、則赤身宛轉於荆棘之中、厥後某院隱士、咸慕其德、舉爲院長、因欲更正院中之弊、諸隱士遂易愛慕而爲憎惡、至欲毒害之、傳言云、院中人埋毒於飯而進、貝尼地替以手畫飯、作十字架之狀、其碗立爲粉碎、卽離其院、仍獨居於幽壑、聲名愈重、教中人訪而問道者不絕、乃遽立修道院十二、各立院長、已則周歷總理之、後有妒嫉其名者、設法毒害之、貝尼地替偕親近門徒數

人離棄其地，將立修道院於他方。行至喀西耨山，居於阿裒婁之廟，是處百姓仍拜此神。貝尼地替熱心宣傳，引之歸主。於是毀其壇廟偶像，立修道院於此山。貝尼地替宣揚主道，講解聖經，並醫病濟貧，耕田工作。計其居於此院者，十有四年。時嘎特君長透替拉已攻克羅馬，聞其名往謁而跪拜之，求祝福焉。此後義大利西西利嘎辣西班牙英吉利皆創立修道院，多以喀西耨爲法。耶穌後五百八十三年，喀西耨之修道院爲蘭巴地軍所毀。七百三十一年重修。八百五十七年爲回教軍兵所毀。九百五十年復重修。按此院，雖屢遭兵燹，而君公侯伯以及富貴之家，皆樂於捐助。故數百年來，十分豐盛。院長治理院事，兼理城邑村鄉四百餘處，其權位不亞於子男也。貝尼地替所擬院中規條，特節錄之。諸隱士共舉院長一人而聽其命。院長自選副院長一人以襄理之。遇有細事，院長與院中尊長議之。若大事，則與閭院人共議之。其所定規條，後代院長不可稍加損益。凡入院修隱者，須受訓一年，然後院長於聚會時，勸其心志。若果堅定，須對衆立誓：一、終身修隱；二、改其素行，作貧乏廉潔之人；三、順從院長之命。其飲食日用之規，不令人減食自苦，得以保養其身，以事主。

益修道院之

禁阻修隱之士

誦經並諸工作也。所食蔬食菜羹，少飲酒，疾病懦弱，微有肉食。每禮拜禁食二次，至冬令，日惟一餐。每日之課，以七點鐘歌詩祈禱，思道誦經，以六點鐘爲教讀工作等事。○耶穌後五百三十八年，有喀西歐豆入者，尊爵也，致仕後，年七十，立修道院於下義大利，招集修隱之人，教以聖經並先代聖徒之事，著書勸勉。於是他處之修道院，漸倣此規。少年子弟入院讀書者甚衆。此後數百年來，北狄滋擾，諸國紛爭，人心皇皇，無暇爲學，而斯文未墜於地者，賴修道院有以綿其緒耳。且希羅古籍，院中皆寶存之，故後人得以觀覽也。自貝尼地替創立修道院以來，著名之人多出其中，或有著書者，或有文學者，或爲主教教長教父者，更有往西北二方傳教於諸狄者，而諸狄卽漸革強暴之風，遵律以成國。然其所以化之者，究屬雜而不醇，蓋其所講，非修隱無以成至高之德，以致教中人自阻進修，守外儀而莫滌舊染。總之，修隱之士，固欲崇德修慝，然所論所行，終不能闡揚聖道，洽浹人心也。

第五段，禁阻修隱之事。○教中諸人，固多以修隱爲善，尊重扶持者，亦有斥以爲非，多方禁阻者。當時之君相大人，以國家當擾攘之秋，正行政用人之際，而國家數十

萬衆謝絕人寰其於國家之興廢存亡置身於局外遂不悅其所爲設法抗拒之更有教中文學之士以爲此風非耶穌使徒之訓且有妨於門徒之德亦設法抗拒之有周非尼安者亦隱士也因聞耶柔米所講修隱之善以爲言之太過著書辯論之並以循天理盡人倫之道勸勉耶柔米之女徒當時從其言出院婚嫁者甚衆按其所講婦人從夫生育子女若能保守聖道其德不遜於貞女嫠婦也又引聖經爲據云元祖未逆命之先上主已定夫婦之道矣耶穌亦許婚姻爲人之大倫先知使徒亦有成立家室者又云人於飲食若感謝而食之又何遜於禁食乎耶穌在世每赴人之筵席保羅曰凡物在潔淨人視之未有不潔淨者也按隱士所講人之德行不同惟修隱之德能超越凡衆周非尼安謂人但分善惡若專賴救主卽無軒輊之分焉然其所論亦未免矯枉過中矣耶柔米以厲言辯論之謂周非尼安之徒爲犬盧鷹鷂之屬但以飲食宴樂爲事卽以外貌而論伊等則鮮衣美食求益於己吾儕則疏食粗衣專心事主也按周非尼安與其門徒數人雖力阻修隱終屬寡不勝衆於耶穌後三百九十年羅馬主教賽利西烏逐周非尼安於教外發遣遠方周非尼安

黑樂非地
鳥之論

非基蘭替
鳥之論

逃往米蘭。又被主教安玻婁司逐於境外。後遂飄流而卒。其門徒亦漸次泯沒矣。有黑樂非地鳥者。著書論不娶不嫁之非。當時教會中以不娶不嫁爲善。每講馬利亞生耶穌之後。並未生子。黑樂非地鳥引聖經稱耶穌爲長子。且屢言其兄弟。可徵馬利亞生耶穌後更生數子也。按教會中各執一論。意見不合。然以聖經考之。大概馬利亞必更生子。奈當年教會以此論爲謬。若有如此講解。必逐於教外。西班牙長老非基蘭替鳥著書論修隱之非。並論教中種種弊端。更論拜聖骸之謬。以爲與拜邪神無異。因教會中稱聖骸大有奇能。乃指爲無稽之談。不過以左道惑衆耳。又謂人之捐資以襄助遠方之修道院。不若贍養近處之貧寒也。耶柔米聞此論。大怒曰。彼則自耽逸樂。尙以此論阻教會中廉潔之風耶。論修隱之事。已成莫挽之狂瀾。雖有極力阻止者。不啻以石填之。亦只暫爲壅塞。而波浪終難遏也。



聖教史紀卷之三

第六章 論教牧之權教會之政

立院儲傳
教之才

遷騰教牧
之位

亞力山大
之書院

第一段、立書院以儲傳教之才○按當年教會、既得國家襄助、故設立書院、培育人才、以備傳教之用、奈院中條款、鮮有定章、且此世代中、希羅之古學衰微、而修隱之風、亦易使教中人輕視文學、所以院中學者、少有才能之士、不稱傳教之職也、自聖教成國教而後、歸教者既眾、而教會亦多、凡教中有職任者、不皆練達之才、有營求其位、以遂名利之私者、亦有不勝其任、倖得選舉者、貴勾利那西安森太息曰、人自市廛草野、或撓漿、或隊伍、或梨園、皆得躋教牧之位、試思學醫者須明藥性、而曉病原、習畫者須知畫譜、能配五色、不學之流、忽爲教牧、幾同先代俚言、古有巨人、不煩長養成也、論羅馬東境、有書院數處、專學聖道、然所有人材、不足教會之用、其中最有名望者、亞力山大之書院也、首先著名之院長、曰哀提奴、約在耶穌後一百八十年至盛門特、阿利金爲院長時、其名尤著、後因教會中辯道紛爭、漸卽凌替、阿利金被逐後、立院於該撒利亞、亦甚盛興、及阿利金卒、不久衰落矣、約在耶穌後二百九十年、有長老豆

伊德撒之書院

黑哀之書院

選立教牧之規

婁替烏路西安者立書院於安提阿後百年中多出才辯之士或註釋聖經闡發聖道也又有伊德撒書院約有百年興盛米所波大米與波斯之主教教牧多出其中論羅馬西方無此等書院但於修道院中設立學塾以育人才亦多有爲主教教牧者因修隱士遠避塵囂鮮有交往所以學中子弟眼界狹隘氣量不宏不稱主教教牧之職奧革司聽立院於黑哀命院中人習學聖道而北亞非利加教會之主教教牧多出其中厥後多有倣其規模立院諸處者更有教中著名者數人初從外教書院講習希羅古籍其後或入修道院之學塾或從聖教中之名師習學聖道因其學術淹博聲名大著也

第二段選立教牧之規○前載諸教牧與衆相殊者見卷二五章主教於聚會時選立長老會吏祈禱勸勉按手其頭意謂奉父子之名降聖靈於彼也每聚集拜主之時教牧特著禮服以異於衆後雖平日亦著之其薙髮之式亦與衆不同夫薙髮者先代之所恥也後有犯罪出教悔改而求收錄者教中首領使之薙髮以明悔罪自新之意茲則諸教牧亦薙其髮者特自表其謙抑耳按選立教牧之規各教會略有不同大

選舉主教

概選立長老會吏，權在主教。若舉用主教，則他教會之主教與本教會之長老會吏酌議而立。若選立教會中有職任者，主教必與會衆酌議。後因主教之權位漸尊，遂操縱自如，不與他人計議矣。然有時會衆不待主教之命，將所悅服之人自行舉用。亦有時皇帝諷主教長老會吏等，舉其親近之人爲大主教者。安玻婁司奧革司聽教中著名主教也。當舉用時，力辭不受。此後凡被舉之人，必先辭讓。然辭之愈堅，而舉之愈力，因之更起頽風。有人冀得主教之位，暗託其親友爲之吹噓。及舉用之時，已必辭讓再三，而始就其位也。

教牧不娶之風

主教不娶爲定例

第三段，教牧不娶之風。○前載修隱之士，爲教中人所推崇，故諸教牧學其模範，莫肯娶妻，亦欲成其聖潔也。保羅達歌林多書有云：汝旣無妻，不可思娶。此於教會艱難之際，從權之言耳。而斯時之教牧，却奉此言爲定理。聖經每以新郎喻耶穌，新婦喻教會。諸教牧自謂牧養之職，乃代耶穌已爲夫而教會爲妻，固不宜再娶矣。在此風初起之時，多有人以爲不合聖經，且恐人不能自守，爲教會之羞，極力阻之。奈此風不脛而行，竟成積重難返之勢矣。在東羅馬教會，以主教不娶爲定制，其被舉爲

主教者、非修道院之隱士、卽無妻之長老也。若長老會吏等、雖在不禁之例、仍以不娶爲貴。當時有數次大會、議定人被舉爲長老會吏、無妻者不許娶妻、喪妻者不許續娶。更有人得爲長老會吏之後、卽與妻異室、教中人愈尊重之也。當此風興起之初、西羅馬之教牧、娶與不娶、尙從其便。其後亦成例、概不許婚娶矣。耶穌後三百八十五年、西班牙主教黑米利烏、因本會中辯論不娶之事、意見不合、乃寄書於羅馬主教西利西烏、請其裁決。西利西烏覆書曰、人旣得爲教牧、仍有妻室、宜黜其位。若喪妻再娶、或娶廢婦者、皆不可立爲教牧也。後有義大利亞非利加西班牙噶辣數處議會、皆以教牧不娶爲定議。惟比炭哀耳蘭教會、尙從其便。終亦以教牧不娶爲定制矣。按此事本非聖經之訓、亦不合乎天理人情。故爲時無幾、卽結不善之果。往往有教牧與教中之處女廢婦爲友、朝夕與居、一若滅其情慾者。然其事則不可問矣。亦有明明敗露、爲教會之羞者。故有數次議會斥責此事。終未能阻遏也。耶穌後三百二十五年、尼西阿大會議定教牧除養育至親婦女外、不許與異姓婦女同居。此後之議會皆從此議。奈積弊已深、未能禁阻。迨教會衰微、此風反敗壞教牧之德。

教牧爲師
表

行矣。總之教會以不合倫理之事，奉教牧於至高，不知正使之墮於至卑，並使全教會漸入幽暗之鄉，眞光幾於熄矣。

第四段、當時教牧之行。○且教牧者教會之師表也，故宜有完全之德，而無可指摘之端。所以選立教牧之時，倘其人行有可疑，即不舉用，或已經舉用，而有酗酒爭鬪、賭博淫蕩之行，即宜黜退。盛撒司吞曰：宣教者當求主之悅納，不當求人悅納。更當以主之愛爲己之福也。貴勾利那西安森曰：爲教牧者當爲完全之徒，以己爲活祭而獻於主，以身爲主活潑之殿。又當爲神醫，以醫人心疾，使主之形像復於人心。更當通曉奧道，以明訓於人。乃指耶穌爲教牧完全之則。又指保羅之殷勤事主，爲教牧所當法。或陸地，或行舟，或於猶太，或於異邦，或溫飽，或饑寒，或自由，或被囚，無地無時，不殷勤宣教也。又指教長主教等，多有慕權位世俗者。耶柔米亦指當時教牧貪財慕榮之弊，曰：觀其形狀，有若新郎，非教牧所宜有之榜樣也。盛撒司吞曰：人以巧言掩其不宜宣露之事，未爲不可也。蓋便佞非與人無益，但當用以成善，不可用以成惡也。又指舊約所載諸義人之誑言爲據，蓋因聖經未嘗明斥其罪，誤以爲可。

盛撒司吞
之偏論

耳耶柔米與他處著名教牧多服其論雖奧革司聽諸人辯其爲非然教會愈形頹敗而此論愈爲播揚也論當年教牧固多不稱其職吾人以教會之時勢揆之亦當曲諒之不可過於苛責也粵自堪司炭聽之世聖教條興歸教者旣衆教會亦多爲教牧者不下千萬數又安能於倉猝之間得如許才德之士咸稱教養之職哉然著名教牧亦復不少其所講之道所著之書不但親炙者受其感動卽百世而下亦莫不聞聲興起也總之諸教牧雖不皆完全之士其才德究勝於教會諸人能指斥當年之惡俗弊端諫阻有權位者之虐政又能以不忍人之心立不忍人之德並能傳教諸狄以化其強梗也

第五段長老會吏之職位

參看卷二五章

○在堪司炭聽之世主教之權漸重長老則惟命是

從然教中人猶未忘二職原爲一職也耶柔米曾云主教之權位高於長者非上主所立乃教會所立也在教會紛爭未起之時長老主教之稱無分軒輊長老以年言主教以位言耳迨教會中分門結黨橫議叢生教中人共舉長老一人專稱主教以尊崇之蓋欲以權位壓服紛爭之事也按大教會中主教爲首長老不過輔助之

以治會事。若無主教之小教會，則長老主之。或施洗聖餐以及教中諸事，皆以之爲首耳。論會吏職位，與先年大畧相同。在小教會中，大半倣使徒在耶路撒冷所立，不過七人。若大教會則有多至數十者焉。後教會中更起新規，於諸會吏中選舉一人爲首，稱曰大會吏，爲主教之佐。若主教死，大會吏每有襲其位者。論女會吏，非已故教牧之妻，卽主教被出之妻也。其職則周濟貧寒，顧恤病苦，以爲行此善功。一則引外教人歸主，一則輔教中人之德也。有著名女會吏歐林皮阿者，富家女也，姿容秀美，幼得聖經之訓，受其感動，年十七于歸。未二年其夫卒，皇帝替歐豆西烏，欲與其嬖倖之人爲婦，迫令再醮。歐林皮那誓死不從，其爲人也，勤儉愛人，散財濟衆，而聲名大著焉。在西羅馬教牧不娶之風起，女會吏之職遂漸裁撤。蓋因教牧欲防情私，不欲與婦女共事，則無此職任矣。

第六段，主教之職位。○前載主教之職漸次尊重，以至教會之權，統歸其手。教中人尊爲宣教定律之宗師，耶穌之輔弼，代耶穌治理教事，聖靈藉主教而始降。考先年選立主教，教中人得參其議。至此世代，皆由鄰近主教，不與教中人計議選立，且隨

主教佩帶之物

主教分四等

意舉用長老會吏等職。主教之權日愈增重。西羅馬之主教則謂長老等行施洗敷油之禮。非主教之祈禱祝福。此油不足爲聖也。人受長老等之洗。非主教按手堅固之。猶不得爲教中人也。自聖教成爲國教。主教之位不啻封疆大員。謁見者必跪行親手之禮。又以佩帶之物顯揚其位。而表異於人。一戒指。蓋羅馬婚娶者。新郎以戒指一枚親戴於新婦之手。以取團圓不絕之意。主教以此爲佩。表已與教會爲夫婦也。一拐杖。蓋牧羊者必携牧杖。主教携此。以表教會爲羊羣。已爲牧人也。一綴布於兩肩。初用麻布。後西羅馬改用羊毛織成者。上以紅絲或青絲刺十字架四。以表覓世間迷失之羊。歸善牧之耶穌也。按主教中固有勤儉度日。以己之進款。周濟貧寒。克盡教養之責者。亦有因主教之職位甚尊。權榮甚重。設法營求之。既得所欲。遂高自位置。炫燿其尊榮。若此者。乃以富貴爲心。尙能盡其教養之責哉。

第七段。主教之職漸分四等。○按主教之職。既高於長老矣。後又有上下之分焉。下焉者管理鄉黨之教會。其上管理城邑之教會。又上管理大城之教會。最上者管理數省教會。權重位尊。稱曰教長。一溯其分職之由。其故有二焉。一因聖教初傳。先萌

教政仿於
國政

教長有五

蘖於通都大邑。若耶路撒冷、安提阿、歌多林、羅馬者，後乃傳於四處。他處主教自必以通都大邑之主教爲尊矣。一因耶穌立教會於世，未嘗明定教制，迨聖教振興於羅馬，大半倣羅馬國制爲教會之制。蓋羅馬官更有臂指之使，而教會主教亦有上下之分矣。論鄉黨主教管理小教會之事，北亞非利加多有之。其位與城邑主教相侔。南羅馬之鄉黨主教，漸歸城邑主教屬下。其後盡撤其職位。其教會之事，城邑主教派長老會吏管理矣。論城邑主教管理本城邑之教會，並鄰近村鄉之小教會，論大城主教總理通省教會，稱曰大主教。城邑主教由其選立，並能招集議會。凡通省教會中有關係重大之事，莫不由其經理也。於大城主教中，有稱爲教長者五，曰羅馬也、亞力山大也、安提阿也、堪司炭也、耶路撒冷也。羅馬教長治理義大利、噶辣數省之教會，亞力山大教長治理伊及呂畢亞之教會，安提阿教長治理敘利亞、腓尼基、基利家、亞拉伯、米所波大米之教會，堪司炭教長治理潘土小亞西亞、他雷西之教會，耶路撒冷教長治理猶太全境之教會。按教長之職，總理教中大綱，大主教由其選用，能招集大議會，凡會中議定之條，或皇帝所降之旨，皆由教長頒示於各教。

教長之權
榮增重

會也。按五教長各治其教會，遇有連屬事件，亦或彼此相商，論其位次。羅馬教長爲首，次亞力山大，次安提阿，次耶路撒冷，及堪司炭教會興盛之時，則以堪司炭教長爲次，而躋於亞力山大等教長之上矣。

第八段、教長之權榮增重○按堪司炭聽之先，羅馬安提阿亞力山大三主教之權榮，已高越於他處，試論其致此之由，有數端焉。安提阿教會，乃保羅巴拿巴所立，羅馬教會，在五旬節後，不數年而立，及保羅與諸聖徒宣教，愈爲興盛，後人有謂彼得立者，無可考也。亞力山大教會，乃耶穌後數十年而立，按教會傳言，馬可曾傳教於此，由是觀之，此三城者，皆聖教之基也。且三城爲羅馬之通都，刑政之所出，或有時爲皇帝之都城，亦或遣大臣爲留守，所以教中人以此三城教長爲尊，亦教政仿國政之意也。耶穌後三百二十五年，尼西阿議會，擬定他處主教，必尊此三教長爲上，著爲定例。三百三十年，堪司炭聽遷都於比散替恩城，改其名曰堪司炭，未幾堪司炭教會大爲興盛，教長之權榮，與羅馬之教長抗衡矣。三百八十一年，有堪司炭之議會，請定仍以羅馬教長爲首，是堪司炭教長於亞力山大教長之上，而次於羅馬

堪司炭之
教長

耶路撒冷
之教長

羅馬教長因新立教會之長與己並肩其不樂從亞力山大教長亦不欲以次位讓之然堪司炭教長之權榮愈爲增重遂爲東方諸教會之首在堪司炭多有四處主教朝見皇帝僑寓都城者每聚會時必堪司炭教長居首位厥後凡教會之事奏於皇帝者帝命堪司炭教長偕同寓京諸主教先裁決之然後呈進從此堪司炭教長之權更增重矣耶穌後四百五十一年有喀西但之大會共議先年議會舉羅馬教長於諸同儕之上因羅馬爲國之京都也今以堪司炭爲京都亦當舉堪司炭教長於諸同儕之上與羅馬教長無分軒輊也時羅馬教長之使者在會力阻其議奈寡不勝衆終以前所擬者爲定議焉後羅馬教長利歐寄書於皇帝皇后與堪司炭教長深論議會所定之非並責堪司炭之教長驕傲竟敢與彼得所立教會之長同其尊榮豈非亂上主之教會失聖徒之模楷乎並責其自逞好勝之心安於現在之位觀其書辭可知正利歐之驕傲知責人而不能反己也論耶路撒冷之教會雖有主教却爲該撒利亞大主教所屬耶穌後三百二十五年堪司炭聽之母赫利那遊歷聖城欲於聖地拜主自謂尋得聖墓令人就其地建造會堂後堪司炭聽又於諸

羅馬與堪
司炭二教
長爭權

羅馬教長
增權之由

聖地建會堂數處，所以四方之人來聖地禮拜者甚衆，教會於以振興，主教之權位亦因之增重，得列教長之中矣。然其屬下教會，但猶太一省耳。

第九段羅馬堪司炭二教長爭權○自皇帝替歐豆西烏晏駕，羅馬國遂分東西，其後時合時分，終成一國，因教制仿乎國制，故西方教會漸屬羅馬教長，東方教會漸屬堪司炭教長。前載堪司炭教長已越乎亞力山大安提阿耶路撒冷三教長之上，後東帝遮司替尼安尊堪司炭教長曰總教長，凡他處之教長主教咸歸其統轄。耶穌後四五百年間，亞力山大安提阿耶路撒冷三教會中，因辯道紛爭，漸爲衰敗，境內又遭回軍蹂躪，故三教長之權愈微，而堪司炭教長之權乘機愈盛矣。論堪司炭教長之增權，因教政與國政相融，多得皇帝之助。若羅馬教長之增權，則有更關緊要之故焉。在羅馬教長，每謂吾教會乃使徒彼得所立，其尊榮權位藉聖靈而傳於歷代教長也。復思羅馬教會立於聖道振興之初，雖教會中有辯道之事，歷代教長多能持守中道，未嘗流於一偏，故四處教會有辯論不決者，每託羅馬教長裁決之。且羅馬城國家舊都也，在全盛之時，榮華權利，萬國咸瞻仰焉。今雖時異勢殊，猶爲

主教不從
羅馬教長
之權

干預喀顏
基教會之
事

干預噶辣
教會之事

人心之所繫，故羅馬教長亦藉此以增其權勢也。按羅馬城去新都甚遠，羅馬教長雖少得皇帝之扶持，亦無皇帝之撤肘，故得操縱自由，養尊處優焉。然其權榮雖漸次增加，亦多有莫肯服從者。義大利之諸教會，有大主教數人，仍自掌其權，不奉羅馬教長爲首。米蘭教會自謂巴拿巴所立，主教之權榮當與羅馬教長相埒。阿盛利亞教會自謂馬可所立，亦不肯甘拜下風。拉分那之主教有數百年之久，不肯服從耶穌後四百餘年。亞非利加之諸主教有數次議會，深責羅馬教長承攬其教會之事，有長老阿皮阿利烏者，因素行不端，本主教黜其職位，彼乃前往羅馬，求羅馬教長復其原職。教長喜得此機，不問事理如何，卽遣使與阿皮阿利烏同回，並下諭亞非利加教會，使仍尊彼爲長老。時耶穌後四百二十四年，適值喀顏基之議會，會中公議此事，議定不尊羅馬教長之諭，並寄書責之。且云：汝不可再干預吾教會事也。未幾亞非利加諸教會遭凡大勒狄族之擾害，勢甚窮迫，乃尊羅馬教長爲首，欲得其庇蔭也。此百年中西班牙諸教會屢遭凡大勒隨非阿拉尼噶特各狄族擾害，亦尊羅馬教長爲首，在噶辣之諸教會，羅馬教長亦常干預其事，有阿耳利之大主教

獨攬教父
之稱

黑拉利者其屬下比散堪之主教色利豆尼烏於將爲主教時特娶嫠婦爲妻且曾爲判獄之官定人死罪按教律此等人不許爲教牧黑拉利聞此二事黜其職任色利豆尼烏往求羅馬教長利歐欲得復其舊職黑拉利聞之徒步至羅馬城謂利歐不得干預吾教會之事利歐諷人囚之黑拉利乘間逃歸利歐遂下諭斷絕黑拉利之交往蓋不以同儕相視也並云誰謂彼得非使徒之首而減其尊榮乎不過驕傲爲心終滅沒於地獄耳利歐求皇帝第三非連替尼安頒旨於四處主教使尊羅馬教長爲首不可違逆其命於是羅馬教長之權愈大而其志愈高自謂總理天下教會代耶穌以行教政自耶穌後三百年內漸有稱教牧爲教父者其後此稱專歸教長又後羅馬教長獨攬此稱自詡爲全教會之父也按羅馬歷代教父皆高自位置俯視同儕大概引耶穌對彼得之言汝爲彼得吾欲立教會於磐石

見馬太十六
章十八節

執此

以爲據吾人考使徒行傳知彼得並未自稱爲使徒之首且保羅立教會於四處大結善果殊非聽彼得之命卽以羅馬教會論之在開創之初多得保羅之力少得彼得之力也卽使如其所論彼得亦曾於耶路撒冷安替阿宣講倘二處教長起而爭

曰彼得權榮宜歸於我何獨歸於羅馬乎羅馬教長將何辭以對總之羅馬教長獨得西方教會之權者非耶穌之令特時勢使然耳

第十段教父利歐事畧

自耶穌後四百四十
年至四百六十一年

利歐者約生於耶穌後三百九十年性敏多

謀遇事果決謹始慎終文學並進可知其幼年時必能勤學好問也羅馬教會中選爲會吏後又舉爲大會吏凡教會重大之事多委其辦理莫不臻於至善聲名自此大著時駐守噶辣之二帥構有隙端將生禍亂皇帝第三非連替尼安遣利歐往噶辣和解之適教父西喀徒卒諸主教舉利歐繼其位利歐在噶辣聞報卽祈禱主曰主乎吾聞爾聲喚甚爲戰兢受爾差派甚爲憂恐以吾之懦弱何能任此仔肩以吾之卑微豈稱居此高位人生可懼者孰懼於無德之人驟躋顯耀乎孰懼於埋沒罪孽之人掌理主之聖事乎主所付重任更祈同吾負荷而引導之也按利歐祈禱之辭似甚謙卑然自高權位之意已可概見矣彼乃恃其敏決使教父之權榮大增其後歷代教父高於他處之教長主教者實利歐植其基也其論彼得也謂爲磐石主立教會於其上付以天堂之管鍵卽救主復生將羊羣託其牧養是彼得固全教會

聖教史記

之君師、諸使徒之領袖也。吾人考核聖經，彼得未嘗自言爲使徒之首，且在安提阿受保羅規正，雖保羅少於彼得，彼得竟無辭以對。若利歐所論，有人違彼得之命，阻彼得之權，乃驕慢爲心，褻瀆上主，直入地獄之路。其言不與聖經大相刺謬乎？按利歐論彼得之尊榮，歷傳於羅馬代代教父，雖其言無稽，因當年國家之勢，教會之機，以致羅馬教父高出於同儕，一似其言大有可憑也。時東方教會常爲道辯爭，亞非利加教會頻遭凡大勒狄族擾害，故諸教會中遇有不決之事，每求利歐裁斷。利歐遂居高臨下，恃其聰明才辯，所斷多協機宜，故其權榮愈加增重。耶穌後四百五十二年，胡尼狄王阿替拉率軍入義大利，圍羅馬城，勢已危殆。利歐恃其膽畧，直入其營，以言說之，並餽以厚禮。阿替拉撤圍而去，城中於以獲全。按傳言云：利歐說阿替拉之時，彼得保羅顯現於其側，掣刀謂阿替拉曰：汝不速退，將取汝首。阿替拉大懼，始得解圍。然此言無足據矣。越三年，凡大勒狄王眞塞利克自亞非利加率軍渡海，直逼羅馬城。利歐亦至其營，說使退兵。眞塞利克但許以禁止焚殺，仍攻城不已，未幾城破，恣其劫掠者十四日，盡括所有而去。於是羅馬城內，凡官民之財貨蕩然一

利歐以言
却阿替拉

利歐見眞
塞利克

空矣。耶穌後四百六十一年，利歐卒，因其才能果敢，大增教父之權，所以羅馬教會中莫不尊重其名也。

第十一段利歐貴勾利之間諸教父事畧。

自耶穌後四百六十年至五百九十年

○此百三十年中，教父率

義大利王
歐豆阿色

狄王替歐
豆利克

皆庸流，鮮有才德，且因教中爲道辯爭，國中干戈擾攘，以致教父之權榮漸爲凌替，無一人媲美利歐者。耶穌後四百七十六年，羅馬統帥歐豆阿色日耳曼族人也，廢羅馬末帝而篡其位，自稱義大利王，掌理國權者十有七年。許羅馬教父仍循舊章，自理教事。至二腓力司爲教父時，自耶穌後四百八十二年東西教會，因辯耶穌之性，彼此不同。約三十五年斷絕交往。阿司噶特狄王替歐豆利克謀勇之士也。耶穌後四百八十九年，率軍入義大利，大戰四年，終滅歐豆阿色，獨掌義大利之權。三十三年，頗行善政，民困稍甦。四百九十八年，教父阿那司他西烏卒，教會因舉人繼位，遂分二黨，彼此分爭，甚至教牧被戕，修道院被毀。替歐豆利克招集議會，終定西瑪庫爲教父，分爭始息。替歐豆利克並不干預教事，容教父自理之。且曰：人之敬神，當隨其本心，不可以勢迫之，而強其所不欲也。按此論甚合天理，奈後世教父皆忽其言也。替

比利撒利
烏及取義
大利

蘭巴地狄
族侵據北
境

歐豆利克於臨終時舉聖徒腓力司爲教父並定立教父之規須教牧與教中人公
同選舉亦須國君建立始得繼位厥後因無才德之君國勢衰弱東帝遮司替尼安
遣其臣比利撒利烏乘機攻伐大敗嚙特之族而取其地時在耶穌後五
百三十五年此後數十年
義大利爲東羅馬之屬矣遮司替尼安之后替歐豆拉爲人巧詐倚勢弄權廢教父
色勒腓利烏而逐於境外立其倖臣非基利烏非基利烏欲盡教父之職任又恐生
皇后之猜嫌故凡事游移少有成就後遮司替尼安恐非基利烏專行己志召至京
都按非基利烏在堪司炭數年時受皇帝迫害一日違其意旨遮司替尼安大怒命
人直入會堂於聖壇前以繩繫其項牽入獄中非基利烏恐失其位降心相從乃赦
之出獄使歸羅馬行至中途而卒遮司替尼安舉皮拉基烏繼其位亦以兵力助之
然西方諸主教多不服從因阿盛利亞米蘭二城之大主教抗逆尤甚派兵往擒之
解至堪司炭囚之於獄耶穌後五百六十八年蘭巴地狄族侵據義大利北境東羅
馬之政令行於義大利者漸形微弱教父始得自由而權榮稍振至五百九十年貴
勾力爲教父其權榮才畧可與利歐侔矣

議會聚集
之故

議會分五
等

議會漸次
增多

第十二段聖教數次之總議會○以上指明教長與主教如何漸益其權、此段論總議會之權、因何越乎主教之上、按總議會之聚集、原無定期、其聚集之故、或爲制服旁門、或爲表揚眞道、或爲教中定規條紀律、溯議會之興起、由當年耶路撒冷之議會也、蓋安提阿之教會、有謂異邦人入教、必須受割禮者、有謂不必受割禮者、辯論不決、於是耶路撒冷之聖徒立議會斷定之、教會愈盛、議會愈多、既可以聯屬人心、復可以防閑邪教、於教會大有裨益也、而議會之名、列爲五等、一、謂之郡議會、主教爲首、與所屬之諸主教共議、一省教會之事、二、謂之省議會、大主教爲首、與所屬之諸主教共議、一省教會之事、三、謂之教長議會、數省聯絡一處、教長爲首、與所屬之諸主教共議、數省教會之事、四、謂之國議會、舉教長中之大有權衡者爲首、與一國一方之教長、主教共議、一國一方教會之事、五、謂之總議會、有時皇帝自居首位、或欽命大臣爲首、與教會之教長、主教共議、全教會之事、耶穌後二百五十年、小亞西亞之教會、定議會之常期、教長、主教同商教事、在伊及敘利亞、希利尼、北亞非利加、義大利、西班牙、噶辣諸國、議會漸次增多、三百二十五年、尼西阿之總議會、定各省

所議多關
乎東方

皇帝頒行
條欵

主教獨斷
議會之事

議會之常期每歲聚集一次商理教事按總議會聚集之故因教中人於道理規條議論紛紛不能合一皇帝即召四方之教長主教從而斷之雖名爲總議會然所召來之人從東方而來者居多聚集之地非在堪司炭城即在臨近城邑皆用希利尼之言語其所議多關乎東方教會之事於西方教會少有干涉凡聚集之地與聚集之期皆羅馬皇帝所約定也且赴會之人往來之路費俱由國帑頒賜堪司炭聽初召總議會於尼西阿城當聚集之時自居首位言明招聚之故且與衆人共議之後數次招集議會非皇帝親臨會所即欽命大臣代理該大臣與諸教長同居首位統攝會事議定之後將所議之條款章程錄之於冊大臣與主教各具姓名呈進皇帝皇帝即頒行於下曉諭國人凡會中所議定者勅令遵守犯者懲之輕則貶其爵秩重則放於邊疆後代西方教中之人論羅馬之教父獨掌教會之權本其權位可以招集總議會議定條款章程發爲號令使萬國遵守然考當年羅馬之教父並無若是之權也皇帝雖親臨議會不能獨斷其機宜是皇帝不敢以權勢自專在衆人亦不畏權勢而敢伸其意諸主教於教會之事惟遵耶穌之旨爲上不假皇帝裁成凡

陳福音於
案上

總議會之
權

所議定者、求合乎聖教之道、不徇乎皇帝之偏、自是觀之、可見當年教會之事、由首領主之、不由皇帝管束也、近來西方奉教諸國、漸移在上之權益於百姓、而食天祿者、多從衆民所舉、夫若是之轉移、莫非耶穌教之感發也、○總議會懲治叛道之人、定其刑名、必以人多所擬者爲準、若論道理之是非、必全會之人、同聲相和、始爲定律、有時議論不合、各樹其黨、寡助之黨、每被多助之黨逐於會外、而多助之黨得專定其所謀、當議會之時、必陳福音書於案上、意謂凡人所議之事、必以耶穌之言爲法也、迨至後世、教風頹敗、每當議會之時、並陳前代總議會之冊卷於案、意謂今之所議、須遵前代之規模也、又陳已死聖徒之骸骨於案、意謂觸目警心、令所言所行、不愧於逝世之聖徒也、總議會統理四方之教會、擬定教中應守之道、叛道者應受之刑、與治理教會之規條、拜主之禮文、各處教長主教若有過失、總議會能革其職、亦能逐於教外、總議會擬定之道、不能純是無非、而當時之人、多以爲定不可移、蓋謂耶穌已有應許、常降臨教會之中、使教會永垂不朽、且應許遣聖靈引導教中之人、堪司炭聽、曾謂尼西阿教會所定之規條、皆爲主之命令、阿他那西烏云、主藉尼

西阿之議會所言定者，永無更改。羅馬教父貴勾利言：首四次總議會所議定者，與四卷福音之書，俱可奉爲依歸。人遂過尊總議會之權勢，於教中人之德，轉有妨害。蓋使徒先知所論之道，皆受上主之默感。固宜尊重，彼未受默感之言，亦同一尊重。豈非謬誤乎？奧革司聽爲先代有德之聖徒，謂聖經所講之道，洵爲吾人之範圍。若總議會所議定者，不可與聖經等類而齊觀，亦可爲吾人入道之階。蓋議會之辯論，雖不能於聖經之外，創立新道，亦能於聖經之道，闡其精微，使人易曉也。按奧革司聽之意，以爲總議會之人，皆有謙卑遜讓之心，所擬定者，秉至公耳。然核其實事，有數次之會，所議不合，各樹其黨，多有分爭嫉妬之念。而斯人所擬定者，安能至公無私乎？按聖經之言，主固應許引導教中人，皆得知真理。然惟誠心祈求之人，得蒙上主之啓發，可辨道中之真偽。所以總議會擬定之道，或真或偽，不在乎人之多寡。位之尊卑，惟合於聖經者，則奉爲真；背乎聖經者，則斥爲偽也。不然，將失迷真道，漸受偽道之誘惑矣。○當年之總議會，或謂之七次，或謂之八次。作書之人，所論已不相同。首先之總議會，堪司炭聽招集於尼西阿城。時在耶穌後三
百二十五年特爲教中興起左道，盡

堪司炭之
總議會

以弗所之
總議會

惑人心招集議會以正之有亞力山大之長老阿利烏創論耶穌非與上主同體乃上主所造之尊靈此言一出信從者衆教會遂分兩歧矣當此議會之時赴會之主教共三百人以全教會之主教統計之僅六分之一耳西方教會之主教只七人而已可見總會所議者東方所關係者多西方所關係者少也此會議論多日有以阿利烏所論爲非者亦有以阿利烏所論爲是者及斷定之時究以彼爲非並書寫信經論明耶穌與主同體同尊同榮耶穌後三百八十一年替歐豆西烏招集總議會於堪司炭城仍爲改正阿利烏之左道赴會之主教約有百五十人盡由東方而來無一西方者然西方教會之首領亦奉此會所議定者爲定論故後世之人稱此會爲總議會此時猶興左道不亞於阿利烏之論謂聖靈與主原非一體乃上主所造尊榮之靈與天使相類此會又斷定其非謂聖靈卽主主卽聖靈聖父聖子聖靈原爲一體也耶穌後四百三十一年東羅馬皇帝第二替歐豆西烏與西羅馬皇帝第三非連替尼安招集大議會於以弗所城因訥司透利烏特起旁門教會分裂特招集議會以連合之訥司透利烏乃堪思炭城之教長論耶穌本有神性旣生於世又

有人性、二性可以相交、不能融洽爲一、此論與聖教之道不合、按聖教論耶穌之人
性、神性、陶鎔一處、渾合無間、赴會之主教共百六十人、亞力山大之教長、西耳利爲
首、其人才學聰明、行事果決、但性情躁率、好勝爭強、在會議之時、首議訥司透利烏
之非、有以訥司透利烏爲是者、是以所議不合、互相爭論、甚至怒詈相詆、終以訥司
透利烏所講爲左道、後代之人、以所議定者爲是、然因當時主教辯論至於詬誶、失
其體統、有忝厥位、乃爲教會貽譏也、耶穌後四百五十一年、羅馬皇帝瑪西安招集
議會於喀西但城、赴會之主教共五百二十人、除羅馬教父所遣之二使外、餘皆東
方之人也、堪司炭城之修道院長猶替其復起旁門、與訥司透利烏所講相反、與聖
道而亦相悖、謂耶穌只有神性、並無人性、耶穌雖具人體、原有神性、充貫其中、人體
亦成爲神體矣、與凡人之氣質、不可相提並論、會中議定此論爲非、謂耶穌降生於
世、有神性、有人性、二性不變不亂、不分不斷、二性兼全、合成一位救主、耶穌後五百
五十三年、東羅馬皇帝遮司替尼安招集議會於堪司炭城、教長猶替其烏爲首、赴
會之主教百六十五人、只有亞非利加五人而已、餘皆東方之人、此會凡與訥司透

堪司炭三
次之總議

尼西河二
次之總議

堪司炭四
次之總議

嚴懲旁門
忽畧不善

利烏所講相類者，概斥爲非。當時教會中異說蠡起，議會愈斥其非，而左道愈生。若火之燎於原，不能撲滅，撲之愈急，而火益熾矣。耶穌後六百八十年，羅馬皇帝堪司炭聽哀勾那徒招集議會於堪司炭城，自居首位。此會仍以猶替其所論爲左道，謂耶穌有神性，有人性，蓋神性能包容人性，人性受神性之約束也。耶穌後七百八十七年，東羅馬之女皇亨利尼招集議會於尼西阿城，因前數百年間興起弊端，有人繪出耶穌與馬利亞諸聖徒天使之像，供奉跪拜，教中人有以爲是者，有以爲非者，辯論不決。此會斷定可將所繪之像懸於牆壁，向其接吻，燃燈焚香，以顯尊崇之意。由是此風益盛，充牣教中，與聖經之道大相乖違。於教中人之德大有妨害。耶穌後八百六十九年，有總議會聚於堪司炭城，仍以拜像之謬道議爲善規，且謂人宜於所繪之像與福音之聖書同一尊重之。

第七章 論懲治叛道之人與教中分門別戶之非

第一段 懲治叛道之教規，由漸而寬縱。○自教政與國政相聯屬，於教政大有妨害。先年教中之首領，於叛道之人，只能逐於教外而已。今恃國家之權，能加以苛責，或

盜撒司吞
苦口而諍

籍其財產、或囚於監牢、並有流於遠方者、當時教中又興起旁門、淆亂教會、教中之首領、恃國權嚴爲懲治、然教中有所行不合聖道者、反多所忽畧、不切實懲辦、歷代皇帝大臣、名登教會之冊、身爲教會之人、然考其言行、與教外人無甚區別、多有貪婪殘忍般樂淫蕩諸弊、且多有庸碌之主教、不誠心保守教會之聖潔、但諂媚有權位之人、以求升其職任、保其祿位、然亦有忠正之主教、果敢有爲、見有權位者言行不合聖道、直陳其過、面斥其非、堪司炭之教長盛撒司吞、見皇帝與大臣有淫蕩之行、直言無隱、苦口而諍、因激伊等之怒、撤其職任、逐於遠方、曾謂其屬下之教牧曰、雖有將帥督撫與冠皇帝之冕旒者、欲領受聖餐、先觀其人之言行、有不合宜、亦禁止之、因爾之權位駕乎其上、與之聖餐、恐動上主之震怒、蓋所與非爲養身之食物、乃爲害身之刀劍也、若有猶大之輩、欲領受聖餐、亦宜禁止之、爾宜畏主、不宜畏人、畏人而人反厭惡、畏主而人自敬服也、有主教西尼西烏者、因片他裏利之總督安豆尼庫拒諫自侈、怙過不悛、將彼逐於教外、帖撒羅尼迦城突生禍亂、皇帝替歐豆西烏聞之大怒、命將帥圍其城邑、殘殺人民七千餘數、玉石俱焚、無遺老幼、主教安

安玻婁司
懲治皇帝
之罪

玻婁司以替歐豆西烏殘忍不仁、身負罪惡、及其將入會堂領受聖餐、阻之於門、不許其入、替歐豆西烏卽退離會堂、易其服飾冠冕、避位八月、不治國事、以顯懊悔之心、至耶穌聖誕之期、復來會堂、懇求安玻婁司之赦免、安玻婁司令其出示曉諭、應許國人、後此凡有斬決之事、定罪三十日後、方准行刑、其多寬日限者、蓋防己輕躁之念、容人求赦之機也、替歐豆西烏卽依允而行、又俯伏於安玻婁司之前、承認罪過、乃赦免其罪、許其領聖餐焉、

爲懲治叛
道者與起
爭端

第二段論豆那徒之旁門、○自曼他奴所論之道、傳至亞非利加、教中人論懲治叛道之人、有欲從輕者、有欲從重者、以此意見不合、彼此相爭、一黨論教會受迫之時、有畏死匿跡、或將聖經獻於官府、任人焚燒、此等人宜逐於教外、卽日後自知追悔、求教會寬恕其罪、亦不可收錄、一黨以爲此論太苛、於聖經寬容憐愛之道大不相符、耶穌後三百十一年、欲從輕之黨、舉西西利安爲喀頹基之主教、欲從重之黨、會合七十主教議定、撤西西利安之位、逐於教外、另舉瑪周利奴補授、後繼此位者、則爲豆那徒、論其人大有才辯、行事果決、兩黨之人、於城村教會、竭力盡心、善爲籠絡、

皇帝斷定
兩門之是非

豆那西烏
乞丐之黨

豆那西烏
門之人復
歸會堂

欲歸於己，而羽翼日增，嫌隙日甚矣。俟後豆那徒之黨求堪司炭聽斷定兩黨之是非，堪司炭聽乃飭令羅馬主教米開阿地與嘎辣主教五人代爲斷定。於是召西西利安與兩黨主教各十人，並在六主教之前，各伸議論。六主教從而斷之，終以喀賴基主教之位歸於西西利安，而豆那徒之黨心甚不悅服。故於耶穌後三百十四年在阿勒司城，又召主教二百人，從新酌議。衆主教仍以先年六主教所斷定者爲是。兩黨之嫌隙結蒂愈固矣。至耶穌後三百十六年，堪司炭聽親鞫此事，頒行旨意，斷定豆那徒之黨爲非，遂將彼黨之主教流於遠方。會堂之產籍沒入官，無如彼黨愈受懲創，而愈堅守其道，且多存嫉怨之心。彼黨又有一等乞丐立爲一會，自稱傷感耶穌之戰士，遊行各處，以乞丐爲生。有時燒燬房屋，劫擄財物，殺害商旅，及至被人擒獲，送入官府，彼亦欣然就刑，毫不畏死。並有自焚其身，自投於水，自墜山澗而死者。時勢至此，堪司炭聽命瑪喀利烏爲帥，率領軍旅，將彼黨會堂之門封禁，派人彈壓，擒其首領，或梟首示衆，或發遣邊疆。豆那西烏竟卒於外。後注利安在位，仍許豆那西烏之黨復歸會堂，祈禱拜主，任其自便。於是彼黨進入會堂，灑掃潔淨，粉飾棟

喀頹基之
議會

豆那西烏
門之人所
論

奧革司聽
所論

梁繪以華采意謂先年西西利安之黨在此禮拜污穢聖潔之地是以從新整理也黑裒之主教奧革司聽最有名望之聖徒也見亞非利加之教會互相爭論深以爲憂於是宣講事主之道曲爲調停求其復合也耶穌後四百十一年皇帝后禱利烏召兩黨之主教聚會於喀頹基城令各白衷懷釋從前之嫌隙赴此會者正教之主教二百八十六人彼黨之主教二百七十九人欽差大臣瑪色利奴居於首位聽其辯論判其是非此大臣與奧革司聽素相友善在所判之事未免偏袒當辯論時豆那徒之黨則曰耶穌教原爲聖潔之教入教之人皆宜爲聖潔之人若犯教規不嚴爲懲治有辱教會與外教何異又謂不善之教牧施行聖禮乃爲虛文蓋人不能以己之所無而轉施於人若教牧本無盛德雖以聖禮施行於人而教友豈能受益乎人若從不善之教牧領受其所論之道不僅不可謂之受道反謂之作孽矣奧革司聽辯之曰教牧雖無道耶穌原非無道我所領受者乃耶穌之道也不可謂之作孽也施行聖禮者惟耶穌也教牧不過爲寄道之器耳耶穌爲我之發源我之根本我之元首主之言如種我賴之而得重生雖傳教者不知遵守我必遵守也我所敬服

豆耶西烏
門之教牧
被遣

爭教父之
職

者非施行洗禮之教牧，乃信服耶穌也。惟耶穌能赦人之罪，能稱人爲義耳。瑪色利奴乃斷定豆那徒之黨所論爲非，皇帝后釋利烏卽行降旨，將彼黨之教牧發遣遠方。會堂籍沒入官，令教中人以金贖罪。此後若再聚集禮拜，一經查出，卽擬死罪。奧革司聽亦以如此重責叛道之人爲善，因誤會耶穌比喻之言，若見人則強之入，坐滿我室。見路加十四章二十三節按耶穌所言之意，乃指示門徒當極力勸勉世人歸入聖教，非指示門徒苛責叛道之人也。蓋刑驅勢迫，只能制人之身，不能服人之心也。耶穌後四百二十八年，凡大勒狄族從西班牙攻入亞非利加，侵佔地土，將兩黨人殺害甚多。二百年後，回教之軍旅攻入亞非利加，將耶穌教掃滅殆盡矣。

第三段羅馬教會分門結黨。○當此世代，羅馬之主教大有權榮，人多覬覦其位。有議院之大臣，謂教父大莫俗曰：人若立我爲羅馬教之主教，我明日亦歸入耶穌教。按舉立羅馬主教，其事重大，不亞於舉立羅馬皇帝也。故每當舉立之時，教牧多意見不合，而教中偏黨之心，遂由此生。耶穌後三百五十五年，堪司炭替烏阿利烏之門人也，將正教之主教來比利烏撤其職位，發往邊疆，舉阿利烏之門人腓力斯居

於其位。來比利烏受迫之時。降心相從。以阿利烏門所論爲是。皇帝卽降旨調還。復其原任。至來比利烏卒。正教舉大莫德爲主教。阿利烏之門人舉烏養奴爲主教。以致彼此忿怒。爰動戈兵。戰陣死者約百人。至終正教獲勝。乃定大莫德主教之位。將烏養奴放至邊疆。夫耶穌教原爲謙遜和平之教。似此樹黨分類。互相戰爭。染世俗之惡風。良可慨矣。

第四段。安提阿教會分門結黨。○耶穌後三百六十一年。米利提烏被舉爲安提阿之主教。彼乃阿利烏門之人。故此門之人舉爲主教。得位之後。歸心正教。以阿利烏門之道爲非。其人謙恭和藹。且有講道之才。所以教中人多欽服愛慕之。然因其歸心正教。阿利烏門變愛爲惡。卽撤其任。逐於遠方。另舉猶搜伊烏居其位。正教之人甚不佩服。不欲尊其爲主教。然正教中亦不和睦。彼此紛爭。此一黨仍以被逐之米利提烏爲主教。彼一黨舉教長哀利奴爲主教。後此羅馬皇帝貴西安仍許米利替烏復還安提阿。米利替烏甚願教會和睦。不欲各成一黨。乃言於哀利奴曰。吾二人同居此位。共理教事。後至一人歿世。生者獨掌主教之權。免使教會相爭。哀利奴極

力推辭不肯與之同居此位。於是有帶兵之武弁率領軍旅護送米利替烏進安提阿之大會堂復舉於主教之位。在堪司炭城之大議會米利替烏爲首。數日後竟卒於堪司炭城。教中人薰沐其屍不使朽壞。衆人送歸其柩葬於安提阿所過之城鄉多有燃燈頌讚以榮耀其名者。安提阿多有人將米利替烏之相貌或繪於牆壁或鐫於戒指或銘於杯盤以顯思慕之意。此後數十年兩黨之嫌隙終不解釋直至耶穌後四百十三年有主教亞力山大方令兩黨復合當復合之日敬備盛筵飲食宴樂以示從此永和睦矣。

第八章 論教會之風禮拜之規

第一段教會之風更變。○教會之景況已漸更變教中之風俗亦因之而更變。先代入教之人大概誠實端正多出於困窮貧苦之家其禮拜之處或在居室或在隧道或在郊野以防阻撓逼迫之事。自聖教成爲國教歸教者等類不齊多有人雖入聖教其言語行爲未改前非而清潔之教會反爲斯人玷辱教中富貴之家捐資相助遂於各城建造會堂一如先代之廟宇崇高華麗諸主教之權位不亞於國之大臣。

守聖日之規

皇台令
人遵守聖日

教中禮拜之規，漸次黜實崇華，不足感人心志，但求悅人耳目。當此世代，拜已歿之聖徒，邪風肆起，多似外教拜神之禮，獻供演戲，設席宴樂，盛撒司吞言在安提阿與堪司炭之教會，首領講道，若恃其口才，僅能悅人之耳，俾聽者拍手讚揚，似乎外教觀劇，拍掌稱奇之態，復有多處，在耶穌誕降之期，玩戲歌舞，與守此日之正規，大不相合。按禮拜之日，原爲思慕聖道，敬拜上主，今多於此日遊樂閒暇，豈不失禮拜之要義哉。

第二段，守聖日之規。○教會以耶穌復生之日爲拜日，乃遵使徒之訓，學使徒之式，與猶太教所守之聖日，相濟而不相悖。猶太以拜七爲聖日，原爲記念上主造成天地萬物之後，所立之安息日。耶穌教遵守拜一爲聖日，爲憶耶穌受死復活，賜人永生之功，遂以此日爲安息日。於歷代聖徒，大有裨益，蓋此日安然止息，可以默會聖經，思維主道，消除世俗之欲，增益道德之心。堪司炭聽欲舉國之人，皆以拜一爲聖日，令城邑人民於此日毋動作勤勞，官不聽訟，各處軍旅皆列隊舉手祈禱云：獨爾爲主，吾等尊爾爲王，賴爾之護庇，方可獲勝，並能制伏仇敵。又爲已往之恩感謝，將

耶穌復活
爲聖日之
由

來之恩祈求、我等俯伏主之足下、懇求保護、皇帝堪司炭聽、與皇帝所愛之諸子永享遐齡、身體安康、富強其國、戰勝仇敵、後代皇帝於聖日外多增遵守之日、令國中
人奉以爲聖、禁止一切行樂之事、然國中人有從其令者、大半仍以此等聖日爲
歡樂之日、教中數次議會、擬定條律、於聖日禁止作工、觀劇、婚娶、田獵等事、又不許
人禁食、蓋因此日乃耶穌復活之日、人當飲食快樂、心存永生之望、又令人於禱告
之時、宜站立不宜屈膝、以表明歡樂之意也、當年教中首領、以耶穌之復活爲聖日
之由、少言及第四條誡命、不將猶太教之聖日、與耶穌教之聖日、合而爲一、猶西比
烏讚美堪司炭聽之善令、因堪司炭聽曾宣示於衆曰、每逢主日、當聚集一處、以爲
禮拜之常期、原爲舒展爾等之身體、又藉主之律法、教誨感發爾等之心思、教父利
歐稱頌聖日爲主造成萬物之日、爲耶穌設立贖罪之日、爲耶穌與聖徒復合之日、
爲賜下聖靈之日、爲後代教會受大恩之日也、

第三段、教會之節期、○耶穌與使徒未定教會之節期、並未命教中人當如何遵守
節期、至耶穌後百年間、教中人乃漸立常規、每歲遵守二節、一曰耶穌復生節、一曰

每年遵守
二節

耶穌復生
節

五旬節、當復生節之前數日、教中人多有憂感之形、追念耶穌爲人受苦也、以五旬節爲歡樂之日、記念耶穌於此日賜下聖靈感發人心也、在耶穌後三百年、又增益耶穌聖誕節、以此日爲極快樂之日、有似羅馬國守節之式、飲食宴樂、周濟貧乏、以玩物分賜孩童、當此節之先、教中人謹守四禮拜日、不嫁娶、不作樂、存心養性、以備屆期恭祝、至十二月念五日、設筵宴樂、以慶賀耶穌之聖誕、於念六日、記念聖徒司提反、因司提反於此日受害、靈魂升入天堂、於念七日、記念聖徒約翰、於念八日、記念伯利恆無罪之嬰孩、受希律王之殘害、論耶穌復生節、乃最大之節、前四十日、教中禁食祈禱、乃記念耶穌四十日中、在曠野受魔鬼之試探也、且四十日內禁止人民嫁娶宴樂、官吏擬罪行刑、無論居家作客、皆宜安謐其心、苦煉其身、周濟貧乏、廣行善事、四十日之末七日、名爲聖禮拜、人當嚴謹禁食、日日聚集會堂、公同禮拜、此七日之首日、名爲櫻樹聖日、乃記念當年耶穌進入耶路撒冷、衆人折櫻枝前後隨從、頌讚其名、尊之爲王也、拜四日、門徒聚集筵宴、彼此濯足、乃記念耶穌臨終之時、所行之謙卑、所立之聖餐也、拜五日、爲耶穌受害之日、禁止喧嘩、撤去會堂美麗

五旬節

之陳設、遮蔽華彩之圖畫與所供之十架、燈光亦爲熄滅、平日所行之儀文、易爲樸質、首領在會堂、讀聖經所載耶穌受害之事、門徒歌哀苦之詩、拜六日、門徒禁食、乃記念耶穌身體埋葬墳墓、靈魂入於陰間、此夜讀聖經、歌聖詩、祈禱以至平旦、於日將出時、而門徒憂愁之色、變爲歡樂、大聲連呼耶穌復生、卽領受聖餐、望教者領洗入教、衆人互相問安、囚犯有被赦免者、奴僕有被釋放者、此後七日、肆筵設席、連日宴樂、耶穌復生節後五十日、名爲五旬節、此乃記聖靈普降、重生人心、開傳道之端、自耶穌復生節、至五旬節、門徒以此五十日爲一禮拜、歡喜祈禱、感謝主恩、不禁食、免去憂愁之形狀、門徒守第四十日、爲耶穌復活升天歸還本位之日、又以第五十日爲教會之生日、與人施洗、選立教牧、多在此日、每年遵守此三節、原爲提醒教中人宜記念耶穌降生、受死復活、聖靈感動人心、三者緊要之事、教中人如此遵守、雖出於敬主之誠、究未本聖經之訓、不久弊竇叢生、於此三大節之外、又增守日之規、有遵爲馬利亞之日、有遵爲某聖徒之日、幾至終年之久、無日非某聖徒之日矣、此守日之風、正引人閒暇怠惰、遊樂浮華、因終年多守聖日、反疎忽拜日之正禮、由

是捏造僞言，謂已歿聖徒俱有神妙，能行諸般奇異之事。教中人遵信不疑。於聖經所載之神蹟奇事，反多忽畧矣。按國中人以宴樂遊戲一切繁華之事爲樂，身雖入教，仍未改從前之習，卽以拜忠臣與國神之禮，移而敬奉聖徒。此等邪風一興，而主道眞光漸微。教中雖有智慧道德之人，極力救正，而邪風愈傳愈熾，眞光幾乎熄矣。

第四段門徒妄尊馬利亞○按新約所記馬利亞之事，其人固超乎衆婦女之上。天上大主欲藉人身以降生於世，卽感於馬利亞之懷，誕彌厥月，居然生產耶穌，並能拊育訓誨。此誠獨得之尊貴也。夫馬利亞之爲人，貞靜廉潔，獻身於主，大有信心，可爲衆婦女榜樣，宜敬之而已。且新約聖經多論諸名徒之言行，並未多記馬利亞之事，可知當日敬馬利亞莫過於敬諸名徒也。更無人認馬利亞爲主與人之中保，敬之一如敬主也。聖經並未記馬利亞之生死，凡所記之處，皆爲記耶穌因而及之。當年耶穌與衆人講道時，有人謂之曰：爾之母與爾之弟兄，俟於門外，欲與爾言。耶穌答之曰：誰爲吾之母，誰爲吾之兄弟。凡尊吾天父意旨行者，卽爲吾之母親弟兄姊

妄尊馬利亞

妄非馬利亞
根於外
教

妹也。推此言之意，本乎骨肉之情，不如同心敬主之情親且密矣。約在耶穌後二百年，漸起妄尊馬利亞之風。保羅在羅馬書第五章，謂亞當爲耶穌之預表。於是教中有名之聖徒瑪特耳遮司聽哀利尼悟特特利安等，謂夏娃爲馬利亞之預表。蓋以人身而論，夏娃爲萬人之祖母，以靈魂而論，馬利亞亦爲萬人之祖母。夏娃違背主命，成爲世人罪惡之源。耶穌後二三百年間，多有人僞造福音，內載馬利亞奇異之事。雖言出無稽，教中人多奉以爲眞。聖經旣明載約瑟娶馬利亞爲妻，又明載耶穌亦有弟兄，乃教中人以不娶不嫁爲善德，是以妄稱馬利亞爲終身之童貞女。又論其自有生以來，爲人聖潔無疵，不僅稱爲耶穌之母，並稱爲上主之母，爲之建造崇高會堂，以表尊奉之意。又將欲求上主之事，託馬利亞代爲轉求，以其大有權能於上主之前，求無不允，洵可爲主與人之中保。由是漸將信靠耶穌之心，移而信靠馬利亞。視馬利亞與耶穌之尊榮，似不分軒輊矣。若追察妄拜馬利亞之謬習，實根於外教拜邪神之風。蓋先代希羅二國，有拜女神之規，並有稱爲某神之母者。若拜馬利亞之謬習，豈非外教之惡俗傳染於教會哉。上段所言有記念耶穌之數大節，又

尊馬利亞
之諸節

上主爲獨
尊

妄尊聖徒
之由

漸增記念馬利亞之節、有名爲報告節者、乃記念天使加百列將耶穌降生之事、報告於馬利亞也、有名爲潔淨節者、乃記念耶穌降生後四十日、約瑟與馬利亞抱耶穌進入聖殿、獻於主前、行潔淨之禮也、有名爲升天節者、在聖經原未載馬利亞之死、乃教會中有訛傳云、耶穌與天軍接馬利亞之靈魂、歸入安樂園、次日又有祥雲接馬利亞之身體、亦歸安樂園、與靈魂復合、在後世代又多增敬奉馬利亞之節、禮文又極繁華、漸忘耶穌贖罪之大功、不存懊悔廉潔之心、不念上主不以貌取人之言矣、

第五段、教中人妄尊聖徒與天使、○按聖經之言、人當以至誠之禮、敬奉上主、凡有名之聖徒、與尊榮之天使、皆不可以敬主之心敬之也、當年教中人尊先代之先知使徒、爲上主篤實之僕、有門徒當教會受迫之時、忠心不二、爲主殞命者、教中人同尊敬之、後教中有名之師長、或爲主教、或爲隱士、或爲遠方傳道之教牧、亦同尊敬之、約三百年之久、於尊敬之禮、鮮有越分、只於先知聖徒之死期、在墓前聚會禮拜、述其生前之德、以激動教中人之善念而已、嗣後漸入邪規、各方已歿之聖徒、教中

祈禱已歿
聖徒之誤

伊法連祈
求聖徒

尼撒貴勾
利祈求聖
徒

人於其墓側建造會堂，以揚其美名，並重其威靈，以爲能護佑一方，恍如外教人重視神祇焉。有將病者送入會堂，使之卧於其中，以爲聖徒有醫人疾病之靈驗。又陳列金銀珍寶於堂中，亦與外教人之供獻邪神無殊。盛撒司吞曰：聖徒之墳墓，較君王之宮殿，粉飾尤覺華美。其往來之人，更衆於登朝之士。教中人敬備盛筵，獻於聖徒，如先代外教人敬備盛筵，獻於國神。聖經教訓吾人，惟當祈禱上主，並未言至祈禱天使與已歿之聖徒。又言耶穌降生於世，乃爲上主之表像，人與主之中保也。至耶穌後三百餘年，教中人妄尊已歿之聖徒，亦可爲主與人之中保。其勢稍亞於耶穌而已。於是祈求聖徒，以爲聖徒大有權衡，能將所祈之事，轉求於主。主必樂於允准。伊法連古利祈禱聖徒云：爾等承繼主業者，爲耶穌之弟兄也。爲我轉求耶穌，使我得靠耶穌，脫離攻擊我之魔鬼。爲我至卑至苦之，以法連訴求上主，使我蒙恩，使我至終得救。尼撒之貴勾利祈求聖徒替歐豆耳，託其轉求上主，使國太平，眞道興盛。又求其轉求弟兄彼得、保羅、約翰爲其所立之教會祈主。貴勾利亦祈禱聖徒伊法連云：爾嘗立於聖壇之前，與天使同事至聖之主，記念吾等轉求上主，赦免吾等。

貴勾利那
西安森祈
求聖徒

以偏道忽
畧正道

漸立敬奉
聖徒之節

之罪、使吾等得入永存不滅之天國、貴勾利那西安森祈禱聖徒阿他那西烏云、施恩看顧吾等、感動衆人、使之以全備之心、敬奉全備三一之主、時而安靜、保全吾等之性命、時而紛亂、接吾等與爾往來相交、米蘭之主教安玻婁司曾云、主所遣護庇我等之天使、我等理當祈求之、爲道殞命者、舍身爲主作証、我等亦當祈求之、蓋殞命者已流己血、洗淨罪惡、卽能爲我等之罪祈求、況其爲主殞命爲我等之大祭司、又當看顧我等之行動、我等之爲人也、且彼以身殉道、旣勝肉體之私、則知人肉體之軟弱、我等爲軟弱之體、求其轉求上主、不可以此爲恥也、教中人信天使與已歿聖徒、同時於各地聽人之祈禱、此論與外教所論諸神相類、與聖經之道大相背謬、細查聖經所云、獨上主之曰、能於各地察人之事、獨上主之耳、能於各地聽人之聲、獨上主能體恤保護萬人、如此敬天使與已歿聖徒之謬道、流於教會、惑人心目、漸至忽略耶穌爲中保、爲替身之要道、而天使與聖徒之恩德、若不亞於耶穌矣、○教中人敬奉已歿聖徒、漸立多節、遵守某節爲記念某聖徒之功德、有一方人遵守之節、有全教人遵守之節、並遞相傳染、教中人以某聖徒之死日、爲其生於天堂之日、

數緊要之節

卽守此日爲聖、每逢此日、聚會禮拜、首領將某聖徒訓人之善言、勉人之善功、宣述於衆、百姓此日竟恣意行樂、類外教人守節、敬奉諸假神之陋俗、按此諸節之中、有數緊要之節、一曰、彼得與保羅節、守此節在六月二十九日、謂二使徒於此日爲道殞命、二曰、彼得登主教位之節、惟羅馬教遵守之、在二月二十二日、三曰、使徒約翰之節、在十二月二十七日、四曰、司提反之節、乃記念其爲道受害、在十月二十六日、五曰、施洗約翰生辰節、在十二月二十五日、六曰、諸聖徒節、東方與西方之教會守此節、時日不同、七曰、大天使麥加勒之節、乃尊其爲衆天使之首、在九月二十九日、堪司炭聽於黑海邊爲麥加勒建造會堂、教中人歷代守此諸節、此正增益妄尊聖徒之謬規、漸減敬奉上主之大道也、

妄尊聖物之謬習

第六段、教中人妄拜諸等聖物、○前言妄尊已歿之聖徒、謬習興起、後又興起妄尊諸聖物之謬習、如聖徒之遺骨遺血、火葬之灰、所著之衣服、所用之器皿、受死之刑具、無不尊重而寶存之、耶穌後三百二十六年、羅馬皇太后赫利那游歷耶路撒冷聖城、遽云、覓得耶穌之十字架與鐵釘、並有架上所書文字、其後各教會多有屑小木

司提反之
遺骨

禁止買賣
聖骨

蓋撒司吞
之言

片言從十架所得而耶路撒冷會堂之十架仍完整無缺再後言有人覓得耶穌所戴荆棘冠冕與無縫之衣並多有聖徒之遺骨爲教中人覓得有云魂遊象外而後得者有云蒙主默示而後得者門徒若得某聖徒之遺骨必建高大會堂置聖骨於寶棺會合多人送入堂中極盡尊崇之禮司提反遇害之後四百十五年教中傳言覓得其聖骨此骨後散於四方有至亞非利加西班牙噶辣等處者無知之百姓尊重遺骨遺物其風甚熾無論何地建立會堂必將寶物藏於壇下有購買聖物者必索重值因而人多僞造欺罔愚人耶穌後二百八十六年羅馬皇帝替歐豆西烏定例禁止買賣聖徒之遺骨又禁止遷移聖骨教中人以此聖物有醫治諸病之能力有人云在米蘭城有一聖徒遺骨衆人送於街衢道旁有瞽者自遺骨經過其目卽開並多有病者摸之卽愈甚至有衣服一沾此骨亦有愈病之妙能不惟教中之愚人傳此妄言卽首領亦隨聲附和貴勾利那西安森曾云聖徒之遺骨與其靈魂有行奇事之妙能蓋撒司吞云爲道殞命之聖徒所遺之土灰貴於金銀蓋因土灰有醫病之用並有救急扶危之能且能保護一城之人較城池軍旅干戈尤爲妥協更

立遊會之
由

能佑人不受暗中仇敵與惡鬼之殘害安玻婁司云、讓他人積蓄金銀、我等積蓄聖徒之鐵釘、與爲人贖罪所流之血、並十架之木、此等謬道愈興、教中人愈信聖徒有醫治身病之妙能、而忽耶穌醫治心病之神能矣、若此者、如人以糠爲食、不過虛飽、而養身之眞糧、反置之度外、不亦愚乎、

遊會之舉
動

第七段、教中之遊會、與遠拜之誤、○諸國之人、或因尊敬某神、某勇士、某聖人、定立大節、至期遊會、爲敬神敬勇士敬聖人也、聖教在受羈縻逼迫之時、未立遊會之規、迨至勢派盛興、不受教外之轄制、漸興遊會之規矣、按立遊會之規、或因遵守禁食祈禱之日、或因遵守某大節、或因殯葬名徒、或因設立主教、或因遷移聖骨、或因奉獻新立教堂、凡歡欣之日、藉遊會以伸其樂、在患難之中、亦卽遊會以寫其憂、由此觀之、遊會之義有二、或欲感謝上主之恩、或欲表揚懊悔之情、至遊會之日、衆人遊行街市、周歷會堂、在會者有諸教牧、有修道士、有衆多之人民、前引後隨、或頌祈禱之文、或歌詩篇之句、主教身著禮服、頭戴禮冠、左手執十架、右手高舉、爲路傍之人祝福、會中人或抬聖經、或舁十架、或肩輿聖徒之像、與諸般聖物、或高舉錦繡旌旗、

遠拜於聖城

斥責遠拜之誤

遠拜於多處

或燃火把燭燭無非藉熱鬧繁華以表教會之榮耀也。○古今各國之人有存敬神之熱心則親身遠拜者或往某名山某古洞某聖城某壇廟如猶太人往耶路撒冷回教人往麥加中國人往五台等處耶穌後數百年間聖教之中漸起遠拜之俗多有人往耶路撒冷欲親見耶穌降生與受死復生之地耶穌後三百二十六年堪司炭聽之母赫利那壽臻七十有九往耶路撒冷在約但河受洗捐資建造會堂在山橄欖山與伯大尼之地自赫利那行之於前後人多往耶路撒冷在耶穌墓前跪拜者自以爲親身遠拜多受勞苦於死後得救必有大益及旋歸之日必攜帶寶物或小塊十架之木或約但河之水或耶路撒冷與伯利恒之土以爲此等寶物有行奇事之妙能教中明哲之首領見此遠拜之謬習斥責之曰聖書並無此訓又曰婦人遠拜恐於貞靜有傷尼撒之貴勾利曾云人縱遠遷其地主未必更近之爾不論居於何處若與主預立安宅主必與爾相近耶柔米曾云比探與耶路撒冷離天堂遠近無殊遠遊至耶路撒冷非可羨慕之事在家有事主之善行乃可羨慕之事也教中人不止往耶路撒冷敬拜又至亞非利加之黑哀敬拜聖徒司提反之骨又至

堪培尼亞敬奉聖徒腓力司、又至嘎辣敬奉聖徒瑪耳聽、又至亞拉伯之地、欲與約伯之塚接吻、此後教會漸失事主之忠心、而徒尙事主之虛文、致遠拜之風日熾、雖欲黜置而不能、可慨也夫、

禮拜與先代之同異

宣講聖道之規

第八段、聖教之公禮拜、○公禮拜之規、與先代禮拜之規大同小異、溯先代領聖餐之時、使外教與望教者出離會堂、其後教會通行國中、百姓俱可稱爲教友、雖領聖餐之時、不令退出、在會合禮拜之時、有人讀聖經一段、其後漸有首領摘選聖經緊要之處、或福音之書、或先知之書、或使徒達教會之書信、定一年每禮拜所當讀之書、此風代代相傳、至今路特耳所立之教會、與英國之主教教會、禮拜時亦有預定應讀之書、當年之首領勸勉教中人、不僅於公禮拜之時聽讀聖經、卽閒居獨處之時、亦當默誦、並言教中多有不合聖道之言行、因人忽畧聖經之訓也、然在未刻字印書之世、抄錄之書昂貴、有資財者可以購買聖經、無財者卽不能購買、只在公會聽聖經之訓而已、讀畢聖書、首領或揀選題目、宣講聖道、或按次序講解、或創世紀、或詩篇、或先知書、或福音、或使徒之書信、耶穌後三四百年之間、東方教會之傳道

者、多有口才敏捷、德高望重之士、其名聲最著者、乃貴勾利那西安森與盛撒司吞也、亦有傳道者、用浮詞以表其才學、在多處會堂首領講道、至機神暢快之時、衆人鼓掌歡呼、與觀劇至妙絕之際、鬨堂喧笑相等、西方教會之首領、不多備講論、只用淺近之言辭以相勸勉、有時首領將欲開講、多有人出離會堂、若與己無涉者、有主教不容其退出、將開講時、令守門者閉門、以強留衆人聽道、大抵講道之責、在主教一人、若無主教之會堂、或長老、或會吏、倡首勸講、亦有修道士與隱士、或在通衢、或在屋頂、或升古木、或立石柱、與民講道、並有時教中無職之人、與衆人講解、勸之共遵聖道焉。

第九章 論教會之聖禮

設立聖禮
之大意

教會之聖禮何也、乃耶穌所定之禮、以表內心所受聖道之益、並爲得蒙救恩之印證也、奧革司聽曾云、聖禮乃表顯內心所受之恩、人於此禮所得之益、視其信心如何、若無信心、此禮如死、乃無濟之意若有信心、此禮可使之成爲心靈活潑之人、譬如嘉種布於膏腴之地、必根深葉茂、多結籽粒、聖禮亦如嘉種、若有信心、卽如嘉種得膏腴

七條聖禮

之地必多結聖靈之籽粒。自耶穌後數百年間，教中之禮數無定，最要者有二：曰洗禮，曰聖餐。洗禮爲贖罪重生之印證，聖餐爲教中人與耶穌心相契合之印證。奧革司聽雖以此二禮爲首要，却增添三條，自以爲聖禮：一堅振望道，二男女婚嫁，三教牧受職。北亞非利加米蘭噶辣之地，多年有教中人彼此濯足，以表謙卑之意，乃效耶穌當年之式，而以此爲聖禮也。踰數百年，教會將聖禮作爲七條。至今天主教以此七條爲定章：一曰洗禮，二曰堅振，三曰聖餐，四曰煉體，五曰臨終敷油，六曰男女婚嫁，七曰選立教牧。按更正教，因聖經無此五條之訓典，只遵洗禮聖餐，因其爲耶穌所立之大禮也。

洗禮之原

妄言洗禮
有妙能

第一段施洗之禮。○耶穌由死復生，升天之時，命其門徒勸化萬民，奉聖父、聖子、聖靈之名，與之施洗。在五旬節，衆民聞使徒之訓，又蒙聖靈之感，遂懊悔罪惡，信認耶穌爲救主，領受洗禮而成奉教之人。自此觀之，洗禮乃表聖靈於暗中潔淨人心之功，又爲贖罪入教之印跡。教中人於耶穌後數百年，漸忽洗禮爲重生外表之意，而重視洗禮爲入教之印跡。迨後有首領妄論曰：施行洗禮之人，若有教牧之職，雖領

奧革司聽
之論洗禮

遲延嬰孩
之洗禮

洗之人貌爲順從，不多明聖道，而此禮却有洗滌罪惡，重生人心之妙能。那西安森之貴勾利曾云：洗禮包括三等恩澤，一贖罪之恩，二重生人心之恩，三復還主形之恩。尼撒之貴勾利曾云：亞當因罪被逐出樂園，至嬰孩受洗，卽如將其安置於樂園。盛撒司吞云：孩童雖無罪惡之染，亦宜與之施洗，乃使之靠耶穌得爲善良聖潔之人。在教中成爲弟兄，亦可爲主之愛子，終能得主之恩業。奧革司聽云：人必受洗，方能得入天國。洗禮爲贖罪之法，重生之本。並云：嬰孩不受洗禮，不能得救。此乃背乎聖經之言也。當年教中人皆謂教中嬰孩宜受洗禮，然多有輕忽此禮者，亦多有人特意遲延嬰孩之洗禮者。蓋恐幼年人自受洗禮之後，或有不合聖道之言行，有負施洗之恩，反加應得之罪也。貴勾利那西安森與奧革司聽二人之母，雖素奉上主，卽二人在嬰孩時，猶未使受洗。至年壯時，心受聖靈之感，乃傾心領洗歸教。二人因於嬰孩時未得受洗，深自愧悔，以爲悲歎之事。貴勾利曾勸勉教中一婦曰：不使爾子之心被罪所勝，在懷抱之時，宜獻於主。爾因懦弱之肉體，懼洗禮之神印，此乃出於懦弱之信心。撒母耳未生之時，其母哈那已將其獻於主前，自生之後，教養其子。

年壯者遲
延洗禮

新禮攙合
洗禮

以備祭司之職、彼不懼懦弱之肉體、而倚賴主焉、多有年壯望道者、或因戀愛世俗、或因誤會洗禮之意、而遲延洗禮、及至疾病患難急迫之時、始受洗入教、教中之首領盡力阻止、此風乃爲熄滅、嬰孩受洗、遂成教中之定規、按當年之規、將望道者全身浸於水中、約至受三次洗禮、一奉聖父之名、二奉聖子之名、三奉聖靈之名、教中人漸有以新禮與洗禮攙合者、遂使人忽洗禮之要義、有時首領向望教者施行逐出邪鬼之禮、有時向之呼氣一口、作爲聖靈啟發人心之形、有時向之伸手摸耳、口言以法大、以法大乃開之意見
馬可七章三十四節以表開通人之靈智、有時畫十架於額、或畫於胸、以爲作耶穌精兵之印記、在亞非利加之教會、首領用鹽一粒、與望教者食之、以明其得聖道之味也、入教者多有選取新名、見默示錄二
章十七節人當領洗、以帕障面、以表其不識不知、靈明未開之意、先西向棄擲撒但、與其所賜之榮、後東向發誓、專靠三一之主、施洗畢、首領敷以膏油、此乃堅振之禮也、隨撤障面之帕、衣以白衣、以表其爲重生聖潔之人焉、

堅振之禮

第二段、堅振之禮、○當此世代堅振之禮漸興、雖與洗禮聯屬、却分爲二、當年衆教

選立教牧
之禮

教會隨時
勢選立教
牧

牧以洗禮爲收人作聖兵之禮、堅振之禮能增益彼等之戰力、教牧於初入教者施行此禮、將膏油敷於額鼻耳胸等處、以表其爲靈性祭司之意、東方教會諸教牧皆可施行此禮、西方教會惟主教專任此權、各主教於彼所屬之地、周遊各堂施行此禮、至今主教與羅馬教路特耳之教、仍存此禮、而更正教多將此禮刪除、以爲後人添設、聖經無此訓也、

第三段、選立教牧之禮、○約自耶穌後三百年、教中諸首領以選立教牧爲聖禮、奧革司聽稱此禮爲聖、並言教中人皆當奉此禮爲聖、然耶穌未曾明訓門徒、理宜選立數等教牧、以訓導栽培全教、保羅在其所立之教會、選立長老會吏以治理各會事務、按耶穌專講天國之道、以此道具變化人心之妙能也、至於教中之規條、任後世之教會、隨時審勢、斟酌而定、假令耶穌於創立教會之初、設立教牧之等次、將其所任之職、與其應爲之事、一一制成條款、於各國各代永不變更、恐於教會有損而無益也、蓋各國之風氣不同、天下之人情各異、若執一定之教規、恐合乎此國、不合乎彼國、宜於此世、不宜於彼世矣、譬如嘉種、先播種而後生根、生根而後生苗、生苗

教政以羅馬國政爲則

教牧約分三等

增益數款

而後結實。此乃植物自然發長之機。非出於勉強也。聖道之發榮於世。亦如是而已。故耶穌將教中之政。任教中人隨時制宜耳。前卷曾言聖教先傳於羅馬大國。而教政遂多以羅馬國政爲則。按教會之權。固上主所執掌。然上主乃神。居於冥默之中。必假手於人以治理之。在此世代。聖道傳於多國。歸教者雖衆。多有不明聖道。未盡去其舊染之污者。當時之教牧。必挾權力以秉鈞衡。始能經理教事。約束人心也。教中人視教牧之位愈尊。其視設立教牧之禮亦愈重。遂以此禮爲聖禮。有言人受洗禮。可稱爲主之祭司。人受聖禮。立爲教牧。可稱爲實任之祭司。按教牧約分三等。一曰會吏。一曰長老。一曰主教。按教牧之職。必由卑而及高。乃有名高望重。如西皮安安破婁司者。一時得會吏。長老主教三職。後專行主教之事。獨主教能施行選立教牧之禮。而長老亦能輔助之。按此禮之儀文。主教以手按其頂。爲之祈禱。隨以聖餐食之。後教中人漸增數款。攙於此聖禮之中。因教中有背道之人。迨後醒悟其罪。教令其薙髮。以表懊悔之意。又有修隱之輩。自行薙髮。以表自認有罪之意。故於選立教牧之時。諸教牧皆效此禮。而薙髮之風。由此起矣。選立教牧。有時以聖膏敷之。

聖餐之意

以聖書授之、若授主教之職、則與以戒指、以表與教會合一、如夫婦之合體也、又以杖與之、以表其有管掌教會之權也、

錯論聖餐之禮

第四段、聖餐之禮、○按聖餐之意、乃表明耶穌之死、使門人永矢弗諼也、耶穌設此聖禮、當身未受傷、血未流出之時、卽稱所陳之餅、爲己之身、所酌之酒、爲己之血、此乃以言寓意、若實認此餅爲耶穌之身、此酒爲耶穌之血、則與耶穌之意大謬矣、耶穌亦曾謂其門人云、食吾肉、飲吾血、必得永生、於末日吾必使之復生、因聽道者中心厭煩、不服此言、遂又言曰、使人得生命者、乃靈、肉體無益、吾向爾等所言、乃靈乃生命、若究此言之的確、食耶穌之肉、飲耶穌之血、乃誠心領受聖道之意也、在使徒所立之教會、門徒無不遵守聖餐之禮、並以此禮爲領受聖道之外表、迨至後日漸起妄論、多有教牧謂此餅酒、乃變成耶穌之身血、或謂耶穌之靈體、渾於餅酒之中、彼等以此餅酒與耶穌之靈體渾合、爲耶穌復降世、再受死救贖人罪之妙、耶路撒冷之主教西耳勒論領受聖餐云、教牧祈求上主、賜下聖靈、以變此餅爲耶穌之身、此酒爲耶穌之血、乃因聖靈所拊摸者、隨而改變、成爲聖潔、又云、爾以餅之形領耶

貴勾利論
聖餐

奧革司聽
論聖餐

錯論耶穌
復捨其身

穌之身以酒之形領耶穌之血爾乃食飲耶穌之肉血使爾之肉血與耶穌之肉血合而爲一又云祈禱聖靈之後聖餐之餅不再爲餅乃耶穌之體也尼撒之貴勾利稱聖餐之餅爲永生之食物又稱爲耶穌復活得榮之體高典替烏曾云造物之主自地生餅自餅以備己身自酒以備己血雖多有教牧誤論此聖餐之禮然亦有與聖經相合者猶西必烏稱聖餐之餅酒爲耶穌身血之外表爲耶穌受死之遺念又論耶穌之言爾等須食人子之肉須飲人子之血此謂耶穌之道爲活潑之靈食爲信者之眞糧也奧革司聽亦言耶穌聖餐之禮包藏喻意此餅酒至禱告之後仍爲餅酒食飲者若存信心乃領耶穌之生命亦曾言猶大只食耶穌所賜之餅其餘使徒食此餅卽食耶穌之身此言使徒之心與耶穌之心相合爲一之意此代之教牧不惟多有誤論聖餐之餅酒變成耶穌之身血並誤論耶穌之身一時分於各處也奧革司聽斥責此論云耶穌之身在世不能同時在天按聖經耶穌一次獻身救贖人罪而不再獻贖罪之祭見希伯來人書九章二十八節然教牧論聖餐之餅酒已成耶穌之身血又論每逢行此聖禮耶穌復舍其身以贖人罪此論一興教牧之權勢愈重蓋因教中人誠信耶穌在聖禮之內復

西耳勒之言

重視聖餐之禮

爲人罪捨命、愚民漫謂上主之奧秘、寓於此禮之中、遂敬此餅酒、如敬上主、而視施行此禮之教牧、爲上主尊榮之大臣、嗟乎、此風愈熾、愈驅人尙奉主之虛文、而忽事主之誠意矣、當領聖餐之時、教牧不只爲生者祈主赦罪、卽已歿者亦爲祈主赦免、耶路撒冷之主教西耳勒、稱聖餐爲獻於主無血之靈祭、曾云、恃此贖罪之祭、教牧爲全教之奠安祈禱、爲世界之太平祈禱、爲皇帝軍旅囚犯疾病貧乏困苦者祈禱、吾等又記念已寢之人、或先哲、或先知、或使徒、或爲道殞命者、望主因彼等之祈禱、懇求、亦受吾等之祈禱、吾等並爲已歿之衆門人祈禱、皆緣視此陳設之聖禮、如此祈禱、大能輔助彼等之靈也、後代之教牧、施行聖餐之禮、誤認獻耶穌之身爲聖祭、此贖罪之祭、能救已歿之門徒、脫離地獄之苦、而享天堂之樂、此弊端乃出乎人心、與聖道大謬矣、

第五段、領聖餐之外儀、○耶穌之使徒創立教會之基、以訓導勸勉爲要務、後世教牧漸忽其要務、而重視領受聖餐之禮、當領聖餐之先、教牧宣讀聖經、開導望教之人、隨勸勉衆信徒、各具誠敬之心、以備祈禱上主、衆信徒答云、吾等純心向主、教牧

又云、此乃爲善、此乃合宜、然後祝謝上主、施聖餐之恩、衆云、聖哉、聖哉、聖哉、萬有之

主耶和華、其榮光照徧寰區、

見以賽亞
六章二節

又云、大衛之子孫和撒那奉主名而來、人宜頌

揚、在至上之處、宜稱和撒那、

見馬太二十
一章九節

教牧隨述耶穌在世數端緊要之事、又讀耶

穌立聖餐之言、求聖靈變餅酒爲耶穌之身血、按古禱文之經、教牧於獻餅酒時、禱
云、吾等罪人、想念耶穌賜生命之苦、其救人之十字架、其死而越三日復生、升入天堂、
坐於其主其父之右、並仰望其再降臨、有威嚴榮耀、以審判生死之人、按人之行爲
施行賞罰、吾等將此有威無血之祭物獻於主、求主不按吾罪視吾等、不按吾愆尤
研究吾等、依主之善、依主向人無能名之愛、塗抹誌、吾罪之券、頒賜永存之天恩、人
目未曾見、耳未曾聞、心未曾想及者、主已備成、欲賜於愛主之人、愛人之主、不爲吾
罪棄絕主民、教牧在此連三次言云、主之民、主之教、祈禱主、會中人答云、吾上主全
能之父、憐愛吾等、吾上主、吾救主、撫恤吾等、吾主施行浩大之恩、拯濟吾等、將聖靈
賜於吾等、使聖靈覆於聖禮之上矣、賜生命之主、乃上主、乃天父、與獨生之子與主
同體、與主同位、與主永生、聖靈之言、存乎律法先知新約等書、在約但河聖靈成鵠

教牧爲全
教祈禱

領聖餐時
日不同

形降於主耶穌基督之首。又於五旬節，在聖榮之郇山樓房內，降於聖使徒之身，有火舌之狀，求主恩賜聖靈，及吾等之身，並及此聖禮，使聖靈之聖善尊榮形顯，能以變化此餅，成爲耶穌之聖體。衆答云，阿們。教牧云，此杯爲耶穌之血。衆云，阿們。教牧云，此聖禮能使領受者，蒙贖罪之恩，蒙永生之福，能結善果，身體靈魂得爲聖潔，並望此禮能令聖教堅固。聖教乃主所建造，以門徒之信心爲磐石，望地獄不能勝越教會。望此聖禮能救聖教脫離左道，脫離誹謗之言，脫離惡人之手，使教會永存弗替。至萬物成全之日，奉獻之祈禱已畢，教牧爲全教祈禱，爲諸等人祈禱，爲已歿者祈禱，始自善義之亞伯，至使徒及爲道殞命者而止。禱畢，同食主之晚餐。後領主之聖餐，主教與諸教牧食飲畢，而後及於教中人。教牧舉餅與人曰，耶穌之身。舉杯與人曰，耶穌之血。生命之杯。至終教牧祝謝主恩，衆人歌詩，教牧祝福，會衆退散。按領聖餐之時日不同，有教會每日食飲者，有每拜日食飲者，後世東方之教會，更有每年一次食飲者，有某大節按次食飲者。東方之教會，與亞非利加之教會，擅立嬰孩食飲聖餐之規，引使徒約翰之言爲証，云，爾不食人子之肉，不飲人子之血，卽無生

命於爾中

見約翰六章五十三節

此風至今尙存。約自耶穌後八百年。西方教會禁止之。因不合

聖經之訓也。聖經令人省察己心。然後食飲。若嬰孩知識未開。不知省察。未明聖餐

之義。

見歌林多前書十章二十九節

故不可以聖餐與之也。

第十章 論建造會堂

溯自創立聖教。至耶穌後三百年。因教會屢受逼迫。或於人家。或於隱僻之處。會合禮拜。自堪司炭聽尊奉聖教爲國教。門徒於各處立公禮拜之會堂。堪司炭聽或發內庫。或發國帑。爲教會建立多堂。厥後皇帝大臣。與富厚之民。建造會堂者。相繼不絕。監撒司吞曾出歎息之言。因人不惜重貲。建造會堂。而於周濟貧乏之善念。反忽畧之。耶柔米因門徒多出金銀建立會堂。而斥責之曰。以石所造成者。不爲主殿。主之真殿。乃信徒之心靈。有時門徒以邪神之廟宇。易爲會堂。更有平毀廟宇。以其故物建造會堂者。所羅門建造聖殿。工竣獻於主。門徒於某處建造會堂。工竣亦必獻於主。至告成之日。衆人會合禮拜。主教陳列某聖物於殿中。祈禱歌誦。勸勉衆人。施行聖餐之禮。此堂稱爲聖堂。專爲拜主之用。按建造大會堂之規約。分三層。依所羅

門聖殿之式其一爲望教聚集之處其二爲門徒聚集之處其三爲教牧聚集之處其第一層有懸掛亞當夏娃之像者此規或有寓意以表顯亞當所失之樂園其後裔復於聖教得回也或望教者或教外者或輕犯教規者或猶太人皆可於此堂聽教牧誦讀聖經宣講聖道然領聖餐之先必退出此堂堂外有院有背道者即在院中聽教會之懲治有流涕求入堂者轉爲祈禱冀得赦免復入教中由第一層堂大門而入卽第二層堂大門之對面卽聖壇此乃大堂也衆人於此坐而聽道男在右南向女在左北向惟東方之教會婦女坐於堂之兩旁懸樓聖壇之左右另有小懸樓或修道士或女修道士或尊貴之官長坐而聽道有講臺建於大堂正中然多有教牧立於祭壇之階宣講講臺與祭壇之間有矮臺其上有歌聖詩者有誦聖經者有逐除邪鬼者有任各等庶職者第三層堂名至聖所在全堂之東其灣斜如半月之狀此堂內有祭壇祭壇之前或設帳幕或櫥屏門或立闌干隔截祭壇與大堂聖壇在內堂之中其上有覆罩覆罩之上有十架祭壇中空其上有蓋或木或石或銀壇中有爲道殞命之遺骨多有祭壇立於聖徒墳墓之上者此風或從默示錄六章

九節之言所起其言云我見祭壇下有爲上主之道及爲作證而見殺者之魂聖壇之裝飾甚美有刺繡之簾帷有光豔之十架有排列之蠟燭有抄錄之聖經有帳幕收藏所獻於主之聖祭聖祭卽聖餐之餅而教牧認爲耶穌之聖體祭壇之左有案其上祭司預備聖餐祭司卽教牧之別稱祭壇之右有靜室乃祭司更衣或避人祈禱之所祭壇之後有主教之位其左右有諸長老之座如此浮華與先代使徒之樸素甚懸殊矣是明顯教會漸失禮拜之誠心而多行拜主之虛文也○按羅馬以釘十架爲極重極辱之刑而聖善之救主亦遭此慘苦門徒不以爲辱反以爲榮因耶穌受十字架之刑正顯拯救罪人之恩也無如因尊重十架之心漸起謬習門徒用指畫十架之形或額或目或口或胸以表敬奉上主之意教外人由此頓生譏誚謂教中人爲拜十架之輩門徒又令匠人造成十架或木或金或銀有用珍寶鑲嵌者厥後不只作十架並懸掛耶穌像於上按使徒所立之教未曾繪畫耶穌之像以動人敬奉之心夫耶穌畢生之聖跡至死而復生歷歷在人目中無須繪畫其像始增人虔肅之心然去耶穌之年代愈遠而教中人愈起藉畫傳眞之舉並多有教牧論此風有益於

人德又云文學之士能誦讀聖經無庸爲之畫像無學之人少得聖經之訓宜爲之畫像以觸其尊崇之念此繪畫耶穌形像之風約自耶穌後四百五十年興起先畫於會堂牆壁後又畫於人家牆壁自古教中有虛傳之言云耶穌曾用神能使其形像顯於方布之上遂送於伊得撒之王阿嘎路又有虛傳之言云女門徒非婁尼喀於耶穌赴刑所之時隨於其後以帕借與耶穌拭其面上之汗及送還有耶穌之像並荆棘編成之冠冕印於其上未幾不僅畫耶穌之像並畫馬利亞懷抱耶穌作嬰孩之像再後畫東方博士於馬槽前跪拜耶穌之像終畫使徒之像爲道殞命者之像主教之像修隱之像此風初起似於人有益能增人敬主之心然流傳愈久愈於人心有害蓋敬主所造之人過重而敬主之誠心懈矣

1179